

汪氏藝芸書舍鑒藏善本書錄

湛然居士文集十四卷

何陋居鈔本

汪閔源藏書

元郎律楚材撰楚材字晉卿遼東丹王八世孫金

尚書右丞履之子從太祖平定四方太宗時官至中書令至順元年追封廣

寧王諡文正元史有傳集前有甲午仲冬萬松野老行秀敏云湛然居士年

二十七受顯訣於萬松其法忘死生外身世毀譽不能動哀樂不能入湛然

大會於心精究入神盡得其道萬松一日過其門見執菜根蘸油鹽飯脫

粟萬松曰子不太儉乎曰圍閉京城絕粒六十日守職如恆人無知者以至

扈從西征六萬餘里歷艱險困行役而志不少沮跨崑崙瞰瀚海而志不

加大客問其故而曰汪洋法海涵養之力也集凡十四卷惟第八第十三

十四編有雜文餘皆古今體詩自詠物之外多以國事歸美為章句雖搜


契之忠皋陶之嘉未易過此又有癸巳平水冰巖老人王鄰襄山孟攀鱗

九山居士李微子微序微稱適者中書省都事宗公仲亨更新此摹工錄

刻過雲中同盟納樊子通見屬為序云當時僅見

後七卷可知傳本之稀此舊鈔本版心題何陋居

三字少樵錄



湛然居士文集叙



夫文章以氣為主浩然之氣養於胸中發為文章
不期文而文有餘矣古之君子其文見於簡策宏
深渾厚言近而旨遠詞約而義深非後世以雕篆
為工者所能比蓋其浩然之氣貫於中也諸葛孔
明暨近代范文正公懷王佐之才有開物成務之
畧自任天下之重初不欲以文名世然出師一表
可與伊訓說命相表裏而萬言一書議者亦比於
管仲樂毅二子者豈嘗學為如此之文也哉其忠

義之氣形之於文亦不自知其所以然也嗚呼世
之作文者非不衆也言語非不工也及其建功定
業任大持重不若昔之人者其胸中所養者小也
今吾湛然居士其度幾乎公當聖朝開拓之際應
鹽梅鼎鼐之任仰贊天子茂弘德威臣上古所不
臣之國籍禹貢所不籍之地公之功業著見於天
下炳如日星雖月氏殊俗蠻荆遠方莫不仰戴其
威名觀其從事征討軍務倥傯宜其不暇留意於
文字間然雄篇傑句散落人間復如彼其多或吟

詠其情性或托意於玄機千彙萬狀會歸於正又
皆肆筆而成若不用意為者人雖服其精敏意者
何為而能然耶殊不知公善養其浩然之氣充於
其中形於言動發於功業見於文章有不得不然
者矣孔子曰有德者必有言其是之謂乎邇者中
書省都事宗公仲亨更新此集募工鏤板過雲中
同監納樊子通見屬為序微以為文章者公之餘
事也公之德業天下共知之固不待文而顯也其
文天下共傳之又奚待以序而彰哉雖然不為之

辭者微東城一鄙人也幸齒于門下士之末若復
獲挂名於文集中固所願也於是乎書癸巳年十
月晦日九山居士李微子微序

乾坤之運否之則塞泰之則通日月之光蒙之則
晦廓之則明聖人之道鬱之則滯推之則行化而
裁之謂之教神而明之存乎人天之未喪斯文陰
有主宰亦有所託付教不終隱待其人而益弘况
乎啓端發源于新造之初扶傾柱邪於積亂之後
以任當世之重以行衆人之難必有命世大賢超
人異行舉歷代非常之事卒前哲未成之志與時
標準卓然為吾道之倡夫道之不明久矣去古而
今呂情其性典謨遠而淳風衰雅頌息而淫辭作

以大學中庸為虛位以致知格物為迂論聖門閉
而不開正路梗而莫辟加之兵革以來百餘年間
宇宙之內昏：默：如夜之未晝夢之未寤醉之
未醒病之未藥伏陰未覩於太陽寒谷未熙于春
律黎苗之渴望未蘓黔首之倒懸未解夫欲濟塗
炭而域仁壽滌瑕穢而鏡澄清療國脉之膏肓細
天維之罅漏草創萬有權輿百度興禮樂于板蕩
之際極詩書于煨燼之餘黼黻皇猷經緯政體變
干戈而俎豆易荒服而衣冠斷雕反樸鑄頑成仁

扇美化以風六合沛膏澤以雨羣生教績將絕之
時功畫無形之世非天下之至神其孰能與于此
哉惟我中書湛然居士天資英挺上智誠明著龜
其識鈞鼎其器聳四方之具瞻過千載之嘉會作
朝廷之翰維社稷之楨牢籠區夏宰制山川提封
不牧之邦郡縣不毛之地正機衡而泰階平明曆
數而靈符定開元建極盡彌綸之術驟帝馳王入
酬酢之計以唐虞吾君為遠圖以成康吾民為已
任涵養于事業形容于文章得之心不受一塵應

之手自能三昧游戲妙場掀揭理窟運天地之橐
籥奪造化之機絨論性則窮其深源談道則索其
隱旨以聖經為根本故其文體用而精微以史氏
為枝葉故其文氣焰而宏麗盤詰訓誓其格言詠
歌比興其奧義雖出師征伐之間猶銳意經濟之
學觀其投戈講義橫槊賦詩詞鋒挫萬物筆下無
點俗揮灑如龍蛇之肆波瀾如江海之放其力雄
豪足以排山岳其輝絢爛足以燦星斗幹旋之勢
雷動颺舉溫純之音金聲玉振片言隻字冥合玄

機奇變異態靡有定跡變乎出於見聞之外鏗錫
炳燿盪人之耳目所謂造物有私默傳真宰胸中
別有一天爾蓋生知所稟非學而能如庖丁之解
牛游刃而餘地公輸之制木運斤而成風是皆造
其真境至于自然而然公之於文亦得此不傳之
妙若夫湛然之稱不可以形尋不可以言詰其處
之也厚其資之也深靜於內為善淵演於外為道
派即其性而見其文與元氣俱粹然一出於剛正
觀夫所稱其人可知矣然則作之者創於始亦在

乎述之者成其終適有中省都事宗仲亨最為門
下之舊收錄公之餘藁纖悉無遺今又增補雜文
誠好事之君子舉其全帙付之於門下士高冲霄
李和瑞協力前修作新此本以示學者可謂兼善
之用心 省丞相胡公喜君之文揄揚溢美勒成
為書中有或悞者更加釐正命工刊行于世益廣
其傳真得仁人之雅意省寮王子卿李君實許進
之王君玉薛正之皆欣然響應共贊成之二公承
宗公之志畢其能事同諸君繫永為序僕以兵塵

中來舊學荒廢不敢應命蓋公之心術至曠不能
盡探之于文公之文章高致不能具陳之于序雖
其文皆公之寓言筌蹄而忘象是亦勲業之餘蘊
公如不言則人將何述焉嘗謂雲漢為章天之文
言辭可法以之文故觀乎天文以察時觀乎人文
以化成天下文之為用大矣哉今公之為言非徒
示虛文而已實救世行道之具所以柱石名教綱
紀彛倫鼓舞士風甄陶人物豈惟立當代之典章
端可為將來之軌範於戲大禹不治水吾民憂其

魚孔子不作經王道幾乎熄夫以文德開通濟物
密藏諸用扶持聖道之久獎幽而復顯見天意之
所屬為時永定而能樹治本遏亂源活生靈福奕
世其功德無慙于先聖斯文不墜皆公之力焉是
言也非獨予之所言迺天下之公言也歲次癸巳
十有二月初吉襄山孟攀鱗序

領中書省湛然居士文集序

士君子困而後學老乃思歸博奕之流猶賢乎已
屏山居士年二十有九閱復性書知李習之亦二
十有九叅藥山而退著書大發感歎日抵萬松深
攻亟擊退而著書三十餘萬言內藁心學諄々大
半晞顏早立亞聖生知追繹先賢誠難倒指湛然
居士年二十有七受顯訣於萬松其法忘死生外
身世毀譽不能動哀樂不能入湛然大會其心精
究入神盡棄宿學冒寒暑無晝夜者三年盡得其

道萬松面授衣頌目之為湛然居士從源自古宗
師印證公侯明白四知無若此者湛然從是自稱
嗣法弟子從源自古公侯承稟宗師明白四知亦
無若此者萬松一日過其門見執菜根蘸油鹽飯
脫粟萬松曰子不太儉乎曰圍閉京城絕粒六十
日守職如恒人無知者以至扈從西征六萬餘里
歷艱險困行役而志不少沮跨崑崙瞰瀚海而志
不加大容問其故而曰汪洋法海涵養之力也若
乃譽聖安而成贊戲清溪而發機行九流而止蹤

橫立三教而廢邪偽外則含弘光大禦侮敵國之
雄豪內則退讓謙恭和好萬方之性行世謂佛法
可以治心不可以治國證之於湛然正心修身家
齊國治之明効吾門顯訣何愧于大學之篇哉湛
然嘗以此訣忠告心友時無識者慨然曰唯屏山
閑、可照吾心耳噫嘻雖欲普慈兼濟天下後世
末由也已嘗和友人詩曰贈君一句直截處只要
教君能養素但能死生榮辱哀樂不能羈存亡進
退盡是無生路至於西天三步遠東海一杯深老

作衲僧未易及此使裴公美張無盡見之當歛衽
焉蓋隻字出於萬化之源膚淺未臻其奧者方且
索之於聲偶鍛鍊之排正如檢指蒙學對句之牧
豎望涯於少陵詩史者矣加以志天文以革西曆
既焦桐而贊南風在燮理為難能皆湛然之餘事
或謂萬松濶論無乃夸誕乎曰王從之雷晞顏王
禧伯尚不肖屏山閑：形于論辨萬鍛炎鑪不停
蚊蚋宜乎子之難信也吾待來者千載一人豈獨
為子設耶甲午年仲冬晦日萬松野老行秀中夜

秉燭序

夫文章天下之公共言賦者自以與賈馬爭麗則
言詩者自以與李杜爭光焰送辭藻者不讓蘓黃
恃歌詞者輒輕吳蔡以至氣衝雲霄而莫有相下
及其較量長短探頤妍醜得其全者鮮矣厭人望
者鮮矣中書湛然性稟英明有天然之才或吟哦
數句或揮掃百張皆信手拈來非積習而成之蓋
出於胸中之穎悟流於筆端之敏捷味此言：語
語其溫雅平淡文以潤金石其飄逸雄拔又以薄
雲天如寶鑑無塵寒冰絕翳其照物也瑩然向之

所言賈馬雨則之賦李杜光焰之詩辭藻蘓黃歌
詞吳蔡兼而有之可謂得其全矣厭人望矣外省
官府得居士文集古律詩雜文五百餘首分為九
卷恐珠沉于海玉隱于山而輝彩未著特命良工
板行於世使四方士大夫如披雲覩日快願見之
心嗚呼言者心聲也中書之言自詠物之外多以
國事歸美為章句雖稷契之忠臯陶之嘉未易過
此癸巳歲十二月望日平水水巖老人王鄰序

湛然居士文集目錄

卷一

和黃華老人題獻陵吳氏成趣園詩

和平陽王仲祥韻 和李世榮韻

和李世榮見寄 和李世榮韻

再用其韻 又索六經

和移刺繼先韻三首

和薛伯通韻 鹿尾

過金山用人韻 過雲中贈別李尚書

和裴子法韻

和許昌張彥昇見寄

和南質張學士敏之見贈七首

和張敏之鳴鳳曲韻

和孟駕之韻

和陳秀玉縣梨詩韻

和冀先生韻

卷二

和百拙禪師

題平陽李君實吟醉軒

從聖安澄老借書

題西菴所藏佛牙二首

移刺繼先韻二首 過陰山和人韻四首

再用前韻

復用前韻倡玄

用前韻送王君玉西征二首

用前韻感事二首

過濟源和香山居士韻

和裴子法見寄

用李德恒韻寄景賢

過天德和王輔之四首

槐安席上和張梅韻

思親有感二首

思友人

贈李郡王筆

寄雲中臥佛寺照老

寄平陽淨名院潤老

贈雲川張道人

贊李俊英所藏觀音像

題西菴歸一堂

和景賢還書韻二首

外道李浩求歸再用韻示景賢

外道李浩和景賢霏字韻予再和呈景賢

和楊居敬韻二首

過天寧寺用彥老韻二首

過天山周敬之席上和入韻二首

和人韻

丁亥過沙井和移刺子春韻二首

再過晉陽獨五臺開化二老不遠迎

過青源謝汾水禪師見訪

王屋道中

卷三

和解天秀韻

用萬松老人韻作十詩寄鄭景賢

萬松老人真贊

萬松老人琴譜詩十首

寄曲陽戒壇會首大師

和王巨川韻

釋奠

和移刺子春見寄五首

寄移刺國寶

寄景賢一十首

和景賢韻三首

和李世榮韻

和景賢十首

又一首

和王君玉韻

過東勝用先君文獻公韻二首

過夏國新安縣

過青塚用先君文獻公韻

過青塚次賈搏霄韻二首

再用韻以美搏霄之德

再用韻自歎行藏 再用韻感古

再用韻唱玄

過雲川和劉正叔韻

過雲中和張伯堅韻

過雲中和張仲先韵
過雲中和王正夫韵
過白登和李正之韵
過天城和靳澤民韵
過武川贈散令人
過燕京和陳秀玉韵五首
還燕京題披雲樓和諸士大夫韵
和威寧珍上人韵 和李德脩韵

卷四

和呂飛卿韵 再用韵贈國華
謝飛卿飯 再用韵紀西游事

再用韵贈搏霄

再用韵謝非熊台飯二首

再用韵唱玄 再用韵

和搏霄韵代水陸疏本因其韻為十詩

寄賈搏霄乞馬乳 謝馬乳復用韵二首

贈搏霄筆 再用韵寄搏霄二首

再用韵別非熊 愛子金柱索詩

贈賈非熊搏霄

和李振之二首

非熊兄弟餞予之燕再用振之韻

和連國華三首

連國華餞予出天山因用韻

還燕和吳德明 又和橙子梅韻

和竹林一禪師韻

西菴上人住夏禁足以詩戲之

送韓浩然用馮朝卿韻

戊子喜雨用馮朝卿韻二首

戊子餞非熊仍以呂望蟠溪圖為贈

和宋子玉韻 和李邦瑞韻二首

和邦瑞韻送奉使之江表

和王正之韻三首 祝忘憂居士壽

蠟梅二首

謝禪師 公寄閭山紫玉

和鄭壽之韻 寄沙井劉子春

和琴士苗蘭韻 和人韻二首

和武川叢亞之見寄五首

已丑過雞鳴山 寄天山周敬之
和李和瑞韵 因用其韵

卷五

贈蒲察元帥七首 庚辰西域清明
用塩政姚德寬韵 用昭禪師韵二首
和薛正之見寄 乞扇
壬午西域河中游春十首
游河中西園和王君玉韻四首

河中游西園四首 河中春游有感五首
過閭居河四首 感事四首
壬午元日二首 過沁園有感

用劉正叔韻

西域家人輩釀酒戲書屋壁

西域從王君玉乞茶因其韵七首

和冲霄韵五首 又一首

和冲霄十月桃花韻二首

用薛正之韵

卷六

和景賢見寄

用劉潤之乞冠韻

西域河中十詠

西域和王君玉詩二十首

和楊彥廣韻

題平陽李君實此君軒

西域有感

早行

自叙

西域元日

西域寄中州禪老士大夫

蒲華城夢萬松老人

寄巨川宣撫

寄南塘老人張子真

寄德明

才卿外郎五年止惠一書

寄清溪居士秀玉 戲秀玉

寄張子聞 寄用之侍郎

和正卿待制韻 寄仲文尚書

雪軒老人和傑久不惠書作詩以怨之

謝王清甫惠書 思親二首

思親用舊韻二首 思親有感

再過西域山城驛

辛巳閏月西域山城值雨

十七日早行始憶昨日立春

是日驛中作窮春盤

西域蒲華城贈蒲察元帥

乞車

戲作二首

過太原南陽鎮題紫微觀壁三首

和松月野衲海上人見寄二詩

夢中偶得

賈非熊餞予用其韻

用李德恒韻

松月老人寄詩因用元韻

和薛正之韻

卷七

用李邦瑞韻

寄平陽淨名潤老

和鄭景賢韻

和李茂才寄景賢韻

除戎堂二首

寄武川摩訶院圓明老人五首

和李漢臣韻四首 和北京張天佐見寄

戊子繼武川劉搏霄韻

憇解州邵薛村洪福院

邵薛村道士陳公求詩

過金山和人韻三絕

謝王巨川惠臘梅因用其韻

和王巨川題武成王廟

又用韻

又一首

和景賢七絕

又四絕

和景賢二絕

和高冲霄二首

過天山和上人韻二絕

過覃懷二絕

王屋道中

過天德用遷上人韻

贈遼西李郡王

題張道人廟二首

題古并覃公秀野園

題昭上人松菊堂

題平陽劉子寧玄珠堂

題誌公圖

題黃山墨竹便面

請住東堂

請倪公

請照老住華塔

華塔照上人請為功德主

請嵩公禪師詣天德作水陸大會

和賈搏霄韻二絕 和高麗使三首

夢中偶得 和武善夫韻

題寒江接舫圖 題黃梅出山圖

夢中贈聖安澄老 跋定僧嵩

詠探春花用高冲霄韻

寄休林老人

過濟源登裴公亭用閑：老人韻四絕

再用前韻四首 復用前韻四首

再和西菴上人韻 請真老住華塔

請王公住太原開化

和薛伯通四絕

和松菊堂主人昭老見寄三詩

洞山五位頌 太陽十六題

西城嘗新瓜

天德海上人寄詩用元韻
寄白雲上人用舊韻

武川摩訶院請為功德主

和房長老二絕

過平陽高庭英索詩強為一絕

卷八

醉義歌

題恒岳飛來石

為慶壽寺作萬僧疏

太原開化寺革律為禪仍命予為功德主

因作疏

為石壁寺請信公庵主開堂疏

王山圓明禪院請予為功德主因作疏

萬卦山天寧萬壽禪寺命予為功德主因

作疏

請某公庵主任竹林疏

請湛公禪師住紅螺山寺疏

請容公和尚住竹林疏

請智公尼禪開堂疏

請某庵主開堂疏 為慶壽寺化萬僧疏

請亨公庵主開堂疏

三學寺改名圓明仍請予為功德主因疏作

平陽淨名院革律為禪請潤公住持疏

太原五臺寺請予為功德主因作疏

請定公庵主出世疏

大龍山永寧石壁禪寺請忘憂居士為功

德主代為之疏

代忘憂居士請琳公禪師住持壽寧禪疏師

為大覺開堂疏三道

司天判官張居中六壬祛惑鈴序

苗彥寔琴譜序 答楊行省書

進西征庚午元曆表

西游錄序 辨邪論序

寄趙元帥書

萬松老人評唱天童覺和尚頌古從容菴

錄序

評唱天童拈古請益後錄序

燕京崇壽禪院故圓通大師朗公碑銘
貧樂菴記
自贊

燕京大覺禪寺創建經藏記

卷九

和張敏之詩七十韵三首

次韻黃華和同年九日詩十首

寄雲中東堂和尚

謝萬壽潤公和尚惠書

燕京大覺禪寺與公乞經藏記既成以詩

戲之

寄龍溪老人乞西嶺香

謝聖安澄公饋藥
和王正夫韵

繼孟雲卿韵
次雲卿見贈

和王正夫韵憶琴
繼宋德懋韵三首

和平陽張彥升見寄

跋白樂天慵屏圖
和請住東堂疏韵

寄倪公首座
寄呂飛卿

戲陳秀玉

卷十

扈從冬狩

用秀玉韻

送西方子尚

用楞軒散人韻謝秀玉先生見惠東坡杖

和邦瑞韻送行

謝西方器之贈阮杖

繼希安古詩韻

和非熊韻

又

過深州慈氏院

用李君實韻

繼崔子文韻

繼武善夫韻

鼓琴

扈從羽獵

狼山宥獵

對雪鼓琴

寄冰室散人

寄平陽潤和尚

紅梅二首

吟醉軒

寄西菴上人用舊韻四首

和漁陽趙光祖二詩

自贊

再過太原題單公秀野園

和韓浩然韻二首

張漢臣因入覲索詩

和謝昭先韻

德恒將行以詩見贈因用元韻以見意云

送文叔南行
和馮揚善九日韻

示石州劉企賢
和劉子中韻

李庭訓和予詩見寄復用元韻以謝之

和黃山張敏之擬黃庭詞韻

寄嵩公堂頭同叅
寄移刺子春

寄妹夫人
送侄九齡行

送姪了真行

和少林和尚英粹中山堂詩韻

和武善夫韻
和馮揚善韻

和董彥才東坡鐵杖詩二十韻

卷十一

用張道亨韻
題龐居士陰德圖

和馮揚善韻
和秀玉韻

示從智
答聶庭玉

繼柏岩大禪師韻
和張善長韻

受棲岩彈琴聲法二絕

冬夜彈琴頗有所得

夜坐彈離騷

彈秋宵步月秋夜步月二曲

彈秋水

彈秋思用樂天韻

彈廣陵散終日而成

吾山吟

從萬松老師乞玉博山

寄萬壽潤公禪師用舊韻

寄聖安澄公禪師 寄甘泉禪師謝惠書

送房孫重奴行

從龍溪乞西崑香并方

乙未元日

旦日遺從祖

旦日示從同仍簡忘憂

元日勸忘憂進道 轉燈

錄寄新詩呈冲霄 寄東林

借琴

戲景賢

再用前韻二首

寄景賢

再用知字韻戲景賢

復用前韵戲呈龍岡居士兼善長詩友首二

慕樂天

彈廣陵散

戲劉潤之

用劉潤之韵

卷十二

琴道喻五十韵

彈琴逾時作解嘲

勉景賢

劉潤之館于忘憂門

劉潤之作詩有厭琴聲之句因和之

懷古一百韵寄張敏之

示忘憂

和金城寶宮旭公禪師三絕

再和世榮二十韵寄薛玄之

簡仲文寄詩二十六篇勉和以謝之

又二首

用曹楨韵

怨浩然

從國才索閑：煎茶賦

贈高善長一百韵 再賡仲祥韵寄之

寄金城士大夫

誠之索偈

遺姪淑卿香方偈

為子鑄作詩三十韵

卷十三

楞嚴外解序

心經宗說後序

糠蟹教民十無益論序

釋氏新聞序

屏山居士金剛經別解序

書金剛經別解後 屏山居士鳴道集序

賈非熊脩夫子廟疏

孝義永安寺疏 寶宮寺疏

住玉山開堂出世疏

住東堂出世疏 奉聖寺開堂疏

寶林寺開堂疏 住文壽永寺疏

太原山開化寺疏 重脩先聖廟疏

燕京大萬壽寺化水陸疏

請奧公禪師開堂疏五首

興教寺疏 請東林老人住持疏

請松岩儼公疏 祁州重修宣聖廟疏

安慶織萬佛疏 住山陰院蘇復宿山疏

題萬壽寺碑陰 和公大禪師塔記

萬壽寺上梁文 茶榜

約善長和詩戰書 寄萬松老人書

萬松老人萬壽語錄序

祭姪女淑卿文

和林誠建行宮上梁文

為武川摩訶院創建佛牙塔記

卷十四

法語示猶子淑卿 和潤之韻

贈景賢 寄東林

寄萬壽潤公禪詩師 寄甘泉慧公和尚

遺龍岡鹿尾二絕 和景賢贈鹿尾二絕

中和召景賢飲 請定公住大覺疏

補大藏經板疏

武川摩訶院創建瑞殿疏

請奧公住崇壽院 寄聖安澄老乞藥

信之和余酬賈非熊三字韻

雲漢遠寄新詩因和謝之

德新先生惠然見寄佳製二十韻因和而

謝之

子鑄生朝潤之以詩為壽余因繼其元韻
以遺之

扈從旋師道過東勝秦師席上繼杜受韻之
用梁丰南韻 贈侄正卿

寄張鳴道 送郭仲仁行

送高慶民行 和趙庭玉

贈王玉 周敬之修夫子廟

寄萬壽堂頭乞湖山

寄東林同參 寄簡堂頭

寄孔雀便面奉萬松老師

答倪公故人 繼介丘穆景華韻

繼平陶張材美韻

德柔嘗許柞鞍玉轡且數年矣作詩以督
之督

卜鄰一絕寄鄭景賢

寄岳君索玉博山

雲中重修宣聖廟疏

寄光祖 送德潤南行

再和萬松潤禪師書字韻五首

贈景賢玉澗鳴泉集

丙申元日為景賢壽

景賢作詩頗有思歸意因和元韻以勉之

景賢召予飲以事不果

和景賢召予飲

丙申上元夜夢中偶得

送門人劉德真征蜀

送門人劉復亨征蜀

趙州柏樹頌

黃龍三閨頌

和太原元大舉韻

喜和林新居落成

題新居壁

太原修夫子廟疏

和林建佛寺疏

目錄終

湛然居士文集卷第一



中書令

移刺楚材晉卿

和黃華老人題獻陵吳氏成趣園詩

雪溪詞翰輝星斗紙盡塵蒙詩一首湛然揮墨試
續貂鬚嗚使人難出口丁年彭澤解官去遨遊三
徑真三友悠然把菊見南山暢飲東籬醉重九獻
陵吳氏治荒園成趣為名良可取養高不肯事王
侯閑臥林泉了衰朽今年扈從過秦川可憐尚有
蕭條柳歸計甘輸吳子先麗詞已後黃華手知音

誰聽斷絃琴臨風痛想紗巾酒嗟乎世路聲利人
不知曾憶淵明否

和平陽王仲祥韻

一聖揚天兵萬國皆來臣治道尚玄默政簡民風
純明：我嗣君寬詔出絲綸洪恩浹四海聖訓宜
書紳逆取乃順守皇威輔深仁貪饕致天罰長吏
永良循河表背盟約羽檄飛邊塵聖駕親徂征將
安億兆人湛然陪扈從書劍猶隨身翠華次平水
草木咸生春冰岩上新句文質能彬：冰雪相昭

映珠玉如橫陳詩筆君獨步唐都一逸民聖政固
二三裁物惟平均綜名必核實求儒務求真經術
勿踈廢筆硯常可親竚待寰宇清園丘祀天神選
舉再開闢仲祥當超倫一旦騰達時獻策宜說：

和李世榮韻

聖主題華旦熊羆百萬強兵行從紀律敵潰自奔
忙百谷朝滄海羣陰畏太陽黎歡仰德萬國喜觀
光堯舜規模遠蕭曹籌策長巍然周禮樂盛矣漢
文章神武威兼德徽猷柔濟剛自甘頭戴白誤受

詔批黃我道將興啓吾儕有激昂厚顏懸相印否
德忝朝綱佐主難及聖為臣每願良翠華來北闕
黃鉞討南疆明德傳雙葉寬仁洽萬方九服無不
軌四海願來王兵革雖開創詩書何可忘洪恩溥
曉露嚴令肅秋霜符應千齡運功垂萬世昌綿
延國祚燁：受天祥多士咸登用羣生無敗戕此
行將告老松菊未全荒

和李世榮見寄

雲橫北海西駟驛來天際梅軒真可人新詩遠相

惠其聲若良金其息如芳蕙文艷理無華詞雄言
不侈筆力似黃山驚浪雲奔勢犀象牙角新薑蜂
銜尾細遙想醉啣盃梅鴉清陰翳閑散玉麒麟可
得羈而係吾子卧東山誰治今之世好陳十漸書
毋用六奇計萬里入龍庭何須歎迢遞時方涉大
川舟楫須君濟

和李世榮韻

多謝梅軒不惜春聲詩來寄格清新詞源莫測波
千頃筆力能扛鼎萬鈞憂國心情常悄悄：閑居容

止自申：誰知板蕩中原後蕭洒河東有若人
再用其韻

梅軒相別又三春別後文章與日新不忽散材需
造化好將幽隱入陶鈞我將北海年垂老君卧南
陽志未伸遙想冰魂政無恙一枝迴施隴頭人

又索六經

我愛平陽李世榮一番書史再鐫銘欲令吾子窮
三傳故向君家乞六經簡冊燦然新制度文章宛
爾舊儀刑莫教幼稚室相憶日：求詩到鯉庭

和移刺繼先韻三首

澤民我愧無術畧且著詩鴻慰離索詩書滿載升
金山絃歌不輟踰松漠世上元無真是非安知今
是而非昨連城美玉涅不緇百煉真金光愈燦已
悟真如匪去來自自然胸次絕憂樂斷夢還同世事
空浮雲恰似人情薄尚記吾山舊隱居松風蕭瑟
松花落枕流漱石輕軒車吟烟嘯月甘藜藿春山
寂：春溪深蕭條庭戶堪羅雀而今不得安踈慵
自笑條籠困鷓鴣勉力龍庭上萬言男兒志不忘

溝壑

當年不肯讀三畧獨抱遺經伴閑索流行坎止不
尤人自甘萬里涉窮漠富貴榮華能幾時生死都
來如夢昨千年興廢漚浮沉百歲光陰電飛爍常
笑梁鴻歌五噫竊學榮啓彈三樂未能仁義戢干
戈勉將敦厚懲澆薄近有人從故隱來黃花無限
開籬落問渠林肉與丘糟奚如麥飯而羹藿又聞
麋鹿滿姑蘓阿瞞不復游銅雀塗中曳尾希莊適
江夏沉舟悲禰鴛吾山佳處歸休乎鹿逸平林魚

縱壑

祖道門庭元簡畧兒孫草裏添芒索擬心鷄子過
新羅起念白雲橫大漠迴殊四句有無中元非三
際來今昨大海纖塵一點飛洪爐片雪寒光爍寧
論業障本來空半偈徒誇寂滅樂細切清風非異
事更將明月剗來薄玲瓏四面亦無門克塞十方
絕壁落羅列珍羞渠不食癡人猶自貪藜藿祗圖
龍領摘明珠誰知虎口存活雀坐脫猶迷一色邊
崎嶇鳥道一作路橫秋鷄可笑人間荆棘林死者填

溝空塞壑

和薛伯通韻

滴：秋光溢遠山穹廬寥落酒瓶乾一作塞天空

詩章平淡思居易禪理縱橫憶道安不忿西風霜

葉脫難禁秋雨菊花殘閭山舊隱天涯遠夢裏思

歸夢亦難

鹿尾

鑿與秋獮獵南岡鹿尾分甘賜尚方濃色殷：紅

玉髓微香馥：紫瓊漿韭花酷辣同葱薤芥屑差

辛類桂薑何似檀根蘸濃液邀將詩客大家嘗一作

流匙滑飯
大家嘗

過金山用人韻

雪壓山峰八月寒羊腸樵路曲盤：千岩競秀清

人思萬壑爭流壯我觀山腹雲開嵐色潤松巔風

起雨聲乾光風稍貯詩囊去一度思山一度香

過雲中贈別李尚書

誰識雲中李謫仙詩如文錦酒如川十畝良園君

有趣一塵薄土我無緣舊恨常來春夢裏新吟不

到客愁邊明朝分手天涯去他日相逢又幾年

和裴子法韻

頃觀子法跋白蓮社圖斥淵明攻乎異
端吾子不所學主張名教真韓孟之儔
亞也昔巢由避天下而遠遁堯舜受天
下而不辭以致澤施于萬世名垂于無
窮是知潔已治天下各有所安耳夫清
虛玄默樂天真而自適者也焦勞憂勤
濟蒼生為已任者也二道相反甚于水

炭使堯舜巢由易地則昏然後之出亂
臣賊子窺伺神器狐媚孤兒寡婦扼其
喉以取天下者聞巢由之風亦少知媿
矣然則巢由之功豈可少哉棄享天下
之大樂而且希物外之虛名者豈人情
也耶文中子有言虛玄起而晉室亡斯
豈老莊之罪歟蓋用之不得其宜也以
虛玄之道治天下其猶初寒御單葛也
大夏服重裘自底斃亡豈裘葛之罪哉

昔晉武一統之始不為後世之遠謀何
曾已識之既而禍難繼作骨肉相殘屠
戮忠良進用諛佞雖元氣復生亦不能
善其後矣大廈將頽非一木所能枝獨
淵明何能救其弊哉適丁天地不交萬
物不通君子道消小人道長之時淵明
見幾而作掛印綬而歸結社同志安林
泉之樂較之躒進苟容于小人之側者
何啻九牛一毛耶以淵明之才德假使生

于堯舜湯武之世又安知不與臯夔伊
周並驅爭先哉宣尼有云用之則行舍
之則藏又云進退存亡不失其正者其
惟聖人乎何責淵明之深也余嘗謂否
則卷而懷之以簡易之道治一心達則
擴而克之以仁義之道澤四海寔古今
之通誼也因用子法游姑射元韻以見
意云

達磨一派未西來無限勞生眼未開六朝繁盛已

矣耳西晉風流安在哉自笑中書老僕射用引韵借此字

事佛竊倣王安石公案翻騰舊葛藤林泉准備閑

蹤跡用之勲業垂千秋發揚孔孟誰為儔舍之獨

善樂真覺賦詩舒嘯臨清流豈止淵明慕松菊晉

室高賢十八九君子道消小人用貞夫遠棄利名

酒蘓黃冠世能文詞裴張二相名當時祖道禪林

恣游戲堯風舜德甘噓吹達人不為造物役打破

東西與南北毛吞巨海也尋常出沒縱橫透空色

真如頗與犧易同不動確乎無吉凶湛然信筆書

竊語臨風遠寄綠野翁贈君一句直截處祗要教

君能養素但能死生榮辱哀樂不能羈存亡進退

盡是無生路

和許昌張彥升見寄

真人休運應千載生知神武威中邦杜絕奇技賤

異物連城玉斗曾親撞兵出潼關渡天塹翠華雜

映騶虞懂生民歌舞歎奚後壺漿簞食轅門降偏

師一鼓沐梁下邏騎飲馬揚子江良臣自有魏鄭

輩死諫安用干與逢少微昨夜照平水清河國士

九

可

九

真無雙壯歲游學力稽古攷：繼畧焚蘭缸新詩
寄我有深意再三舒卷臨幽窗安得先生贊王室
委倚嘆憂庶政厖堪笑紛：匹夫勇徒誇巨鼎千
鈞扛何日安車蒲輪詔公入北闕蒲萄佳醞爛飲
玻璃缸

西人蒲萄釀皆貯以玻璃瓶

和南質張學士敏之見贈七首

桃源劉鳳樓蕭鏘冰斲玉峨通宵珠璣錯落照蘭
室龍蛇偃蹇蟠霜綃和我新詩使予起却得瓊瑰
酬木李邊城十載絕知音琴斷七絃鶴亦死而今

得識君姿容胸中鬱結渙然空詩壇君可據上位
筆力我甘居下風筆陣文場寬且綽馳騁看君能
矍鑠學海波瀾千頃陂厭餒經書爛該博幾時把
手瀟湘邊生涯自有壺中天鳴榔一笑舟浮蓮滄
波萬里凝蒼煙

漏沉：竹蕭：蒲團禪定坐終宵古廟香爐無氣
息一條白練如瓊綃性海澄：波不起宛似冰壺
沉玉李庸人泥教不知歸七竅鑿開混沌死雖云
至道絕音容不離

幻

有成真空百尺竿頭更移步

普天匝地生清風大用全提自寬綽將禪教交鋒何
矍鑠醒時呼起夢中人徧濟含生其利博本無內
外與中邊踏破威音劫外天污泥深處種青蓮昇
平世界沉烽煙

雨蕭：風蕭：對牀談道徹清宵欲畫太虛無面
目慎無落筆污氷綃人間平地風波起反笑於陵
噉糟李富貴榮華都幾時迷者孰能死前死須彌
芥子云相容神通妙用不空：劫火洞然渠不壞
紙鳶能禦毘藍風龍象騰驤何綽：迴視駑駘空

矍鑠悟時一語透塵沙安用才學恃宏博維摩方
丈傍無邊箇中無礙散花天迴途穩：步雙蓮得
玄鳥道橫晴煙

院深：籟蕭：伽陀舒卷度蘭宵若解荷心繫珠
露便能天外裁雲綃大覺空生一漚起悟斯獨有

屏山李

屏山居士李之純嘗作楞嚴別解為禪客所重

穿透楞嚴第一機

方信菴中人不死个裏家風針不容夢回六趣大
千空道人受用本無盡明月薄剗細切風香象朋
從威綽：獨跳狂禪空矍鑠悲心起處了無私濟

度塵沙恩廣博不涉中流離兩邊下無大地上無
天無人無佛臺無蓮淒：碧草生芳煙

雲飄：水蕭：一燈香火過閑宵神清半夜不成
夢書帷風細揚微綃運應昌期王者起自愧文章
翰杜李竊同居易了無生誰羨葛洪學不死一榻
蒲團膝容足脩然文室塞虛空翻騰密藏明佛日
淘汰機緣振祖風丹鳳冲霄何綽：失曉獸即徒
矍鑠人間取舍本千差世路窮通如六博幽人嘯
詠水雲邊劫外光風自一天閑來石上裁紅蓮水

無波浪火無煙

風蕭：雨蕭：蕭：風雨悲涼宵籬菊殘英漬黃
玉林風脫葉飄紅綃幽人展轉凌晨起邂逅門前
逢短李殷衰聞道有三仁欲說九疇君不死穹廬
相語為從容懸河誰辨能談空風神蕭散野鶴立
照人玉樹臨秋風落筆新詩一揮綽不似武人誇
矍鑠銀鈎筆力掩二王照夜連城肯輕博他年相
約秋山邊秋江一派連秋天閑聽菱女歌採蓮輕
舟一醉眠秋煙

衣龍鍾鬢飄蕭穹廬停燭坐寒宵翰林遣介贈佳
句薑苾鳥跡書生綃既倒狂瀾再扶起昔有謫仙
元姓李今日龍庭忽見君誰道當年太白死文章
氣象難形容騰龍翥鳳游秋空筆力萬鈞神鬼泣
雷轟電掣驅疾風餘裕喜君能綽：鼓舞為君子
矍鑠解讀奇字笑楊雄識壓張華能物博與君握
手天山邊舉觴相屬望青天他年雅社結白蓮林
泉杖履衝雲烟

和張敏之鳴鳳曲韻

寫蛟螭咳珠璣英姿元棟一作碧梧棲彬：文彩
自光輝有材希晉用矢志欲劉依薦君誰肯惜嘘
吹供才大筆識君稀鯤游翻海震鵬舉翥天飛問
渠蟾窟攀仙桂何似冥山破鐵圍人間強假認假生
死世上本無真是非濃歡殢春夢晚景歎殘暉夢
斷日沉真可笑輸却禪人向上機遮眼閑經卷蒙
頭壞衲衣息念蝸凡聖無心應順違震風威橫擔
柳標萬山歸

和孟駕之韻

平陽聞有鄒人姓封書上我僅萬言討論墳典造
極致商權古今窮深源文章高出蘓黃輩英雄不
效秦儀志：圖仁義濟元：冀北無雙瑚璉器淪
落塵埃德不孤梅軒結友天一隅我惜鹽車困騏
驥騰驤未得踏亨塗瓦牖繩樞甘儉薄詩腸雷轉
克糟粕他日佳聲聞九天富貴之來不得却丁年
黃卷樂平生鄉閭一諾千金輕滄浪清處閑濯纓
才名高價如連城筆下有神詩有眼五車書史窮
編簡一舉高登甲乙科曾對闔闔持手啟天兵一

鼓下睢陽旌旗整：陣堂：玉石俱焚君子隱北
度來依日月光徒步黃塵千里遠猶抱遺經究微
婉天產昂藏一丈夫三十未遇非為晚聞望卓冠
儒林叢燦然星宿羅心胸馳驟大方孰並駕絕塵
奔逸其猶龍君似錕鍔王可切錕鍔不是尋常鐵
利穎神鋒人未知寶匣空閑三尺雪何時搜出蟄
龍鞭一聲霹靂轟青天歲旱須君作霖雨拔茅進
用其茹連天子明堂求國棟鵬飛全藉天風送鳳
池波暖百花新詠游不作江湖夢

和陳秀玉縣梨詩韻

石門九月西風高梨出于石門縣梨萬樹金垂梢
 清溪號秀玉道千里携贈我藤花縣初發香盈包謫仙
 風度清谿亞春風曾飲梨花下不用紅粧唱採蓮
 醉望青天歌二雅我有斗酒清且醇同君薦此載
 黃新初見分香剖金卵更看削玉飛霜鱗縹葉紫
 條何足語夜光安可同魚日文園塵濁政難禁咀
 嚼冰雪削香玉

和龔先生韻

東垣士大夫以興王聖德詩見寄用酬

雅意

運出三爻兌

以太一推之而得

龍飛九五乾要荒歸化育

豪哲入陶甄有幸恩涵海無私德應天偏師收百

越一鼓下三川天子能身正元戎不自賢重光道

同軌累聖德相睽策決九重內功歸萬乘權羣雄

哀稽顙多士喜磨肩輔弼規左右丞疑贊後前開

夷逾漢武平叛跨周宣冠帶通窮域車書過古堦

覽機雲母障受諫翠華輯款塞諸蠻洞來朝百濟

船降王趨陞闕強虜列氓編爭掃妖氛變潛消烽
火煙詞臣游館閣幽隱起林泉堯舜文明盛商姬
禮樂全九成合古奏二雅詠新篇世卜千年世年
斯億兆年宗親成蒂國祚等瓜綿聖政與人頌
天威萬古傳勉旃封禪事不用策安邊

湛然居士文集卷第二

和百拙禪師

十方世界是全身氣宇如王絕比倫與奪機中明
主客正偏位裏辨君臣眠雲臥月辭三島鼓腹謳
歌預四民了了時誰可曉閑人元不是閑人

題平陽李君實吟醉軒

古晉君實世所知幽軒佳號兩相宜長鯨海量嫌
甜酒彩筆天才厭小詩七步賦成文燦爛千鍾不
惜錦淋漓一作十何當杖屨游平水得預君家吟

醉時

從聖安澄老借書

湛然寢語寄西堂此箇因緣果異常陽老十門剛
結案欽公五派強分賊劍逢劍客須拈出詩遇詩
人何必藏居士病多諳藥性聖安得效不傳方

題西菴所藏佛牙二首

殷勤敬禮辟文牙緣在西菴居士家午夜飛光驚
曉月六時騰焰燦朝霞一番頂帶因初結七轉生
天果不差庸士執方猶未信防風安得骨專車

旃檀奩裏貯靈牙來自中天尊者家瑩色冷奪秋
夜月真光明射晚晴霞本同舍利元無別疑是金
剛事有差猶憶廣長舌左右咀嚼風雨震雷車

和移刺繼先韻二首

舊山盟約已愆期一夢十年盡覺非瀚海路難入
去少天山雪重雁飛稀漸驚白髮寧辭老未濟蒼
生曷敢歸去國遲：情幾許倚樓空望白雲飛
不事王侯懶屬文時危何處覓元勳他年收拾琴
書去笑傲林泉我與君

過陰山和人韻

陰千山里橫東西秋聲浩：鳴秋溪猿獠鴻鵠不
能過天兵百萬馳霜蹄萬頃松風落松子鬱：蒼
蒼映流水天丁何事誇神威天台羅浮移到此雲
霞掩翳山重：峰巒突兀何雄：古來天險阻西
域人烟不與中原通細路縈紆斜復直山角摩天
不盈尺溪風蕭：溪水寒落花空山人影寂四十
八橋橫雁行勝游奇觀真非常臨高俯視千萬仞
令人凜：生恐惶百里鏡湖山頂上旦暮雲煙浮

氣象山南山北多幽絕幾派飛泉練千丈大河西
注波無窮千溪萬壑皆會同君成綺語壯奇誕造
物束手神無功山高四更終吐月八月山峰半埋
雪遙思山外屯邊兵西風冷徹征衣鐵

羸馬陰山道悠然遠思寥青巒雲靄：黃葉雨蕭
蕭未可行周禮誰能和舜韶嗟吾浮海粟何礙八
風飄

八月陰山雪滿沙清光凝目眩生花挿天絕壁噴
晴月擎海層巒吸翠霞松檜叢中疏吠畝藤蘿深

處有人家橫空千里雄西域江左名山不足誇
陰山奇勝詎能名斷送新詩得：成萬疊峰巒擎
海立千層松檜接雲平三年沙塞吟魂遯一夜羶
穹客夢清遙想長安舊知友能無知我此時情

再用前韻

河源之邊鳥鼠西陰山千里號千溪倚雲天險不
易過驪駒踏蹶追風蹄簽記長安五陵子馬似游
龍甲如水天王赫怒山無神一夜雄師飛過此盤
雲細路松成行出天入井實異常王尊疾驅九折

坂此來一顧應哀惶崢嶸突出峰峭直山頂連天
終咫尺楓林霜葉聲蕭騷一雁橫空秋色寂西望
月窟九譯重嗟呼自古無英雄出關未盈十萬里
荒陬不得車書通天兵飲馬西河上欲使西戎獻
馴象旌旗蔽空塵漲天壯士如虹氣千丈秦皇漢
武稱兵窮拍手一笑兒戲同塹山陵海匪難事剪
斯羣醜何無功騷人羞對陰山月壯歲星：鬢如
雪穹廬展轉清不眠霜匣閑殺鍬鋸鐵

復用前韻唱之

天涯流落從征西，寒盟辜負梅花溪。昔年學道頗
得趣，魚兔入手忘筌蹄。殘編斷簡披莊子，日須
當誦秋水誰知海。若無津涯河伯源，流止於此
人。間醬缶紙數重，太玄強草啗楊雄。高臥蒿萊傲唐
室，清風千古獨王通。曲者自曲，直者直，何必區區
較繩尺。一筆劃斷是非萬事都忘，樂岑寂功名
半紙字。幾行競羨成績書，太常只知牢筮饗芻豢。
不思臨刃心悲惶，何如打坐蒲團上。泰透昇平本
無象，一餅一鉢更無餘。容膝禪庵僅方丈，從教人

笑徹骨窮生涯。元與千聖同鳥道，雖玄功尚在不
如行取無功。歸來踏破澄潭月，大冶洪爐飛片
雪。且聽石女鳴巴歌，萬里一團無孔鐵。

用前韻送王君玉西征二首

湛然送客河中西，西域城名也乘興何妨過虎溪。清茶

佳果饒行路，遠勝濁酒烹駝蹄。結交須結真君子，
君子之交淡如水。一從西域識君侯，傾蓋交歡忘
彼此。當年君臥東山重守雌，默元知雄五車書
史。豈勞力六韜三畧無不通，詩詠珠璣無價直青

囊更有琴三尺奉命西來典重兵不得茅齋樂真
寂魚麗大陣兵成行：師布置非尋常先生應詔
入西域一軍駭異皆驚惶武皇習戰昆明上欲討
昆明致犀象吾皇兵過海西邊氣壓炎劉千萬丈
先生一展才畧窮百蠻冠帶文軌同威德洋：震
天下大功不宰方為功隱居自有東山月風拂松
花落香雪退身泰到未生前方信秤鎚元是鐵
先生應詔將征西湛然送客涉深溪徘徊一舍未
忍去兵車暫駐天駒蹄猶憶今春送君子桃李無

言映流水寒暑推遷奈老何秋風革律重來此閑
山險僻重複重西門雪恥須豪雄定遠奇功正今
日車書一混華夷通先生純孝如天直豈為直尋
而枉尺功成莫戀聲利場便好回頭樂玄寂故山
舊隱松千行奇峰怪石元異常前日盟言猶在耳
猿鶴思怨恐悲惶我擲直鈎魚不上須信游鱗畏
龍象冥鴻一舉騰秋空誰羨文章光萬丈道兮人
作非天窮區：何必校異同語默行藏在乎我退
身奚論無成功安東幸有閭山月萬頃松風萬山

雪收拾琴書歸去來修心須要金成鐵

用前韻感事二首

稱斤甘薺賣京西誰信無人採五溪鵬異衆禽全
六翮麟殊凡獸具五蹄昔年學道宗夫子盈科後
進如流水螫龍猶未試風雷萍泛蓬飄而至此縕
袍無分百結重不學亂世姦人雄忘憂樂道志不
二守窮待變：則通歲寒松柏蒼：直摩雲直待
高千尺桃李無言蹊自成此君冷淡人何寂生平
恥與噲五行杜門養拙安天常澤民致主本予志

素願未肅予恐惶否塞未能交下上何日亨通變
爻象不圖廊廟為三公安得林泉叅百丈居士身
窮道不窮庸人非異是所同筆頭解作萬言策人
皆笑我勞無功流落遐荒淹歲月贏得飄蕭雙鬢
雪謀生太拙君勿嗤不如嗣宗學鍛鐵

金烏日：東飛西泊：綠水流長溪流波一去不
復返逐日恨無八駿蹄窮理達生獨孔子歎夫逝
者如斯水歲不我與其奈何兩鬢星：尚如此曩
時鑿破藩垣重澤民濟世學英雄風雲未會我何

往天地大否途難通霜匣神劍蒼龍直切玉如泥
長數尺利器深藏人未知豐城埋沒神光寂讀書
一目下數行金石其心學王常學術忠義兩無用
道之將喪予憂惶有意攀龍不得上徒勞牙角拔
犀象唯思仁義濟蒼生豈為珍羞列方丈輩歎陋
巷甘孤窮鴻鵠安與燕雀同天與之才不與地反
令監子成其功安得光明依日月功名未立頭如
雪問君此錯若為多使盡二十四州鐵

過濟源和香山居士韻

覃懷勝游地濟瀆垂名久忽見樂天吟笑我輸先
手麗詞金玉振老筆風雷走乘興試續貂啓我談
天口平湖湧泉注清涼瑩無垢憑檻瞰連漪風髯
塵抖擻龍孫十萬竿蒼蘚濃陰厚沁水濟源東天
壇王屋右秀色已可食何須杜康酒步、搃堪詩
佳篇如素有賡鼎淡相對獨有龍岡叟亭上幾徘徊
斜陽西入酉晚年歸意切對此空沉首何日遂

初心營居碧林後

一作
豈材

和裴子法見寄

人生都幾何半被功名役一旦燕山破西行過千
驛顛沛不違仁先難而後獲鷄雛捐腐鼠烏鳶其
勿嚇危從出天山從容游大石琴書澹相對尚未
忘丘索前歲入關中戈兵克商號明詔典蘭省自
愧承深責秦隴成劍灰京索空陳迹長河尚濁流
南山自濃碧把酒酌青天興亡弔今昔長安非衣
君壯年學問積天上玉麒麟英才可珍惜詩魂素
月高飲量滄溟窄清談咳珠玉便腹竒經籍服君
百韻詩謝子萬言策易道已變屯世爻當應革淮

陰正虛襟左車宜籌畫須要蓮峰手乾坤再開闢
昂藏綠野翁真我龍門客

用李德恒韻寄景賢

牢落十年危御營瑤琴忘盡水仙聲酷思詩酒閑
中樂見說干戈夢裏驚林下因緣千古重人間富
貴一錢輕此身未退心先退獨有龍岡識我情

過天聖和王輔之四首

天縱吾君大聖人天兵所指弭烟塵三齊電掃何
須勦六國雷驅不用秦誅佞未聞曾請劍劾奸曾

官試埋輪伴食黃閣空無輔自笑龍鍾一老臣
六師嚴駕渡長河師不留行誰敢何千里旌旗翻
錦浪一聲金鼓震寒波敗亡誰道三仁在康城空
傳五子歌唾手要荒歸一統漢唐鴻業未能過
積年叨祿領台司位重才微甚不宜地上流錢慚
晏筭樽前決勝愧良帷過寶聲聞傳人口似直愚
忠結主知三徑荒涼松菊在他時舍此復何之
愁老先生本素臣洪才大筆力千鈞沽名不築傳
巖版賈世誰垂渭水綸舟泛五湖希范蠡腰懸六

印笑蘓秦韋編三絕耽犧易蕭散風神真隱人

槐安席上和張梅韻

甘薺五溪人不採西京高價賣秤斤君我淪落羞
看我：亦飄零懶問君人遠空殘眉上黛愁深不
整鬢邊雲誰憐古戍寒窗下新樣梭成織錦文

思親有感二首

游子棲遲久不歸積年溫清闕慈幃囊中昆仲親
書帖篋內萱堂手製衣黃犬不來愁耿耿白雲空
望思依：欲憑鱗羽傳安信綠水西流雁北飛

伶仃萬里度西陸，壯歲星、兩鬢絲。白雁來時，思北闕黃華開後，憶東籬可憐。游子投營晚，正是孀親倚戶時。異域風光恰如故，一銷魂處，一篇詩。

思友人

落日蕭蕭，萬馬聲東南。回首暮雲橫，金明蘭友音書絕。玉軫朱絃，塵土生十里。春風別野店，五年秋色到邊城。雲山不礙，歸飛夢夜，隨風到玉京。

贈李郡王筆

管城從我自燕都，流落遐荒萬里餘。半札秋毫裁

翡翠一枝霜竹，剪瓊瑤鋒端，但可題塵景。筆下安能畫太虛，聊復贈君為土物。中書休笑不中書。

王嘗為遼西執政

寄雲中卧佛寺照老

像教中微祖，意沉虛。能嫡子起予，深看經，不怕牛皮透。公見闍藏教故云着眼常聽露柱吟，行道權居卧佛寺。活機特異死禪心，憑君摘取空華實。好種人間

無影林

寄平陽淨名院潤老

昔年平水便相尋握手臨風話素心刻燭賦成無
字句按徽彈徹沒絃琴風來遠渡晚潮急雨過寒
塘秋水深此樂莫教兒輩覺又成公案滿叢林

贈雲川張道人

雲川道士有詩聲刻篆雕虫醉未醒素扇自甘贖
碧笠因西人奪笠渠以扇贖之故云玄鶴不肯挽黃庭春秋榮悴
悲椿木晦朔生凋笑瑞莫何似廊開真日月區
燭火任熒：

贊李俊英所藏觀音像

白衣大士足威神蓮智興悲詎可陳金色界中垂
萬臂碧蓮花上露全身鎮州鑄就金雞似天竺攜
來玉未真不識觀音真面目燕吟鶯語過殘春

題西菴歸一堂

搏霄元師築西庵于廳事之隅以舍沙
門建歸一堂置三聖廟貌屏山居士有
云卷波瀾于聖學之域徹藩籬于大方
之家其搏霄之謂乎偶得訖道韻詩錄
呈諸士大夫幸希光和仍請西菴上人

書之楹棟間為他時林下清話張本云
三聖真元本自同隨時應物立宗風道儒表裏明
墳典佛祖權實透色空曲士寡聞能異議達人火
觀解相融長沙賴有蓮峰掌一撥江河盡入東

和景賢還書韻二首

居士今年又出閑琴書真味伴子閑簡成草畧初
無意語闕治擇誤犯顏漆水自慚貽口實龍岡却
得破詩慳衰翁幸乞贖前過一炷清香論八還
淵明幽隱掩柴閨琴已無絃人亦閑靜倚書窗獨

寄傲笑觀庭樹自怡顏五音格外聲何限百草頭
邊法不慳蠹譜斷絃無用處因風得寄詩還景賢

索絃譜故
有是句

外道李浩求歸再用韻示景賢

自從一箭透重關觸處忘緣觸處閑莫問羔裘橫
毳袖從教華髮映蒼顏水聲說法起予甚山色呈
機不我慳寄客天涯樂如許問渠何必更南還

外道李浩和景賢霏字韻予再和呈景賢

緣劃斷已忘機布鼓徒敲和者稀中隱強倍人

事過禪心不與世情違昔年勲業真堪笑舊日家
山懶欲歸我愛北天真境界乾坤一色雪花霏

和楊居敬韻二首

自愧才術草芥微偶然千載遇明時唯希一統王
家義何暇重思晁氏危仁義且圖扶孔孟縱橫安
肯傲秦儀行看堯舜澤天下萬國咸寧庶績熙
詔下龍庭萬國歡野花啼鳥總欣然熙朝龜卜符
千億聖主龍飛第一年至道變通皆有數浮生富
貴本由天誰人得似楊公子傲世高吟數百篇

過天寧寺用彥老韻二首

十年不得舞衣班行盡天涯萬里山黃閣伴食空
皓首蒼生未濟謾胡顏新朝兵革征方急舊隱烟
霞尚未還衮、簿書塵滿眼衰翁奚暇謁松關
今日從征亦偶然天寧遐想思懸、貪縈不得還
山去須信衰翁未苦賢

過天山周敬之席上和入韻

淪落天涯數十秋區、班筆早年採薇山下慵
拈草洗耳溪邊懶飲牛振武揚威難射虎忘機絕

慮不驚鷗當年射策承明殿未必輕：輸呂籌
憇馬居延酒半醺寂寥寒館變春溫未能鵬翼騰
一溪海不得鴻音過雁門千里雲烟青塚暗一天風
雪黑山昏天涯幸遇知音士仔細論文共一樽

和人韻

四海皇：無所歸夢魂常遠故園飛海山不羨學
居易華表留言笑令威毛落難尋蘓子節囊空猶
有老萊衣靜思二十年間事擾：紛：盡覺非

丁亥過沙井和移刺子春韻二首

科登甲乙戰文圍吾子才名予獨知巢許身心君
易樂蕭曹勲業我難為有恒得見寔無憾知己相
逢未忍離携手河梁重話舊胡然羞和子卿詩
行藏俯仰且隨時緼袍懷珠人未知燕雀既羣難
獨立鳳凰不至擬胡為可嗟世態頻更變何奈人
生多別離莫忘天山風雪裏湛然駝背和君詩予
至沙井乘牛車過前路跨駝方達行在偶得隔句
一聯云牛車馳傳頗異相如駟馬車駝背吟詩不
侶竹林七賢
畫成有是句

再過晉陽獨五臺開化二老不遠迎

高岡登陟馬玄黃落日西風過晉陽道士歡迎捧
林果儒冠遠近繫壺漿五臺強健頭如雪開化輕
安鬢未霜誰會二師深密意趙州元不下禪牀

過清源謝汾水禪師見訪

汾水禪師箇裡人杖藜尋我過清源半盃紅果情
何厚一盞清燈話細論山水景中君得意兵戈堆
裏我銷魂他年相約雲深處松竹蕭蕭靜掩門

王屋道中

勝克河中號令齊神兵入自太行西昏昏烟鎖天

壇暗漠：雲埋王屋低風軟却教冰泛水一作冰
寒輕還使雪成泥行吟想像覃懷景多少梅花坼

玉溪

湛然居士文集卷第三

和斛天秀韻

猛士彎弓挽六鈞長驅入汴政施仁前朝運謝山
河古聖世時亨雨露新未過自甘焚綠綺知音不
必惜陽春朝廷將下搜賢詔莫戀烟霞老此身

用萬松老人韻作十詩寄鄭景賢

檀廬同抵足談道月西沉議論馨香發文章蘊藉
深正便邊氏腹不上謫仙襟自得逍遙意何須泊
鄧林

豐城三尺劍神麗尚埋沉確論穿楊的生機劈筭
深天真貯便腹浩氣塞征襟佇看澤天下清風冠
士林

破船無滲漏流水不能沉露瑣青山秀花藏古徑
深白雲陪野興晴月洗煩襟絕後重甦息飛花枯
木林

隱：三星出依：片月沉鶴飛遼海濶猿嘯楚山
深柳色雲霓袖蘆花雪滿襟普天秋意露一葉墜
梧林

玄珠羅帳密寒鼎篆烟沉翡翠踈簾隔琉璃古殿
深本來無垢體何必拂塵襟斫却蟾中桂方成般
若林

鰲餌不須針聊將玉線沉須彌猶未大渤海豈為
深悟後牛穿鼻迷時馬有襟弋人何所慕幽鳥在
嵩林

箇事不容針迷途自陸沉西天三步遠東海一盃
深涼月盛玄鉢輕雲剪素襟曹溪無一滴波浪沸
禪林

流波無放蕩死水慕平沉機盡方鈞隱綸室正鈞
深赤心休惜口青眼好開襟誤投溪中月人；侶
翰林

夢覺方知錯生平自屈沉滌塵千澗外遺照亂松
深柳帶縫穿屐荷衣綴破襟寂寥選佛味何侶宴
瓊林

漁家何是好乘興一鈞沉路僻蒼苔滑舟橫古渡
深小晴掀翳笠微雨整蓑襟夢斷知何處寒潮沒
晚林

萬松老人真贊

昔無盡居士題恒岳廟云聰明厭血食
悔不值元珪茲因恒州四衆敦請萬松
老人師不行且以頂相付之門弟湛然
居士再拜而贊之曰

每恨恒山不逢珪老四衆同緣萬松親到

萬松老人琴譜詩一首

萬松老人索琴并譜予以承華殿春雷
及種玉翁悲風譜贈之

良夜沉：人未眠桐君橫膝叩朱絃千山皓月和
煙靜一曲悲風對譜傳故紙且教遮具眼聲塵何
礙污幽禪元來底許真消息不在絃邊與指邊

寄曲陽戒壇會首大師

四衆飛書請萬松不消彈指已成功燈籠證據真
談辨露柱承當不耳聾梵行細推無處所戒壇須
信塞虛空無為濟物誰能悉惟有東垣月拂風

和王巨川韻

聖駕徂征率百工貌貅億萬入關中周秦氣焰如

雲變唐漢繁華掃地空灞水尚存官柳綠驪山唯
有驛塵紅天兵一鼓長安克千里威聲震陝東

釋奠

王巨川能於灰燼之餘草創宣聖廟以
己丑二月八日丁酉率諸士大夫釋奠而
奠之禮也諸儒相賀曰可謂吾道有光
矣是日四衆奉迎釋奠遺像行城歡聲
沸：僕皆預其禮作是詩以見意云

多士雲奔奠上下釋奠遺像亦行城旌幢錯落休

迷色鐘磬鏗鏘豈在聲宣父素心施有政能仁深
意契無生儒流釋子無相諷禮樂因緣盡假名

和移刺子春見寄

四海皇、足俊賢浪陪扶日上青天且圖約法三
章定寧羨浮榮六印懸潤色吾術惟恐後扶持天
下敢為先過情聲聞予深恥可笑虛名到處傳
生遇干戈我不辰十年甘分作俘臣施仁發政非
無據論道經邦自有人聖世規模能法古汚俗習
染得惟新英雄已入吾皇彀從此無人更問津

且喜朝廷先正名林泉隱逸摠公卿羣雄一遇風
雲會萬國咸觀日月明丹鳳因應潛亂世白麟自
合出升平竚看一作快北闕垂溫詔夜半前席進

賈生

舉世寥、識我誰未學弓矢愧由基衰年有幸彈
三樂盛世無才出六奇棄物且存光海量散才獲
用荷天私微臣自忖將何報信筆裁成頌德詩
邂逅沙城識予初天山風雪醉吟餘文章光焰君
堪羨節操儀刑我不如麴蘖鄉中前進士

渠有詩云老去

惟耽麴蘖春風波堆裏老中書他年歸去無相棄
故有是句
同到閭山舊隱居

寄移刺國寶

昔年萍迹旅京華曾到風流國寶家居士為予嘗
喫素先生愛客必烹茶明窗揮麈談禪髓淨几焚
香頂佛牙回首五年如一夢：中不覺過流沙公所
藏佛牙
甚靈異

寄景賢十首

龍岡能覓淡中歡心與孤雲自在閑琴阮生涯事

松菊詩書活計老丘山叩絃聲自無中出得句詩
從天外還踏破化工無盡藏閑人受用亦非慳
龍岡漆水西交歡縱意琴書做老閑未得一言安
海內已輸三箭定天山肯容詩思妨心慧豈使聲
塵礙耳還信手拈來無不是清風明月有何慳
人間聚散妄悲歡何似林泉遊世閑十載殘軀游
瀚海積年歸夢遶閭山先人舊居也空岩猿鶴招予往
還駕琴書伴我還多謝龍岡憐老隱新詩酬酢路
無慳

絃索詞章且助歡羨渠臨老得安閒琴歌愛子彈
秋水詩句服君仰泰山聲古調淒真可聽辭雄韻
險實難還先難後易今方省居士襟懷本不慳
宦情觸處不成歡未得浮生半日閑薦鴟有書慙
北海澤民無術愧東山琴書習氣終難忘蠟麓荒
園怎得還卜隱龍岡成老伴肯教詩書筆頭慳
廣文憐我失清歡每著琴書伴我閑痛憶金聲并
玉振酷思流水與高山詩壇吝嗇猶深閉琴債遷
延未肯還一狀如今都領過龍岡須破兩重慳

琴書吾子盡幽歡隨分消磨日月閑佳句典刑傳
四海水仙聲韻徹三山每慚木李投君去却得瓊
瑤報我還從此龍岡開廩藏徽邊筆下更無慳
世間何事最為歡爭似能偷忙裏閑得過夜晴須
對月每逢春盛強登山無錢沽酒和衣典一作和
琴典
圖和琴詩倍本還綺語千章琴百曲莫教風月笑
人慳

我與先生久已歡而今皆願老來閑同舟載棹醉
觀月並轡騎驢飽看山綺句綴成連譜換純音彈

了着詩還琴詩此際慵拈出可怨龍岡為紙慳
閑人閑裏竟閑歡未得迴光未是閑叩道一螺斟
巨海叅玄千里望恒山但能透鏃穿三句何必拖
泥辨八還箇事人：皆富有含生休怨釋迦慳

和景賢韻三首

龍岡便腹盡詩書落筆雲烟我不如一紙安書思
塞雁十年歸興憶鱸魚託身醫隱君謀妙委跡儒
冠我計疎何日相將歸故里翠微深處卜幽居
龍岡走筆和清篇出示珠璣寄湛然字古意新看

不足挑燈寒雨夜無眠

摩撫瘡痍正似醫微君孰肯拯時危萬金良策悟
明主厚德深仁四海施

和李世榮韻

異同誰定據俯仰且隨緣居士難聯句梅軒却解
禪無雲皆皓月何處不青天話到忘言處迢迢夜
不眠

和景賢十首

龍岡居士得賢君聞道賢君憎所聞節操鷓鴣捐

鼠餌風神野鶴立雞羣只知輔嗣能談易誰識相
如善屬文擬欲贊君言不盡區：微意見詩云
天下奇才鄭使君清名不使世人聞五車書笥獨
窮理三峽詞源迥出羣未得開懷重話舊常思抵
足共論文自從一識龍岡老餘子紛：不足云
一聖龍飛敢擇君嗟予潦倒尚無聞蒼生未識鴻
鵠志皓首甘游麋鹿羣黃雀已歸奚望報彩禽飛
去不能文龍岡特慰孤窮悶時有新詩報我云
試我新詩寄鄭君無顏談道不聞：治心更索捐

中道養性渾如鞭後羣玄語諄：非是說真君歷
歷不閑文儒生束教嫌虛誕得意忘言孔子云
文章自愧不如君敢以玄言賣所聞有道居塵何
異俗無心入獸不驚羣重玄消息無多子半紙功
名直幾文回首死生猶是幻自餘何足更云：

換韻

十年不遇一相知恰識龍岡恨見遲常愛箕山能
洗耳何堪鄰舍傲顰眉榮枯貴賤難逃數用舍行
藏自有時心事紛：無處說援毫閑和景賢詩

感事

萬里西來過月氏初離故國思遲：人情漸愧三
鬚面人世梳粧半額眉田上野父空歎鳳澤邊漁
父不傷時龍岡本具英雄眼幾倩東風寄我詩

讀唐詩有感

林甫滔天聖不知三郎深恨識卿遲塵中妃子春
羅襪錢上開元指甲眉七夕殿中新巧夜三秋原
上摘瓜時長天忽見飛來雁垂淚空吟李嶠詩
李楊相繼領台司兵起漁陽禍已遲向惜正憐花

解語而今空憶柳如眉心傷桃李初開夜腸斷梧
桐半落時試問宮中誰第一三郎猶憶謫仙詩
往來寒暑暗推移下手修行猶太遲迷後徒勞常
捏目悟來何必更揚眉宗門淘汰宜窮理道眼因
緣貴識時祗為龍岡心猛利湛然剛寫不言詩

又一首

龍岡醫隱本知機薰蕕同盤辨者稀廊廟虛名無
意戀林泉夙願與心違羨君綽：有餘裕笑我皇
皇無所歸尚憶當年垂釣處一江烟雨靜霏：

和王君玉韻

王孫蒙饋飯靈輒未扶輪自笑孤窮客誰憐衰病
身黃沙黃餘里白髮一孀親腸斷山城月徘徊照
遠人

過東勝用先君文獻公韻二首

荒城瀟洒枕長河古寺碑文半滅磨青塚路遙人
去少黑山寒重雁來多正愁曉雪冰生硯不忽西
風葉墜柯偶憶先君舊游地潛然不奈此情何
依然千里舊山河事改時移隨變磨巢許家風烏

可少蕭曹勲業未為多可傷陵變須耕海不待碁
終已爛柯翻手榮枯成底事不如歸去入無何

過夏國新安縣

時丁亥九月望也

昔年今日渡松關

西域陰山有松關

車馬崎嶇行路難潮

海潮噴千浪白

一作千里雪

天山風吼萬林丹氣當霜

降十分爽月比中秋一倍寒回首三秋如一夢
中不覺到新安

過青塚用先君文獻公韻

漢室空成一土丘至今仍未雪前羞

一作可惜水姿瘞古丘佳

人猶自 夢中羞 不禁出塞涉沙磧最恨臨軒辭冕旒幽怨
半和青塚月閑雲常鎖黑河秋滔：天塹東流水
不盡明妃萬古愁

過青塚次賈搏霄韻

當年遺恨歎昭君玉貌冰膚染塞塵邊塞未安嬪
悔虜朝廷何事拜功臣朝雲雁唳天山外殘日猿
悲黑水濱十里東風青塚道落花猶似漢宮春
延壽丹青本誑君和親猶未歛胡塵穹廬自恨嬪
戎主泉壤相逢愧漢臣玉骨已消青塚底香魂猶

遶黑河濱愁雲暗鎖天山路野草開花也怨春

再用韻以美搏霄之德

去歲雲川始見君澄：胸次淨無塵斗南第一珪
璋士冀北無雙柱石臣

公領師職故云

萬頃雲松斜谷外

千竿水竹渭河濱他年歸隱重相訪無影林間別
有春

再用韻自歎行藏

箕裘家世忝先君慚愧飄蕭兩鬢塵自古山河歸
聖主從今廊廟棄愚臣常思臥隱雲鄉外肯做行

吟澤國濱驛使不來人已老江南誰寄一枝春

再用前韻感古

宣尼名教本尊君賊子干常犯蹕塵鹿失羸秦無
令主鼎分炎漢有能臣宋朝南渡尤天水遼室東
傾罪海濱回首興亡都莫問不如沉醉瓮頭春

再用韻唱玄

重玄不惜說知君又恐重添眼裏塵臨濟唱中分
主客洞山言下辨君臣持鈴普化搖空裏垂釣華
亭汶水濱勘破這般閑伎倆鐵林花發劫前春

過雲川和劉正叔韻

西域風塵汗漫游十年辜負舊漁舟曾觀八陣雲
變速親見三川席卷收烟鎖居延蘓子恨雲埋青
塚漢家羞深思籬下西風醉誰羨班超萬里侯

過雲中和張伯堅韻

一掃氐羗破吐渾群雄悉入北朝吞自憐西域十
年客誰識東丹八葉孫射虎將軍皆建節龍飛天
子未更元我慙才畧非良器封禪書成不敢言

過雲中和張仲先韻

致主澤民本不難言輕無用愧偷安十年潦倒功
何在三徑荒涼盟已寒巖下藏名思傳說林間談
道謁豐干挂冠神武當歸去自有夔龍輔可汗

過雲中和王正夫韻

白雪陽春寡和音誰人解聽沒絃琴詩書事業真
堪笑刀筆功名未可欽不信西天三步遠焉知東
海一杯深元來佛法無多子何必嵩山謁少陵

過白登和李正之韻

十年淪落困邊城今日龍鍾返帝京運拙不須求

富貴時危何處取功名騰驥誰識孫陽驥俊逸深
思支遁鷹客裏逢君贈佳句知音相見眼偏明

過天城和靳澤民韻

西征扈從過龍庭誤得東州浪播名琴阮因緣真
有味詩書事業拙謀生咄嗟興廢悲三歎倏忽榮
枯夢一驚何日解官歸舊隱滿園松菊小菴清

過武川贈散令人

班姬流落到而今聞道翻身入道林歌扇舞裙忘
舊業藥爐經卷半新吟閑眠白晝三杯酒靜對青

松一曲琴更看他年棲隱處蓬山樓閣五雲深

過燕京和陳秀玉韻五首

回首親朋半土丘嗟予十稔浪西游半生兵革慵
開眼一紙功名暗點頭下士笑予謀計拙至人知
我謂心憂再行不憚風涉惡鶴跡雲蹤任去留
君恩猶未報山丘自笑遐方汗漫游客過玉關驚
白髮要游金谷覓蒼顏冷官待罪予為歎陋巷居
貧君不憂猶望道行澤四海敢辭沙漠久淹留
狄死曾聞尚首丘悲予去國十年游崑崙碧簪日

落處渤海西傾天盡頭君子云亡真我恨斯文將
喪是吾憂尚期晚節回天意隱忍龍庭且強留
餘生不得樂林丘猶憶丁年選勝游幾帙殘編聊
映眼一張衲被且蒙頭貌貅已報西門役柱石猶
懷東顧憂自料荒踈成棄物菟裘歸計乞封留
空驚滄海變陵丘白晝分明夢裏游除妾楔邊重
出楔永真頭上更安頭亨通富貴剛生喜苦惱悲
愁強作憂斫斷葛藤閑伎倆繫驢橛子不須留

還燕京題披雲樓和諸士大夫韻

閑上披雲第一重
離：禾黍漢家宮
窗開青瑣招
晴色簾捲銀鈎
揖曉風好夢安
排詩句裏閑愁
分付酒杯中靜思
二十年間事聚散
悲歡一夢同

和威寧珍上人韻

十載西游志已灰
南征又自大梁迴
扶持佛日慙無力
贊翊皇風愧不才
舊約未能林下去
新詩常寄日邊來
何時杖履烟霞裏
一笑伸眉得共陪

和李德修韻

明：聖主萬邦君
神武彫弓挽六鈞
時有逸人游

闕下更無騷客
弔江濱衣冠師古
乘殷輅曆日隨
時建夏寅厚德
深仁施萬世巍然
一代典謨新

湛然居士文集卷第四

和呂飛卿韻

舊說飛卿詞翰全風神
渾似晉名賢吟詩校子三
十里押韻輸君一着先
筆迹查牙森似戟
詞源浩汗注如川
好詩好字獨予得
准備携將帝里傳

再用韻贈國華

學道宗儒難兩全
湛然深許國華賢
儒門已悟如心恕
道藏能窮象帝先
似海詞源涵萬水
如鯨飲量吸長川
而今一識君侯面
始信清名不浪傳

謝飛卿飯

一鞭羸馬渡天山，偶到雲川暫解鞍。
獨守空房方丈穩，更無薄酒一杯殘。
詩書半蠹絕來客，釜甑生塵笑冷官。
賴有覺非飛卿憐野拙，長鬚為我饋盤餐。

再用韻紀西游事

河中西域尋恩子城西花木蔽春山，爛賞東風縱
寶鞍留得晚瓜過，臘半藏來秋果到。
春殘親嘗芭欖寧，論價自釀蒲萄不納官。
常嘆不才還有幸，滯

留遐域得佳食

再用韻贈搏霄

以搏霄戒肉罷鷹犬故以是詩美之

凜凜風神白玉山，罷游鷹犬逞金鞍。
瑤琴高掛么弦絕，犧易頻翻斷簡殘。
息念如僧還有髮，忘形見客似無官。
加佗誦罷爐薰冷，一鉢疏羹當曉餐。

再用韻謝非熊召飯

行盡遐陬萬里山，十年飄泊困征鞍。
春風燕語歸心切，夜月猿啼客夢殘。
聖世因時行夏正，愚臣嗜數媿春官。
誰知賢帥開青眼，掃洒西菴台我餐。

再用韻唱玄

藤條擊破鐵圍山倒跨白牛不鞞鞍講疏僧歸經
卷亂坐禪人起佛燈殘為學未必如為道選佛從
教勝選官百事湛然都不念秬知渴飲與飢食

再用韻

雲山疊：復雲山瘦馬蘆鞭矮面鞍瀚海去程千
驛遠揚州歸夢五更殘塵緣淡處應忘世逸興濃
時好解官二頃良田何必覓春山笋蕨亦供食

和博霄韻代水陸疏文因其韻為十詩

資生無畏濟人深便見能仁六度心塵世捐財矜
苦厄寒林洒飯拔幽沉既臨巨海鈎神物試叩洪
鐘伺好音今日湛然攀舊例珠纓休惜掛絰林
新朝威德感人深渴望雲霓四海心東夏再降烽
火滅西門一戟塞烟沉顯觀頒朔施仁政竚待更
元布德音好放湛然雲水去廟堂英俊政如林
論道西菴愛慕深推誠片：露丹心瑤琴莫撫相
如引寶鼎休焚韓壽沉花氣渾如三角串松風全
似五絃音清談終日忘歸思不覺昏鴉噪晚林

五派分流道愈深塵中誰識本來心
穿心土椀元無漏沒底膠船却不沉
山色水光呈妙相鳥啼猿嘯露圓音
雲霞活計無求飽何事狂童獨一作夫作肉林

前生未了妄緣深薄宦相縈負宿夙心只見淵明能
印棄誰知居士解舟沉窮通榮辱皆真夢毀譽稱
譏盡假音中隱冷官閑况味歸心無日不山林
居士才微學未深靜思寧不媿中心難忘北海千
鍾酒虛負西菴一炷沉綺語做顰賡賡險韻瑤琴學

步鼓純音此番公案休拈出祗恐相傳入笑林
新詩教玉起予深獨有搏霄我許心真跡居塵聊
俯仰高名與世任浮沉同成雅會清茶話共賞枯
桐白雪音他日歸休約何處燕山叅謁萬松林
賢師文章蘊藉深雲川傾蓋便同心掀髯談道藥
燈炮抵足論文塞月沉有眼句中君得意無弦琴
上我知音沉舟誤投波中月莫學當年李翰林
浪跡西游歲月深臨風誰識湛然心斯文將喪儒
風歇真智難明佛日沉佳茗暫嘗轟雪浪正聲聊

作鼓雷音年來逸興十分切
準備求真入道林
漁磯舊隱荻花深
塵世寧忘昔日心
兩岸清風單舸穩
滿江明月一鉤沉
飢來煮稻無兼味
醉後鳴榔笑五音
閑臥烟蓑春夢斷
不知潮起沒青林

寄買搏霄乞馬乳

天馬西來釀玉漿
草囊傾處草微香
長沙莫吝西江水
文舉休空北海觴
淺白痛思瓊液冷
微甘酷愛蔗漿涼
茂林要洒塵心渴
願得朝朝賜我嘗

謝馬乳復用韻二首

生涯簞食與壺漿
空憶朝回衣惹香
筆法餘才猶可賦
酒來多病不能觴
松窗雨細琴書潤
槐館風微枕簟涼
正與文君謀此渴
長沙美漣送予嘗
肉食從容飲酪漿
羞酸滑膩更甘香
革囊旋造逡巡酒
樺器頻傾漱灑觴
頓解老飢能飽滿
偏消煩渴變清涼
長沙嚴令君知否
只許詩人合得嘗

贈搏霄筆

一札霜毫綴上枝
管城家世出東涯
遼東鋒端有口能談景
紙上無聲解寫詩
免向江淹求彩筆
莫

學班氏棄毛錐贈君聊助文房用賦就離騷寄我
知

再用韻寄搏霄二首

玉立堂：紫桂枝雲川中隱寓天涯風神蕭散能
談道格調清新解作詩鄙論我甘蒙醬予作辨
讀之予論搏雄才君已露囊錐澄人胸次人誰識祗有清
風明月知

斫倒霜筠節外枝誰言法界有邊涯筌蹄意盡閑
周易脂粉情忘束詁詩去歲生涯猶說劍今年活

計更捐錐威音那畔真消息試問瞿雲也不知

再用韻別非熊

靈木垂芳桂兩枝非熊佳譽動西涯倦聽琴阮嫌
狂客飽看經書厭小詩成德羨君垂竹帛虛名嗟
我類刀錐會難別易堪惆悵何日重來誰得知

愛子金柱索詩

文獻陰功絕比倫昆虫草木盡承恩我為北闕十
年客汝是東丹九世孫致主澤民宜務本讀書學
道好窮源他時輔翼英雄主珥筆承明策萬言

贈賈非熊搏霄

二陸尊賢擅美聲月評難弟亦難兄
西庵揮麈談三界北觀携琴論五行
休道酒仙無太白須知詩伯有飛卿
奇人輜輳君門下占斷西湖好士名

和李振之二首

半紙功名未可呈無心何處不安生
十年滄海塵空起百歲黃糧夢乍驚
舊逕既荒松菊在丹誠不變鬢髯
更年來漸有昇平望每恨栖雞半夜鳴
酷憶遙山寸碧呈歸耕何日樂餘生
蠅營得失都

無念狗苟榮枯總若驚客夢覺來家萬里
聲詩吟罷月三更
漢鵬本有衝天志直待三年更一鳴

非熊兄弟餞予之燕再用振之韻

藝途知己敢相呈幾夜論文喜氣生
筆陣我甘三舍退詩壇君使四筵驚
公初傾蓋冬將半予擬乘軺歲欲更特與幽人助行色一聲寒角隔煙鳴

和連國華三首

歲月如流走兔烏永真可惜費功夫
深源到底忘根柢至道元來貴拙愚
真理不空宜具眼太虛無

面莫添鬚直須穩坐長安好切忌途中認畫圖
安得長繩繫日烏天涯老却舊畊夫林泉放曠輸
君樂沙漠淹留笑我愚虎戰每驚涉虎尾龍飛不
得採龍鬚文章畢竟成何事富貴元知不可圖
月上南枝啼夜烏悲歌彈缺嘆征夫愁邊逐日看
周易夢裏隨風謁太愚縱有征塵遮兩眼却無慙
色上三鬚真人已應千年運佇待河清再出圖

連國華餞予出天山因用韻

十年不得舞衣斑一憶江南膽欲寒黃犬候來秋

自老白雲望斷信何難軍中得句常橫槩客裏傷
心每據鞍游子未歸情幾許天山風雪正漫：

還燕和吳德明

紛：世態眩榮華靜裏乾坤本不譁琴阮生涯聊
自適詩書事業更何如但期聖德澤天下敢惜餘
生寄海涯可笑燕然舊游客倚樓悲我客程賒

又和橙子梅韻

可笑人心自短長誰知箇事不囊藏化成橙子舌
耽味幻作梅英鼻覺香金卵似真隨變滅水魂元

假却芬芳唯心識破同根旨何必臨風再舉揚

和竹林一禪師韻

富貴無心羨五侯隨時俯仰浪西游斷無事業流
千古靜看英雄混九州白雁縱傳遐域信黃華却
負故園秋蒼生未濟歸何益一見吾山一度羞

西菴上人住夏禁足以詩戲之

觸處無非選佛堂一作都虛只東風何處避春光
郡人無足克千界大地絕塵塞四方舉步踢翻滄
海月轉身踏破白雲鄉快須擊碎閑家具說與西

菴笑一場

送韓浩然用馬朝卿韻

開懷樽俎笑談傾未暇論文君已行富貴塗亨渠
易致詩篇韻險我難賡已成傾蓋金蘭友安用沾
襟兒女情准擬秋深迓歸騎一尊濁酒遠相迎

戊子喜雨用馬朝卿韻二首

酷暑炎々正不禁一聲雷震釀輕陰救回南畝十
分旱變作西郊三日霖遍野霜桑疇青幄密連天麥
壟綠雲深王孫喜雨登樓宴貴酒黃壚解帶金

生死輪迴苦莫禁不如學道惜分陰
船來沒底聊相渡雲出無心強作霖
不死鄉中靈草異長生劫外紫雲深
茅山道士真堪笑虛費工夫煉五金

戊子餞非熊仍以呂望蟠溪圖為贈

昨夜白麻降日邊文章領袖遠朝天
遙思御座分香賜更想龍庭命席前
白面書生酬夙志黑頭邊帥領新權
非熊應笑非熊老八十猶然釣渭川

和宋子玉韻

勇將謀臣滿玉京吾儕袖手待昇平
荆榛至道常

嗟我柱石中原豈捨卿日下有人叨
肉食雲中高士振詩鳴思君興味如
梅渴海邛子玉號也道那能識此情

和李邦瑞韻二首

隴石奇才冠士林萬言良策起予深
澤民致主傾丹懇邀利沽名匪素心
伴我簿書無好思君陪風月有閑吟
他年共約林泉下茅屋松窗品五音

謝君千里遠相尋傾蓋交歡氣義深
筆硯生涯一作書劍因緣又無異志金蘭氣味本同心
揮毫解賦

登高句緩軫能彈對竹琴此去鱗鴻知有便臨風
無吝寄芳音

和邦瑞韻送奉使之江表

駟騎翩：出玉京金符一挿照人明莫忘北闕龍
飛志要識南陔鳩舌情布袖來朝無騎乘錦衣歸
去不徒行昇仙橋畔增春色郡守傳呼接長卿

和王正之韻

洪才碩德兩相宜雅操真堪據鳳池富貴未終隨
夢變功名何在值時危奇辭解吐萬言策敏思能

吟七步詩但倩東風輕着力摩天鵬翼若雲垂
自慚不解告嘉謀十載韜藏僻一隅巨海洪深容
棄物新朝寬厚用愚夫亨時嘉會千年少聖主雄
材萬代無文物規模皆法古佇看明詔起真儒
皇天輔德本無親樂道奚憂漑滿塵道泰小人當
屏斥時屯君子自經綸浮雲富貴元千變昨夢繁
華得幾春遇不遇兮皆是命吾羨休羨錦衣新楞
經云生死涅槃都如昨夢

祝忘憂居士壽

酷似燕山竇十郎靈椿初老桂枝芳兩朝厚遇垂
十稔一日清名滿四方玉佩丁東照蘭省斑衣搖
曳悅萱堂他年叅到平常處便是長生不老鄉

蠟梅二首

越嶺仙姿迥異常洞庭春染六銖裳枝橫碧玉天
然瘦蕾破黃金分外香反笑素英渾淡抹却嫌紅
艷大濃粧臨風范此薔薇露醉墨淋漓寄渺茫
冰姿夢裡慕姚黃滴蠟凝酥別樣粧生妬白紅本
濃淡懶施朱粉自芬芳寒英深染薔薇露冷艷微

薰篤耨香受用清絕恣吟遠惜花一念未全忘

謝禪師公寄閭山紫玉

方外閑人天一隅因風寄我紫雲腴起予妙理欺
歡伯滌我枯腸壓酪奴琥珀精神渾彷彿葡萄滋
味較鉛銖禪師遠棄桃源路日：尋山摘此無

和鄭壽之韵

聖主龍飛日月新微才忝預股肱臣民財已阜錢
如水驛騎長閑塞不塵威鎮西陲輸定遠宴開東
閣慕平津何時收拾琴書去林下衣冠作舜民

寄沙井劉子春

寄語沙城老故人別來贏得鬢邊塵
馬蹄踏破關中月新句吟空河表春
名利相縈予有歎琴書自樂子非貧
何時策杖君家去再試淵明漉酒巾

和琴士苗蘭韵

徒步南來愛陸機公餘邂逅似相期
高山韻吼千岩木流水聲號半夜陂
聖德宛如歌治化南風猶似撫瘡痍
曲終聲散無人會撩我高吟一首詩

和人韻二首

西域諸蕃古木知來王遠古禹封畿
名山准擬金泥檢古塞無勞羽檄飛
世樂詎能敵靜樂蓑衣到底勝朝衣
年來痛憶閭山景月照茅亭水一圍
干戈未斂我傷神自恨虛名誤此身
否德詎能師百辟微才安可步三辰
箕裘謾歎青氈舊勳業空驚白髮新
安得夔龍立廊廟扶持堯舜濟斯民

和武川嚴亞之見寄

當年西域未知名四海無人識晉卿
扈從鑿輿三萬里謀謨鳳閣九重城
衣冠異域真予志禮樂中

原乃我榮何日功成歸舊德五湖烟浪樂餘生

亞之平水久馳名

亞之本絳陽人今寓居武川訓童為生

壯歲題橋

慕長卿厭世德風如偃草驚人詩價比連城功名未立不為慊仁義能行亦足榮此理幽微人不識莫言儒道拙謀生

今年又得亞之詩每歎風雲會遇遲拙運且淹童子役雄材宜作帝王師羨君筆下揮千字知子胸中蘊六奇靜對西風和新句凄然南望動深思誤忝綸恩手印懸乏才羞到玉墀前劾姦封事夢

猶諍許國忠誠老益堅仁政發從天北畔提音來自海西邊從今率土霑王化禮樂車書共一天寥落龍沙寄此生情鍾我輩豈無情參商管鮑賢朋友南北機雲好弟兄蓮葉飄香思晚浦梅花飛雪夢春城故園日夜歸心切未濟斯民不敢行
已丑過雞鳴山

三年四渡過雞鳴我僕徘徊馬倦登寂寞柴門空有舍蕭條山寺靜無僧殘花濺淚千程別啼鳥傷心百感生今古興亡都莫問寧廬高卧醉騰

寄天山周敬之

當年傾蓋識君初，爛飲天山駐使車。
秋去安仁空有賦，雁來公瑾又無書。
林巒紅葉知人老，籬落黃花亦我疎。
為向天涯道岑寂，強吟新句附雙魚。

和瑞乞訪親因用其韻

干戈擾攘，戰交侵。一紙安書直萬金。
兄子生還愁未解，萱堂仙去恨尤深。
涕零倚木西風怨，腸斷聞鈴夜雨淋。
養老送終真有憾，號天如割望雲心。

和李和瑞韻

趙老名言本兩忘，庭前空有柏蒼蒼。
西江吸盡慵開口，北載添來亦括囊。
明月清風何所礙，落花流水不相妨。
須知居士元無病，底用千年舊藥方。

湛然居士文集卷第五

贈蒲察元帥七首

閒騎白馬思無窮來訪西城綠髮翁
元老規模妙天下錦城風景壓河中
花開杞欖芙蓉渠淡酒泛蒲萄琥珀濃
痛飲且圖容易醉欲憑春夢到盧龍
積年飄泊困邊城間過西隅謁故人
忙喚賢姬尋罌皿更呼遼客奏箏篥
葡萄架底葡萄酒杞欖花前杞欖仁
酒釀花繁正如許莫教辜負錦城春
主人知我怯金觴特為先生一改堂
細切黃橙調

蜜煎重羅白餅糝糖霜幾盤綠橘分金縷一碗清
茶點玉香明日辭君向東去這些風味幾時忘
使君排飯宴南溪不枉從君烏鼠西春雁旅澆濃
鹿尾臘糟微浸軟駝蹄絲：魚膾明如玉屑：雞
生爛似泥白面書生知此味從今更不嗜黃虀
筵前且盡主人心明燭厭：飲夜深素袖佳人學
漢舞碧髯官妓撥胡琴輕分茶浪飛香雪旋擘橙
盃破軟金五夜歡心猶未已從教斜月下疎林
主人開宴醉華胥一派絲簧沸九衢黯紫葡萄垂

馬乳輕黃杞攬燦牛酥金波泛蟻斟歡伯雪浪浮
花點酪奴忙裏偷閑誰若此西行萬里亦良圖
閑來羸馬過蒲華又到西陽太守家瑪瑙瓶中簪
亂錦琉璃鍾裏泛流霞品嚐春色批金橘受用秋
香割木瓜此日幽歡非易得何妨終老注流沙

庚辰西域清明

清明時節過邊城遠客臨風幾許情野鳥間關難
解語山花爛熳不知名葡萄酒熟愁腸亂瑪瑙盃
寒醉眼明遙想故園今好在梨花深院鷓鴣聲

用鹽政姚德寬韻

乃祖開元柱石臣雲孫髣髴玉麒麟從來德爻與
人口此日思霽聖世春欲草薦書學北海未開東
閣愧平津而今且試調羹手竚看沙堤繼舊塵

用昭禪師韻二首

銀鈎全似趙周臣詩比黃華格調新道眼點開言
外句禪心說破劫前春山中跋挈無為客林下逍
遙自在人不犯清波垂釣處卧龍隨手出龍津
聖德洋：雨露零虫魚草木搃歡榮妖氛斂禍堯

風扇外道消聲佛日明

和薛正之見寄

賢臣聖主正時遭建策龍庭莫憚勞大壑波濤翻
巨鯉高空風順遇鴻毛一番制度新才術百代文
章舊雅騷勉力自強宜不息功名何啻泰山高

乞扇

屈晌圓裁白玉盤幽人自剪素琅玕全勝織女絞
綃帕高出湘妃玳瑁斑座上清風香細：懷中明
月淨團：願祈數柄分居士顛倒陰陽九夏寒

壬午西域河中游春十首

幽人呼我出東城，信馬尋芳莫問程。
春色未如華藏富，湖光不似道心明。
士林設饌談玄旨，石鼎烹茶唱道情。
世路崎嶇太尖險，隨高逐下坦然平。
三年春色過邊城，萍跡東歸未有程。
細細和風紅杏落，涓涓流水碧湖明。
花林啜茗添幽興，綠野觀耕稱野情。
何日要荒同入貢，普天鐘鼓樂清平。
春雁樓邊三兩聲，東天回首望歸程。
山青水碧傷心切，李白桃紅照眼明。
幾樹綠楊搖客恨，一川芳

惹羈情。天兵發日，歸東闕，萬國歡聲賀太平。

草

河中二月好踏青，且莫臨風歎客程。
溪畔數枝繁杏淺，牆頭千點小桃明。
誰知西域逢佳景，始信東君不世情。
圓照方池三百所，澄澄春水一時平。
二月河中草木青，芳菲次第有期程。
花藏徑畔春泉碧，雲散林梢晚照明。
含笑山桃還似識，相親水鳥自忘情。
遐方且喜豐年兆，萬頃青麥浪平。
異域春郊草又青，故園東望遠千程。
臨池嫩柳千絲碧，倚檻妖桃幾點明。
丹杏笑風真有意，白雲送

雨太無情歸來不識河中道春水潺湲：蒲路平
四海從來皆弟兄西行誰復歎行程既蒙傾蓋心
相許得遇知音眼便明金玉滿堂違素志雲霞千
頃適高情廟堂自有夔龍在安用微生措治平
寓跡塵埃且樂生垂天六翮歛鵬程無緣未得風
雲會有幸能瞻日月明出處隨時全道用窮通逐
勢歎人情憑誰為發豐城劍一掃妖氛四海平
不如歸去樂餘齡百歲光陰有幾程文史三冬翰
曼倩田園二頃憶淵明賓朋冷落絕交分親戚團

圍說話情植杖耘耔聊自適笑觀南畝綠雲平
衰翁老矣倦功名繁簡行軍笑李程牛糞火熟石
炕煖蛾連紙破瓦窗明水中澆月消三毒火裏生
蓮屏六情野老不知天子力謳歌鼓腹慶昇平

游河中西園和王君玉韻四首

萬里東皇不失期園林春老我來遲漫天柳絮將
飛日遍地梨花半謝時異域風光特秀麗幽人佳
句自清奇臨風暢飲題玄語方信無為無不為
清明出郭赴幽期千里江山麗日遲花葉不飛花

定後香塵微歛雨餘時雕鐫冰玉詩尤健揮灑龍
蛇字愈奇好字好詩獨我得來賡和擬和為
異域逢君本不期湛然深恨識君遲清詩厭世光
千古逸筆驚人自一時字老本來遵雅淡吟成元
不尚新奇出倫詩筆服君妙笑我區區亦強為
風雲佳遇未能期自是魚龍上釣遲岩穴潛藏難
避世塵囂俯仰且隨時百年富貴真堪歎半紙功
名未足奇伴我琴書聊自適生涯此外更何為

河中游西園四首

河中春晚我邀賓詩滿雲牋酒滿巡對景怕看紅
日暮臨池羞照白頭新柳添翠色侵凌草花落餘
香着莫人且著新詩與芳酒西園佳處送殘春
河中風物出乎倫閑命金蘭玉笋巡半笑梨花瓊
臉嫩輕顰楊柳翠眉新啣泥紫燕先迎客偷蕊黃
蜂遠趁人日月西園尋勝槩莫教辜負客城春
幾年萍梗困邊城閑步西園試一巡圓沼印空明
鏡瑩芳莎藉地翠茵新幽禽有意如留客野卉多
情解笑人屈指知音今有幾與誰同享簷頭春

金鼓鑿輿出隴秦驅馳八駿又西巡千年際會風
雲異一代規模宇宙新西域兵來擒偽主東山詔
下起幽人股肱元首明良世高拱垂衣壽萬春

河中春游有感五首

西河尋斯干有西戎校
里檀故宮在焉構室未全終又見顏垣遠

故墉綠苑連延花萬樹碧堤回曲水千重不圓舌
鼓談非馬甘分躬耕學臥龍糲食簾衣聊自足登
高舒嘯樂吾慵

異域河中春欲終園林深密鎖顏墉東山雨過空

青疊西苑花殘亂翠重杞欖碧枝初着子葡萄綠
架已纏龍等閑春晚芳菲歇葉底翩：因蝶慵
坎止流行以待終幽人射隼上高墉窮通世路無
多事藉險機關有幾重百尺蒼枝藏病鶴三冬蟄
窟閉潛龍琴書便結忘言友治圃耘蔬自養慵
西域渠魁運已終天兵所指破金墉崇朝駟騎馳
千里一夜捷書奏九重鞭策不須施犬馬廟堂良
算足夔龍北窗高卧薰風裏儘任他人笑我慵
重玄叩擊數年終大道難窺萬仞墉舊信不來青

鳥遠故山猶憶白雲重自知勲業輸雛鳳且學心
神似老龍忙裏偷閑誰似我兵戈橫蕩得踈慵

過閭居河四首

河水春盡水無聲
菲岸釣魚羨擊水
乍遠南州如夢蝶
暫游北海若飛鵬
隨堤柳絮風何處
越嶺梅花信莫憑
試暫停鞭望西北
迎風羸馬不堪乘
北方寒凜古來稱
親見陰山凍鼠冰
戰鬪蒼楹翻鐵馬
窮通碁勢變金鵬
五車經史都無用
一鶚書章誰可憑
安得衝天暢予志
雲輿六馭信風乘

一聖龍飛德足稱
其亡凜々涉春冰
千山風烈來從尾
萬里雲垂看舉鵬
堯舜徽猷無闕失
良平妙筭足依憑
華夷一混非多日
浮海長桴未可乘
自愧聲名無可稱
賢愚混世炭和冰
竊鹽倉鼠初成蝠
噴浪溟鯤未化鵬
賣劍學耕食初遣
買山歸老價難憑
秋江月滿西風軟
何日扁舟獨自乘

感事四首

富貴榮華若聚漚
浮生渾似水東流
仁人短命嗟顏氏
君子懷疾嘆伯牛
未得鳴珂游帝闕
何能騎

鶴上揚州幾時擺脫閑韁鎖笑傲烟霞永自由
當年元擬得封侯一誤儒冠入士流赫々鳳鸞捐
腐鼠區々蠻觸戰蝸牛未能離欲超三界必用麾
旌混九州致主澤民元素志陳書自薦我無由
得不欣々失不憂依然不改舊風流深藏鳳壁毋
投鼠好蓄龍泉候買牛山寺幽居思少室梅花歸
夢遶揚州萱堂溫清十年闕負米供親愧仲由
人不知予我不尤濯纓何必棟清流良材未試聊
耽酒利器深藏俟割牛舊政欲傳新令尹新朝不

識舊荊州眉山云邁歸商路痛恪新詩寄子由

壬午元旦二首

西域風不換東方音問踈屠蘇聊復飲鬱壘不須
書舊歲昨宵盡新年此日初客中今十載孀母信
何如

萬里西征出玉關詩無佳思酒瓶乾蕭條異域年
初換坎軻窮途臘已殘身過碧雲游極樂手遮東
日望長安年光迅速如流水不管詩人兩鬢斑

過沁園有感

昔年曾賞沁園春今日重來迹已陳水外無心脩
竹古雪中含恨瘦梅新垣頽月榭經兵火草沒詩
碑覆劫塵羞對單懷昔時月多情依舊照人行

用劉正叔韻

參叩松軒積有年光塵融洩一愚賢視民每羨如
芻狗治國常思烹小鮮只道牛邊休執杖誰知琴
上亦忘絃湛然稍異香山老不學空門不學仙

西域家人輩釀酒戲書屋壁

西來萬里尚騎驢旋借葡萄釀綠醕司馬捲衣親

條罷文君挽袖自當壚元知沽酒業緣重何奈調
羹手段無古昔英雄初未遇生涯或亦隱屠沽

西域從王君玉乞茶因其韻七首

積年不啜建溪茶心竅黃塵塞五車碧玉甌中思
雪浪黃金碾畔憶雷芽盧仝七椀詩難得諗老三
甌夢亦賒敢乞君侯分數餅暫教清興透烟霞
厚意江洪絕品茶先生分出蒲輪車雪花灑、浮
金蕊玉屑紛、碎白芽破夢一杯非易得搜腸三
椀不能賒瓊甌啜罷酬平昔飽看西山挿翠霞

高人惠我嶺南茶爛賞飛花雪滿車

是日作茶玉會值雪

屑三甌收嫩蕊青旗一葉碾新芽頓令衰叟詩魂
爽便覺紅塵客夢賒西掖清風生坐榻幽歡遠勝
泛流霞

酒仙飄逸不知茶可笑流涎見麴車玉杵和雲舂
素月金刀帶雨剪黃芽試將綺語求茶飲特勝青
衫把酒賒啜罷神清淡無寐塵囂身世便雲霞
長笑劉伶不識茶胡為買鉢謾隨車蕭蕭暮雨雲
千頃噫：春雷玉一芽建郡深甌吳地遠金山佳

水楚江賒紅爐石鼎烹團月一椀和香吸碧霞
枯腸搜盡數杯茶千卷胸中到幾車湯響松風三
昧手雪香雷震一槍芽滿囊垂賜情何厚萬里携
來路更賒清興無涯騰八表騎鯨踏破赤城霞
啜罷江南一椀茶枯腸歷：走雷車黃金小碾飛
瓊屑碧玉深甌點雪芽筆陣陳兵詩思勇睡魔卷
甲夢魂賒精神爽逸無餘事臥看殘陽補斷霞

和冲霄韻五首

垂亡聖道賴君鳴坎軻休嗟道不行須信詩魔降

筆陣好將酒戰破愁城滔；秋水如人志薄；閑
雲似世情一舉冲霄知有日垂天萬里看鵬程
古今興廢不堪聽寵辱都如夢一驚韜畧欣然推
後進琴書足以了餘生既知物、頭、是誰問朝
朝暮、情散盡迷雲何所有一輪秋月普天明
天涯索寞正窮秋衰草寒烟無盡頭葉底哀蛩空
促織雲間征雁柰供愁一作謾書愁酪漿滿飲澆羊腍
糲食隨緣薦鹿脩試暫迴先樂真覺人間萬法一
時收

星：華髮鏡中驚好賦歸與接浙行位重寧貪高
一品故園無憚遠千程晴天花絡春山色落日松
和秋水聲無恙閭峯三百寺遨游吟嘯老餘生
古木殘陽映矮岡雁行天際寫秋光霜蓑帶雨添
愁色晚菊和風送冷香濁酒三年渾未試黃糧九
月得初嘗龍沙且喜身強健南望幽人天一方

又一首

不見高陽舊酒徒臨風惆悵幾踟躕無窮真味思
焦尾有限浮生歎白駒德望服人輸一陸文章重

世媿三蘓散材潦倒渾無用空作昂藏一丈夫

和冲霄十月桃花韻二首

桃源仙子憶劉郎不憚嚴冬雨雪涼紅雨已先初
夏落妖鬼重對小春芳冷侵絳萼剛舒臉寒徹朱
衣強噴香誰向荒園慰蕭索數枝無語映斜陽
春生秋殺乃天常來往推遷炎與涼晚節正當陰
氣塞窮冬忽見小飛芳豈知木棗能成實借與江
梅敢並香自愧備員調鼎萬不知何事調陰陽

用薛正之韻

無德慙為天下先湖山歸計好加鞭霜深尚有籬
邊菊風勁全無葉底蟬三弄瑤琴歌素月一尊濁
酒醉蒼烟鳳池分付夔龍去萬頃瀟湘屬湛然

湛然居士文集卷第六

和景賢見寄

龍岡叅透後三三鬢髯前人何所慙妙筆照人驚
老字新詩入手想清談塵中名利予難出夢裏榮
華君不耽准擬歸時便歸去閭山珍重一作好在舊禪
菴

用劉潤之乞冠韻

隱逸養幽慵飄蕭兩鬢蓬角巾折暮雨醉帽落秋
風避暑掛石上啣杯澆酒中忘機任真率露頂向

王公

西域河中十詠

寂寞河中府連甍及萬家蒲萄親釀酒杞欖看開
花飽噉雞舌肉分食馬首瓜土產瓜大如馬首人生唯口
腹何礙過流沙

寂寞河中府臨流結草廬開尊傾美酒擲網得新
魚有客同聯句無人獨看書天涯獲此樂終老又
何如

寂寞河中府遐荒僻一隅蒲萄垂馬乳杞欖燂牛

酥釀酒無輸課耕田不納租西行萬餘里誰謂乃
良圖

寂寞河中府生民屢有災避兵開邃穴防水築高
臺六月常無雨三冬却有雷偶思禪伯語不覺笑
顏開

寂寞河中府顏垣遶故城園林無盡處花木不知
名南岸獨垂釣西疇自省耕為人但知足何處不
安生

寂寞河中府西流綠水傾衝風磨舊麥

西人作磨風動機軸

以唐懸碓杵新粳西人皆懸杵以舂春月花渾謝冬天草

再生優游聊卒歲更不望歸程

寂寞河中府清歡且自尋麻牋聊寫字葦筆亦供

吟傘柄學鑽笛宮門日斲琴臨風時適意不負昔

年心得故宮門堅木三尺許斲為琴有清聲

寂寞河中府西來亦偶然每忘舊閨隨月出新

年強策渾心竹難穿無眼錢異同何定據俯仰且

隨緣西人不計閨以十二月歲有得心竹其金銅芽錢無孔郭

寂寞河中府聲名昔日聞城隍連畎畝市井半丘

墳食飢秤斤賣金銀用麥分生民怨來後簞食謁

吾君

寂寞河中府遺民自足糧黃橙調蜜煎白餅糝糖

霜漱旱河為雨無衣壟種芋一從西到此更不憶

吾鄉

西域和王君玉詩二十首

年來深欲買湖山貧病難甬絹五千歸去不從陶

令請知音未遇孟嘗賢排愁器具思歡伯送老生

涯乏貨泉惟有詩魂常伴我閑吟陶寫箇中玄

一髮燕然曉日邊寒雲疊：亂山千萬里沙漠猶
逢友十室荒村亦有賢留客芳尊思北海驚人奇
語憶南泉思量萬事都渾錯勉力輪鋌如叩玄
君侯乘興寫佳篇找得瓊瑤價倍千妙筆一揮能
草聖新詩獨惠過稱賢半瓶濁酒斟瓊笋七椀清
茶泛玉泉萬里西行真我幸逢君時復一談玄
健美金鞍美少年盈門劍客列三千須知執德元
非德况是無賢甘自賢不解彎弓射石虎誰能擊
劍躍飛泉黑頭勲業今何在壯歲功成愧謝玄

雲龍相感本乎天會合君臣歲一千西伯已忘誰
老：卜商何在肯賢：鶴鷁未必輕食鼠蚯蚓猶
知下飲泉巧拙是非無定據到頭誰解辨黃玄
奔走紅塵積有年深思雪澗竹竿千誰能世上全
三樂好向林間伴七賢筆下風生詩似錦笺頭春
漲酒如泉詩成酒罷寂無事靜几明窗誦太玄
竹徑風來自破禪修篁青劍葉垂千爛吟風月元
無礙高卧烟霞未是賢迷處無由逃絆鎖悟來何
處不林泉縱橫觸目皆真理坐卧經行易路玄

無滅無生不論年誰誇桃結歲三千休將真宰陪
司命星莫使明星動進賢星有道不妨居鬧市無
心奚礙酌貪泉何能遠遯塵囂去且向人間養素
玄

從來豪俊領時權指顧貔貅數百千碌；餘生甘
養拙明；聖代豈遺賢且圖混世啜漓酒勿謂濯
纓棄濁泉莫道無為云便了有為何處不逢玄
浮生瞬息度流年唐漢興亡不半千清潔採薇輸
二子英雄濟世有三賢未能海上尋芝草且向塵

中泛醴泉醉興陶；畧相似無何鄉裏亦通玄
成敗興亡事可憐勞生攘；幾千；調心莫若先
離欲治世無如不尚賢小楮豈能懷大器短繩那
得汲深泉直須箭透威音外不用無為不用玄
得；清歡樂自然不辭去國客程千翻騰舊案因
君玉唱和新詩有景賢每遇開尊邀素月常因盃
手掬寒泉衰翁自揣何多幸未死中間樂此玄
驚回千枕不成眠幽鳥閑近數千安世不知安世計
隱居常慕隱居賢幾行石榻圍松徑一簇茅齋繞

澗泉掛起西軒風似水閒將義易索幽玄
農隱生涯樂自天樂畦香壠僅盈千蠅營累世真
堪笑狗苟勞生未苦賢帶月扶犁耕暮野衝雲荷
鍾撥春泉耘耔餘暇蓬窗底獨抱遺經考至玄
閑：箇事本明圓一念終興路八千生死既知皆
是幻功名猶戀豈能賢興來暢飲斟晴月醉後高
歌枕碧泉觸處逢渠何所礙不玄：處却玄：
物：頭：總是禪觀音應現化身千杜門宴坐無
傷道遊世幽居也是賢秭為看山開翠竹偶因煎

茗汲清泉靈雲點檢真堪笑不見桃花不悟玄
蓑衣枉脫暮江邊一醉寧論價十千老矣馮唐何
所往歸與陶令最為賢靈苗細：初盈圃春水消
消漸涌泉酒醒夢迴無箇事澄心忘慮體三玄
九重閭闔列羣官曳珮鳴珂及萬千雲水偷將屬
野叟功名迴施與時賢好憑定慧超三界不戀輪
迴沒九泉迅速光陰莫虛度迴光反照靜恭玄
不學經書不說禪誰論芥子納三千忘形詩句追
先覺適意琴書慕昔賢白雪陽春吟雅調高山流

水奏鳴泉平實受用元無盡
參透真空未是玄
鯁生詩僻慕詩仙謂君也
亂綴狂吟數百千
淺陋妄言嗤後哲
清新綺語媿先賢
推殘吟鬢星
髮傾倒詞源渾
泉韻險言窮無可說
祇憑此句露深玄

和楊彥廣韻

三臺須要趁琵琶
知己相逢兩會家
雕斲勿傷石
內玉縱橫須放火
中花探玄渾似三杯酒
清興何消七椀茶
誰識湛然端的處
差徭隨分細些些

題平陽李君實此君軒

環榻森森：蔭好涼
此君風味詎能忘
虛心悄悄：生來勁直
節亭亭：老更剛
雖與蓬蒿均雨露
本同松菊傲風霜
主人雅志元堪尚
物以羣分類以方

西域有感

落日城頭鴉亂啼
秋風原上馬頻嘶
雁行南去瀟湘北
萍跡東來鳥鼠西
百尺棟梁誰着價
三春桃李自成蹊
功名到底成何事
爛飲玻璃醉似泥

早行

馬駝殘夢過寒塘
低轉銀河夜已央
雁跡印開沙岸月
馬蹄踏破板橋霜
湯寒卯酒西三盞
引睡新詩四五章
古道遲遲四十里
千山清曉日蒼涼

自叙

信流乘坎過西天
鉢裏吞針亦偶然
只道一花剛點額
不知三子暗登肩
既來此世難逃數
且應生前未了緣
俗眼見時難放過
并賊陳首萬松軒

西域元日

凌晨隨分備樽壘
辟瘟屠蘓飲一盃
迂叟不令書

鬱壘癡兒剛要畫
鍾馗新愁又逐東
風至舊信難隨
春日來又向邊城
添一歲天涯飄泊
幾時回

西域寄中州禪老士大夫一十五首

恨離師太早
淘汰未精起乳慕之念
作是詩以寄之

吾師道化震清都
奔逸絕塵我不如
近日虛傳三島信
幾年不得萬松書
宗門淘汰猶嫌少
習氣薰蒸尚未除
惆悵天涯淪落客
臨風不足憶鱸魚

蒲華城夢萬松老人

辛巳閏月蒲華城夢萬松老人法語諄
諄覺而猶見其髣髴作詩以寄

華亭髣髴舊時舟又見吾師釣直鈎只道夢中重
作夢不知愁底更添愁曾叅活句垂青眼未得生
侯已白頭撒下塵囂歸去好誰能騎鶴上揚州

寄巨川宣撫

巨川宣撫文武兼資詞翰俱妙陰陽曆
數無所不通嘗舉法界觀序云此宗門
之捷徑也今觀瑞應鶴詩巨川首唱焉

歎其多能作是詩以美之

曆數興亡掌上看提兵一戰領清官馬前草詔珠
璣潤紙上揮毫風雨寒昔日談禪明法界而今崇
道倡香壇諸行百務君都占潦倒鯨生何處安

寄南塘老人張子真

張侯風味詎能忘黃米曾令我一嘗

昔予馳驛至
漁陽過南道

塘子真台予

一設黃飯抵死解官違北闕達生遊世釣南塘

知來何假靈龜兆

昔論運氣頗
知未來時

作賦能陳瑞鶴祥

豈是西邊無土物不如詩句寄東陽

觀瑞鶴詩卷獨子進治書無詩

丁年蘭省識君初，緩步鳴珂游帝都。
象簡嘗陪天仗立，玉驄曾使禁臣趨。
只貪殢酒長安市，不肯題詩瑞應圖。
我去李侯端的意，大都好事不如無。

寄德明

德明寓燕作詩欲自絕，且云但得為一飽，死鬼足矣。士大夫憐之，其詩末句有云：功名拍手笑殺人，四十八年如一夢。予每愛此兩句，近觀彌勒下生賦，德明

所作也，因作詩以寄之。

英侯志節本凌雲，尚自飄零故國塵。
有道且同麋鹿友，談玄能說虎狼仁。
幸然不作飽死鬼，可惜空吟笑殺人。
彌勒下生何太早，莫隨邪見說無因。
經第十卷云：未來世有人噉糠，愚癡種無因而非見破壞世間人，故有是句。

才卿外郎五年止惠一書

五年只得一書題，路遠山長夢亦迷。
睡老黑甜酣順北，公詩中自云：就睡老令官清淡泊遼西，故都
之西羨人得志能如虎，笑我乏材粗儗雞。
佇看天

兵旌北闕從今不用玉關泥

寄清谿居士秀玉

鷓鴣猶欠一枝棲不得燕山半土犁時復有琴歌
碧玉年來無夢遠清谿數行文字聊遮眼半紙功
名若啞臍回首故人今健否餘生甘老碧雲西

戲秀玉

辱書聞秀玉油房蕭索馬溺衛死田畝
水災不勝感歎清谿達士豈芥蒂胸中
耶因作詩以戲之

清谿搬到打油房五衛凋零三徑荒未信塞翁嗟
失馬須知禦寇覓亡羊東湖菡萏從君賞西域蒲
萄輸我嘗各在天涯會何日臨風休忘老鬚郎清谿嘗戲呼予為鬚郎

寄張子聞

憶昔携琴論太玄

渠通太玄經

湛然初識子聞賢回頭

葱嶺仍千里分手松軒已五年

嘗會萬松老人丈室

東望盧

龍傾玉表西來青鳥闕金牋幾時重會燕山道一

曲臨風奏水仙

予彈水仙公嘗學之

寄用之侍郎

用之侍郎携書誠以無忘孔子之教予
謂窮理盡性莫尚佛乘濟世安民無如
孔教用我則行宣尼之常道舍我則樂
釋氏之真如何為不可也因作詩以見
意云

蓬萊憐我寄芳牋勸我無忘仁義先
幾句良言甜似蜜教行溫語暖于綿
從我誰識龜毛佛到底難調膠柱絃
用我必行周孔教舍予不負萬松軒

和正卿待制韻

布袖龍鍾兩眼塵丹誠如舊白頭新
暮雲西畔猶懷漢曉日東邊總是秦
酒賤不妨連夜醉花繁長發四時春
花繁酒賤無佳思誰念天涯萬里人

寄仲文尚書

知仲文尚書投老而歸歎其清高作詩
以寄

仲文曾作黑頭公輔弼明時播美風
治粟貨泉流冀北提刑姦跡屏膠東
笑觀桃李新恩徧拜掃松

楸老計終西域故人增喜色萬全良策不同謀

雪軒老人和傑久不惠書作詩怨之

當時傾蓋便忘年別後春風五度遷萬里西行愁
似海千山東望遠如天不聞舊信傳梅嶺試道新
詩怨雪軒更上危樓一回首朝雲深處是燕然

謝王清甫惠書

西征萬里危鑿輿高閣文章束石渠只道昔年周
蝶夢却疑今日我為魚一簪華髮垂老兩眼黃
塵事：踈多謝貴人憐遠客東風時有寄來書

思親二首

孀母琴書老自娛吾山側近結蘧廬鬢邊尚結待

賓髮

昔予從征太夫人以髮少許賜予云俗篋內
傳父母之髮戴之可辟五兵今尚存焉

猶存教予書幼稚已能學土梗老兄猶未憶鱸魚

誰知萬里思歸夢夜：隨風到故居

昔年不肯臥茅廬贏得飄蕭兩鬢踈醉裏莫知身
似蝶夢中不覺我為魚故園屈指八千里老母行
年六十餘何日掛冠辭富貴少陵佳處 新居

思親用舊韻二首

前年駟騎過西陲聞道萱堂鬢已絲琴斷五絃忘
舊譜菊荒三徑負疎籬筵前戲笑知何日膝下嬉
游看幾時欲附一書無處寄愁邊空詠蒲囊詩
天涯唯仗夢魂歸破夢春風透客幃燈下幾時哦
麗句太夫人昔有詩云挑燈教子筵前何日舞斑
哦新句冷淡生涯樂有餘衣垂：塞北行人老得：江南遠信稀回首故園
千萬里倚樓空望白雲飛

思親有感

骨肉星分天一涯萱堂何處憶孤兒排愁正賴無

聲樂遣興學吟有眼詩麗句日逐三上爾香醪時
復一中之年前漢使來西域笑我星：兩鬢絲

再過西域山城驛

庚辰之冬馳驛西域過山城驛中辛巳
暮冬再過題其驛壁

去年馳傳暮城東夜宿蕭條古驛中別後尚存柴
戶棘重來猶有瓦窗蓬主人歡喜鋪毛毯驛吏蒼
忙洗瓦鍾但得微軀且強健天涯何處不相逢

辛巳閏月西域山城值雨

冷雲携雨到山城未敢衝泥傍險行夜聽窗聲初
變雪曉窺簷溜已垂冰泪凝孤枕三停濕花結殘
燈一半明又向茅亭留一宿行雲行雨本無情

十七日早行始憶昨日立春

客中為客已浹旬歲杪西邊訪故人把攬花前風
弄麥葡萄架底雨沾塵山城腸斷得窮臘村館魂
銷偶忘春今日喚回十載夢一盤涼餅翠嵩新

是日驛中作窮春盤

昨朝春日偶然忘試作春盤我一嘗木案切開銀

綠亂砂瓶煮熟藕絲長勻和豌豆揀葱白西人薰餅必投
以豌豆細剪萋蒿點韭黃也與何曾同是飽區：何
必待膏粱

西域蒲華城贈蒲察元帥

騷人歲杪到君家土物蕭疎一餅茶相國傳呼扶
下馬將軍忙指買來車琉璃鐘裏葡萄酒琥珀瓶
中把攬花萬里遐荒獲此樂不妨終老在天涯將軍
乃元帥子也

乞車

君家輪扁本多能，碧軾朱轅照眼明。居士此迴無
馬坐，郎官不可輒徒行。陳遵投轄情何厚，行行又
留連數日靈輒扶輪報敢輕。別更不須尋土物，載將春色
去東城。

戲作二首

蒼顏太守領西陽，招引詩人入醉鄉。屈眴輕衫裁
鴨綠，葡萄新酒泛鸞黃。歌姝窈窕髯遮口，無妓輕
盈眼方光。野客乍來同見慣，春風不足斲人腸。種一
白葡萄酒
色如金波

太守多才民富強，光風特不讓蘓杭。葡萄酒熟紅
珠滴，杞欖花開紫雪香。異域絲篁無律呂，吳姬聲
調自宮商。人生行樂無如此，何必咨嗟憶故鄉。

過太原南陽鎮題紫微觀壁三首

廷臣侍從茂前驅，道侶忻奔迓使車。縣吏喜聞新
號令，村民爭認舊中書。繫：山果盈磁鉢薄；濁
醪半瓦壺。隱逸競詢新事跡，幾時遷洛卜新都。
吾皇巡狩用三驅，萬騎千官奉帝車。北闕春頌勸
農詔，南陬夜奏報捷書。士民安堵耕盈野，老幼迎

郊漿滿壺佇看要荒歸一統天兵不日破東都
三教根源本自同愚人迷執強西東南陽笑倒知
音士反改蓮宮作道宮紫微觀舊佛寺也村大改
佛像改為道像故有是句
和松月野衲海上人見寄二詩

游子癡愚莫識家牛車遠愛羊車汪洋渤海龍
宮藏涓滴波瀾坎井蛙迷後萬言猶是少悟來千
里不為除叢林衲子空行脚遠徧天涯與海涯
小隱居山何太錯居鄧大隱絕憂樂山林朝市笑
呵：為報禪人莫勸着

夢中偶得

庚辰正月夢旃檀利澄公託萬松老人
乞筭籌于予：以九十一莖贈之仍作
頌一絕覺而猶憶遂錄之為他日一笑
云

昔年鉤隱索幽奇只向縱橫枝上覓而今拍手笑
呵：九：元來九十一仍嚙附頌者云若澄公道
何不云八十一汝但應云
果然果然拂袖便出覺而自
着語云幾日昏沉夢中挫五
賈非熊餞予用其韻

鑿轡和鳴車指南。廷臣自愧侍龍驂。平生慷慨貞
夫一萬里別離。益友三老子此行無酒債。故人歸
計有禪菴白雲野。衲皆宗匠道眼因緣好。細叅

用李德恒韻

吾子棲遲尚布衣。挑燈彈鋏壯歌悲。阮生固已開
青眼。馬氏元來有白眉。運拙巢由真可慕。時亨房
杜不難為。男兒用舍奚憂喜。三徑耕耘足自資。

松月老人寄詩因用元韻

談禪講教不知家。芳草漫漶去路差。杓卜虛聲禾

老鼓盤星錯認洞。山麻全無去就論。空色誰有心
情說。照透松月野僧須薦取。釣魚人是老玄沙。

和薛正之韻

天涯倚遍塞城樓。凝望冥鴻空自羞。禮義不張真
我恨。干戈未戢是我憂。每憐丹鳳能擇食。常笑黃
能悞上鈞。何日解榮償舊約。扁舟蓑笠五湖○

湛然居士文集卷第七

用李邦瑞韻

沉：北海雪波深老眼增明寸碧岑未得一江活
物水何鼎四海望雲心我生有遇千年會自愧難
為三日霖吾子佞然虛讚德臨風羞繼謫仙吟

寄平陽淨名潤老

駟騎新從平水迴知公無恙笑顏開出門不剪閑
庭草退步從生古殿苔玉鎖何須綵鳳金鈎無
得釣黃能夜深織就無紋錦但有人來寄箇來

和鄭景賢韻

我愛龍岡老鳴琴自老成未彈白雪曲先愛水仙
聲但欲合純古誰能媚世情林泉聊自適何必獻
承明

和李茂才寄景賢韻

醒時還醉：還醒尚憶輪臺飲興清瀚海波濤君
忍聽天山風雪我難行好學慷慨英雄操毋倣辛
酸兒女情但得胷中空灑：天涯何處不安生

除戎堂

王師西征賢帥賈公留後于雲內築除
戎堂於城之西阿以練戎事禦武折衝
高出前古予道過青塚公召予宴於是
堂鴻筆大手題詩灑墨錯落于楹棟間
皆讚揚公之盛德予因作二詩以陳其
梗槩云

除戎堂主震威名一掃妖氛消未萌不出戶庭成
廟筭折衝樽俎有奇兵何須公瑾長江險安用蒙
恬萬里城坐鎮大河兵偃息居延不復塞塵驚

除戎廳事築城阿烽火平安師旅無和遠勝長城欺
李勣徒標銅柱笑伏波服心不用七擒策禦侮何
勞三箭歌高枕幽窗無一事西人不敢牧長河

寄武川摩訶院圓明老人五首

臨行不暇別圓明禪客機閑百變生明月清風都
不會落花流水兩無情只知嘗謁摩訶院誰道曾
離歸化城賓主想忘非聚散笑談松竹自清聲
新詩入手眼增明老作機鋒太峻生略序寒溫閑
禮數過承褒賞假人情羨君奮迅超真地笑我徘徊

徊戀化城且喜武川歸海若狂流萬派盡消聲

我愛圓明道眼明簡書時復寄鯁生談真辨妄輸

達士背正歸邪笑世情且隱驪珠光萬丈奚貪尺

壁價連城穹廬高枕無餘事靜聽潮轟北海聲

歸與不得效淵明細碎功名誤此生客裏政和閑

氣味病來猶有好心情冰絲罷品昭君曲醉墨閑

題蘇武城受用觀音法無盡悲笳風送兩三聲

一扇儒風佛日明含生從此樂餘生高人編簡尋

長策衲子林泉稱野情見道穀帛充廩藏喜聞流

散集京城自慙無德毗明主千里虛名浪播聲

和李漢臣韻四首

夢中身世鬢垂斑方士從誇藥駐顏性海一波含
萬象威音雙箭透重関圓融月水非生滅浩渺虛
舟任往還便好灰心養愚拙須知大智本閑
飛龍登九五曆教與天膺休運綿衣礎功臣列土
封但期鼎子志奚慮枕吾肱千載聖人出休嗟見
有恒

雲中棲隱養雄豪我愛先生一着高鼓腹詩鳴光

聖世雄文端可繼離騷

龍庭十載不知疲自恨無才出六奇欲著塵埃稗

海嶽虛名門譽畏人知

和北京張天佐見寄

寓跡龍庭積有年功名已後祖生鞭銷金衆口嫉
居士好事獨君慕湛然許遠雲山分袂別幾時風
雨對林眠瓊華贈我將何報聊寄江南古樣絃

戊子繼武川劉搏霄韻

不得吾山卧翠霞西行、遍海之涯火風地水雖

非我南北東西總是家
駟騎親馳涉弱水星軺躬
駕過流沙唯期聖德漸遐邇
不憚龍庭萬里賒

懋解州邵薛村洪福院

天兵南出武陽東
暫解征鞍懋梵宮
玉像巍紅
葉捧金容爽
碧紗籠三秦繁盛如席卷
西晉風流掃地空
唯有真如元不壞
青山依舊白雲中

邵薛村道士陳公求詩

玄言聖祖五千言
不說飛昇不說仙
燒藥煉丹全是妄
春霞服氣苟延年
須知三教皆同道
可信重

玄也是禪趨破異端何足算
紛皆是野狐涎

過金山和人韵三絕

金山突岬翠霞高
清賞渾如享太牢
半夜穹廬伏枕卧
亂雲深處野猿號

金山前畔水西流
一片晴天萬里秋
灘月團東嶂翠幃
高掛水晶毬

金山萬壑闐聲清
山色空濛弄晚晴
我愛長天漢家月
照人依舊一輪明

謝王巨川惠臘梅因用其韻

雪裏冰枝破冷金前村籬落暗香侵令人多謝王
公子分惠幽芳寄好音

和王巨川題武成王廟

商辛自底滅亡期僅障全空聚蠶絲誰識華山歸
馬日易于渭水釣魚時

又用韻

不遇知音鍾子期逢人未敢理冰絲年來忘盡悲
風操空憶傷麟歎鳳時

又一首

今年色從入西秦山色猶如昔日新詩思遠隨秦
嶺雁征衣全染灞橋塵含元殿壞荆榛古花萼樓
空草木春千古興亡同一夢：中多少未歸人

和景賢七絕

一曲悲風和子彈穹廬聊復助清歡自慙未盡桐
君趣老境方知道愈難

龍庭十載典南訛再品朱弦韻未和美漣千鍾聊
當酒純音三弄且充歌

今日邊城又見君試彈流水藝棋魂聲和塞色金

微潤香散穹廬玉鼎温

雅操真堪坐廟堂積年仁義佐賢王鳴琴談笑澤
天下始信斯文天不亡

桐孫元採嶧陽林萬里携來表素心聊爾贈君為
土物也教人道有知音

年來衰老四旬餘願與人間萬事疎惟有琴魔降
不得鳴球憂玉澈清虛

一作箏來心
地未清虛

知音重過已忘憂况復邊山七月餘聯句絃歌清
夜樂人生適意亦何羞

又四絕

年來世事已參商但有聲塵尚未忘若向琴中定
優劣龍岡錯認老髯郎

撫弄桐君樂自然寥々古意詎容傳伯牙點檢真
堪笑不遇知音便絕絃

幽人寥落思無窮付與軒昂一曲中欲罷不能行
且止泣麟嗟鳳鼓悲風

接得新詩想咳談奇才獨步斗之南縱橫風月輸
君手惟有枯禪不許參

和景賢二絕

嘗許景賢黃華墨跡景賢寄詩督予因和其韵以戲之

醉時還許醒時無諺有斯言正謂予未得素撼白如雪等閑難與右軍書

龍岡才德古來無敏捷新詩正起予詞翰雙全妙天下銀鈎深似魯公書

和高冲霄二首

十里東風渭水春臨風酌月弔英魂直須立事書麟閣何必題詩寄雁門

翠華南渡濟蒼生垂老將觀德化成昨夜行宮傳

好語秦川草木也忻榮

過天山和上人韻二絕

從征萬里走風沙南北東西總是家落得胸中空索、凝然心似白蓮花

一入空門我暢哉浮雲名利已忘懷無心對鏡誰能識優鉢羅花火裏開

過覃懷二絕

十年寥落隱穹廬驛使空來好信無再過覃懷覓陳跡冰魂無恙影扶疎

信斷江南望驛塵十年辜負嶺頭春而今重到
羣懷地却與梅花作主人

王屋道中

雪嶺風林渡古關畫圖曾見晉名賢而今好倩丹
青手添我龍鍾一湛然

過天德用遷上人韻

行盡中原二百州黃能徃不吞鈎而今再出天
山道收拾輪竿北海游

贈遼西李郡王

我本東丹八葉花先生賢祖相林牙而今四海歸
皇化明月青天却一家

題張道人扇二首

誰裁雲扇綴春梭招引微涼枉費工何似踏開真
境界普天匝地起清風

真空境界本如：病眼生花認畫圖至道絕形剛
着面太虛無面更添鬚

題古并覃公秀野圖

流水潛穿屋下籬青山屋下數峰奇佳園已有温

公句何必袁公更寫詩

題昭上人松菊堂

晴烟蒼節出墻青斜日黃華隔檻明松菊尚存歸
未得湛然真箇太憨生

題平陽劉子寧玄珠堂

玄珠失却已多時縱使離婁枉用眉誰識這些閑
挨子再三撈撓始應知

題誌公圖

昔傳難貌誌公真我道斯言尚未親利、塵、無

處避丹青也是本來人

題黃山墨竹便面

黃山落筆露全機底箇團圞太崛奇點破本來真
面目何妨節外更生枝

請住東堂

雲中豪俊構東堂便請禪師早發裝自有東山鐵
餽餽不妨拈出大家嘗

請倪公

倪公本是我同叅道價崢嶸冠斗南千里雲山舊

游地何妨杖錫住西菴

請照老住華塔

華塔當年隱螯龍轟雷掣電滿雲中而今却請還
山去折脚鐺邊煮曉風

華塔照上人請爲功德主

晉陽名利僅千區華塔叢林冠一隅今日請予來
領畧他年乞我一禪廬

請巖公禪師詣天德作水陸大會

禪師久住賀蘭山心與白雲自在閑便好因風到

人世化為甘露滿人間

和賈搏霄韻二絕

舉世昏：似醉眠悲哉不肯救頭然祖師點破新
関揆直指人心教外傳

西菴談道頓忘眠今日相逢亦偶然欲問瞿雲端
的處燈籠露柱却能傳

和高麗使三首

神武有為元不殺寬仁常愧數興仁戎綏武震誠
無敵重譯來王四海同

揚兵青海西涼滅渡馬黃河南汴空百濟稱藩新
內附馳輶來自海門東
壯年吟嘯巢由月晚節吹噓堯舜風兩鬢蒼々塵
滿眼東人猶未識髯公

夢中偶得

我愛湖山好茅齋遠澗泉道人閑受用不使半文
錢

和武善夫韻

佐主焦勞力已殫微才安可濟時難開尊北海希

文舉携妓東山笑謝安雨露新恩君責重桑榆老
境我年殘何時致政閭山去三徑依然松菊寒
秋霖初霽覺新涼午夜東山月吐光翠竹無心甘
晚節黃花有意助年芳忠誠自許一心赤老境誰
憐雨鬢霜遙憶我山歸未得故人書簡怨東陽

題寒江接舫圖

一派瀟湘萬里山閑騎凍驛點江天風帆雪棹知
多少認取華亭沒底舫

題黃梅出山圖

祖佛不識中山主良才可惜遭斤斧肩擔明月過
前峯一時忘却曹溪語

夢中贈聖安澄老

一束三人作一團了無前後亦無偏幾乎笑殺龐
居士擬問如何便着拳

跋定僧巖

玉巖三尺碧玲瓏入定僧迷一色功打入無明山
鬼窟不知何日透真空

詠探春花用高冲霄韻

風拂新芳映短牆典刑依約類丁香梅花欲謝渠
先坼消得東君為汝忙

寄休林老人

一禪客論洞山公案渠謂洞山果有契榛分因作頌以寄之

世上元無真是非叢林禪客自多疑此詩寄向并
州去笑倒休林老古錐

過濟源登裴公亭用閑老人韻四絕

一抱青山挿碧空平湖春水碧溶溶裴公亭畔千
竿竹撩我詩情得濃

珍玉參差照座寒閑佳句繼香山有樂天詩湛
碑在焉

然不揆真堪笑也敢題詩列壁間
繚垣喬木碧參天松竹蕭蕭翳鏡潭他日携琴來
隱此林間乞我一禪菴
碧湖風定水痕平雪竹幽禽自好聲我羨清源高
隱士干戈人世不知兵

再用前韻

山接晴霄水浸空山光灑灑水溶溶風迴一鏡揉
藍淺雨過千峰潑黛濃
掀髯坐語閑臨水仰面徐行飽看山竹裏忽聞春

雪落天教着我畫圖間

侍中菴底春山色裴老亭邊秋水聲修竹茂林真
隱地但期天下早休兵
劫外玄機好細參他年卜築遠澄潭琴書活計無
多子祇與龍岡共一菴

復用前韻

水影連天：渺：山光和水：溶：一林脩竹搖
雲碧百畝涼陰蔽日濃
門外回環皆碧水亭中坐卧得青山凭欄盡日搜

新句思入烟霞縹緲間

幾時投老謁同叅擬向君王乞鏡潭飯了遨游客
膝處裴公亭與侍中菴一作爛賞裴公亭畔
竹帛來容膝侍中菴
四海干戈尚未平不如歸隱聽歌聲情知文武都
無用讀罷詩書不學兵

再和西菴上人韻

不在尋求不在叅誰分西北與東南雲川試入西
菴去三聖元來共一菴

請真老住華塔

華塔叢林久席虛真公予請肯來無湛然拙偈呈
君去便好携瓶倒上驢一作笑倒當
年十萬夫

請玉公住太原開化

大愚不了戾兒孫開化重興政賴君便請踏開關
挨子何妨地灸與天薰

和薛伯通四絕

黃花紅葉滿秋山月浸銀河夜未闌寂寞梧桐深
院落有人何處倚闌干

碧山粧點塞天秋老盡黃花蝶也愁拚醉東籬顛

倒舞人間富貴一何樓

衰年且喜志微伸鏡裏驚看白髮新何日得游雲
水去秋江鷗鷺淡相親
虛名羈我未能歸羞見冥冥一雁飛拜掃松楸定
何日不堪雙淚對君揮

和松菊堂主人昭老見寄三詩

松菊堂中老故人芝眉重謁我無因林松老節應
依舊籬菊寒英又一新

晉陽相遇亦前因分手歸來迹已陳松菊幽堂應

冷淡與君同話更何人

俊老茶毘四十年前身是我誤相傳香山聲價喧

天下爭似衰翁不會禪

未待謂予香山俊老之後身故以此解嘲云

洞山五位頌

正中偏

十月澄江徹底冰梅花江路破瑤英寒齋冷坐人
無寐雪映書窗一夜明

偏中正

區：游子因風塵就路還家觸處真芳草滿川莖

李亂風光全是故園春

正中來

石女翩翻鳥道飛
淵明琴上撫冰絲
緩歌初外陽
春曲慢舞盤中白雪詞

兼中至

涇渭同流無間斷
華夷一統太平秋
而今水陸車
舟混何礙冰人跨火牛

兼中到

水窮山盡懸崖外
海角天涯雲更遮
撒手轉身人

不識迴途隨分納些：

太陽十六題

識自宗

拈花老子徒饒舌
面壁胡僧太賺人
更著洞山行
過水吾宗從此永沉淪

死中活

百尺竿頭須進步
無明鬼窟好抽身
寒灰定爆真
奇味枯木花開別是春

活中死

韶老須彌論過失
廬陵米價認商量
可憐一粒靈丹藥
嚙下喉嚨命已亡

不落死活

白雲深處有滄波
半醉微醒笑更歌
孤艇往來無繫絆
陰晴天氣曝魚蓑

肯捨

人亡家破更何依
退步懸崖撒手時
去歲生涯無寸土
今年活計更忘錐

不肯捨

通方大隱好居廬
手段能如火裏蓮
九陌香塵烏帽底
一棹春水白鷗前

活分

垂衣端拱媿佳兵
文化優游致太平
昨夜濛濛春雨足
松筠花草一時榮

殺人劍

雪刃森森倚碧雲
佛魔凡聖總亡魂
水乾滄海魚龍死
火烈崑岡玉石焚

平常

寒來向火被添綿夏月臨風使扇
渴飲飢食隨分過閑中打坐困時眠

利道拔生

箇：既知迦葉富人：休怨釋迦慳破鎗煮得空
華寶甌裏盛將鐵漢食

言無過失

元知舌上無橫骨須信喉中有轉關喚鱉為龜人
不肯直教迦葉也眉攢

透脫

瀟湘一片蘆花秋雪浪銀濤無盡頭何處漁歌發
清響鷺絲飛出白汀洲

透脫不透脫

重陽九日菊花新妙契忘言不犯春收得安南夏
代北不知何日得通津

稱揚

從來箇事不囊藏利：塵：為舉揚近日令嚴誰
敢犯不教奪市與換行

降句

驚嶺點然全是影毗耶杜口本非真燈籠露柱呵
呵笑誤 浮生多少人

又

踈山住：莫忽：龍牙且無祖師意須信樸牛另
有方不犯鋒鎚震天地

方又圓

破船折棹殘蓑笠石女直鉤波上月方士徒誇鐵
作金道人祇要金成鐵

西域嘗新瓜

西征軍旅未還家六月攻城汗滴沙自愧不才還
有幸午風涼處剖新瓜

天德海上人寄詩用元韻

知子無心謁五侯浮雲富貴豈能留華亭夜靜西
風軟萬頃滄波浸月鉤

寄白雲上人用舊韻

上人別後未能叅一首新詩自北南蕭寺深沉香
火冷白雲閑鎖舊禪菴

武川摩訶院請為功德主

昔日南游又五春馬蹄踏遍武川塵而今却到經
行處且與摩訶作主人

和房長老二絕

只識瓶盤不識金瓶盤釵釧本真金一從打破疑
團後物：頭：總是心

生死與涅槃都如昨夢耳覺後笑呵：無彼亦無
此

過平陽高庭英索詩強為一絕

一川秋色滿東籬雁字行：自寫悲試問省菴何

所省黃花紅葉總堪詩

湛然居士文集卷第八

醉義歌

遼朝寺公大師者一時豪俊也賢而能
文尤長於歌詩其旨趣高遠不類世間
語可與蘓黃並驅爭先耳有醉義歌乃
寺公之絕唱也昔先人文獻公嘗譯之
先人早逝予恨不得一見及大朝之西
征也遇西遼前郡王李世昌於西域予
學遼字於李公暮歲頗習不揆狂斐乃

譯是歌度幾形容其萬一云

曉來雨霽日蒼涼枕幃搖曳西風香困眠未足正
展轉兒童來報今重陽吟貌蒼：渾塞色客懷衰
袞皆吾鄉歛衾默坐思往事天涯三載空悲傷正
是幽人歎幽獨東隣携酒來茅屋憐予病竄伶仃
愁自言新釀秋泉麪凌晨未盥三兩卮旋酌旋斟
折欄菊我本清癯酒戶低羈懷開拓何其速愁腸
解結千萬重高談幾笑吟秋風遙望無何山色好
飄：漸遠塵寰中淵明笑問尔逐事摘仙遥指華

胥宮華胥咫尺尚未及人間萬事紛：空一器總
空開一器宿醒未解人先醉携樽挈榼近花前折
花顧影聊相戲生平豈無同道徒海角天涯我遐
棄我愛南村農丈人山溪幽隱潛脩真老病猶耽
黑甜味古風清遠途猶述喧囂避遯巖麓僻幽間
放曠雲泉濱旋舂新黍爨香飯一尊濁酒呼予頻
欣然命駕忽：去漠：霜天行古路穿村迤邐入
中門老幼蒼忙不寧處丈人迎立瓦盃寒老母自
供山菓醋扶攜齊唱雅聲清酬酢温語如甘澍謂

予綠鬢猶可需謝渠黃髮勤相諭隨分窮秋搖酒
卮席邊籬畔花無數巨觥深斝新詞催閒詩古語
玄關開、懷囑酒謝予意村家不棄來相陪適遇
今年東鄙阜黍稷馨香棲畎畝相邀斗酒不淡旬
愛君蕭散真良友我酬一語白丈人解釋羈愁感
黃耇請君舉盞無言他與君却唱醉義歌風雲不
與世榮別石火又異人生何榮利儻來豈苟得窮
通夙定徒奔波梁冀跋扈德何在仲尼削跡名終
多古來此事元如是畢竟思量何怪此爭如終日

且開樽駕酒乘杯醉鄉裏醉中佳趣欲告君至樂
無形難說似泰山載斷為深杯長河釀酒斟酌之
迷人迷客世無數呼來拍耳克罰卮一盃愁思初
銷鑠兩盞迷魂成勿藥爾後連澆三五卮千愁萬
恨風蓬落胸中漸得春氣和腮邊不覺衰顏却四
時為馭馳太虛二曜為輪輾空廓須臾從轡入無
何自然汝我融真樂陶、一任玉山頽藉地為茵
天作幕丈人我語真非真、今此外何足云丈人
我語君聽否聽則利名何足有問君何事徒劬勞

此何為卑彼豈高蜃樓日出尋變滅雲峰風起難
堅牢芥納須彌亦閒事誰知大海吞鴻毛夢裏蝴蝶
勿云假莊周覺亦非真者以指喻指：成虛馬
喻馬兮馬非馬天地猶一馬萬物一指同胡為一
指分彼此胡為一馬奔西東人之富貴我富貴我
之貧困非予窮三界唯心更無物世中物我成融
通君不見千年之松化仙客節物登山身變石木
魂石質既我同有情於我何瑕隙自料吾身非我
身電光興廢重相隔農丈人千頭萬緒幾時休舉

觴酌酖忘形跡

題恒岳飛來石

無盡居士題恒岳之飛來石有偈云石落黃河北
山啣白日西聰明厭血食悔不值元珪天下稱頌
之為人磨毀字文漫駁不復識矣有仁上人自恒
山來請予復書是偈欲刊諸舊山之側予應之曰
無盡之妙言昭如日月與天地而齊終豈風霾之
能掩哉然不能拒上人之請勉為之書已 清明
日湛然居士漆水移刺楚才晉卿題

為慶壽寺作萬僧疏

竊以棲心物外已知四大之空寓跡塵中且賴十方之供矧五常尤尊於博施而六度首重於檀那不求郡國之英豪誰養林泉之跛挈芒鞋藜杖弗辭千里之勤糲食蔬羹好助萬僧之化謹疏

太原開元寺律為禪仍命予為功德主
因作疏

竊惟昔年開元今日為禪已蒙智老拈香又請湛然作主尋行數墨一緇教院家門運水般柴便有

叢林氣息謹疏

為石壁寺請信公庵主開堂疏

竊以達磨昔年莽鹵截鶴續見天寧今日顛預證龜作鼈可憐弄巧成拙不免出醜放乖我信公菴主受洞下之宗風佩却波天寧老人道號也之心印恭窮

行說不到處踏開偏正未分前既已降尊就卑何愧壓良為賤逢場作戲請來鬧裏刺頭借水獻花便好穩處下脚謹疏

王山圓明禪院請予為功德主因作疏

王山乃雪巖之故刹湛然實萬松之門人既是當
家本非生客春風秋月長聯萬葉之芳晨香夕燈
永祝一人之壽

萬卦山天寧萬壽禪寺命予為功德主因
作疏

唯萬卦之古刹實萬松之舊游有虛已

彥公飛書

請湛然作主勉為提領良慰殷勤山色水聲永作
道人活計漁歌樵唱偷傳衲子家風謹疏

請某公庵主住竹林疏

狐死首丘是難忘於熟處心空及第何猶迷於故
園我某公庵主三頓打不回頭一唱全無入耳喫
竹林飯病竹林矢嗣竹林法傳竹林禪打甌哄盆
莫忘竹林之重德披毛帶角好種竹林之道場

請湛公禪師住紅螺山寺疏

祖禰不了慚惶碧眼之老胡兒孫受殃架構紅螺
之大利既是將錯就錯不免拈空拄空我湛公禪
師韶陽遠孫摩訶嫡子穿透三句語擊碎十法門
便好住持更休推讓天嶺上只圖同看有毛龜絕

頂山頭且要共栽無影樹謹疏

請容公和尚住竹林疏

慶壽慈悲拽擺犁而耕種竹林蕭洒歎槽廠之空
閑已讓位而逃宜見機而作我容公禪師一條生
鐵脊兩片點銅唇叅透濟下沒巴鼻禪說得格外
無滋味話呵佛罵祖且存半面人情揭海掀山別
有一般閑挨試問孤峯頂上何如十字街頭若是
本色瞎驢好趁大隊既號通方水牯何必芒繩謹
疏

請智公尼禪開堂疏

用管仲則安用豎刁則危賢愚政事叅萬松則謗
叅延洪則讚冷暖人情行窮萬里山川只是一天
風月惟智公禪師本有丈夫志不學老婆禪拈却
花冠弗裝珍御可駭持牛生特便好出頭勿謂牝
雞司晨不敢下甯謹疏

代劉帥請智公尼禪住報先寺

劉公隣居報先

洗垢無緣乏遠井之救渴卜隣有德故近寺而敬
僧我智公禪師先禮報恩後叅奉福遠如舊總近

似新深澁鎖打開便請升堂啓戶明燈剔起願希
鑿壁偷光謹疏

請某庵主開堂疏

和尚拽碇子不離寺內老鼠拖胡盧只在倉中某
公庵主先謁報恩再參奉福升回斗轉圓倒教傾
十分利不圖半文一石禪獨攬八斗莫學淘沙去
米打破羅盆且來量土唱籌熱謾敵將謹疏

為慶壽寺化萬僧疏

隱迹林泉置死生於度外隨身瓶鉢寄口腹於人

間欲隆三寶之風強遣萬僧之化何須異味唯求
野菜淡黃齏不用多般只要山田脫粟飯謹疏

請亨公菴主開堂疏

亨公菴主久參萬松老人因緣不契再
謁王山大愚和尚不暮月罷參予過太
原王山寺僧請予作疏

萬松三頓不回頭王山一釣便吞鉤大愚不似大
愚老脇下三拳即便休

三學寺改名圓明仍請予為功德主因作

疏

本無男女等相着甚名模強分禪教者流且圖施設粵三學之巨利冠四海之名藍今改僧而舍尼遂從禪而革律邀印公為粥鉢頭請湛然作功德主根深蒂固常聯萬葉之芳地久天長永祝一人之壽謹疏

平陽淨名院革律為禪請潤公禪師住持
疏

竊以不居這那院好箇主人本無南北心悉為佛

子謹請懷仁潤老來住平陽淨名翡翠簾前請看木人之舞琉璃殿上願聞布鼓之音謹疏

太原五臺寺請予為功德主因作疏

鎮三晉之雄藩有五臺之古刹獻花酌水改律為禪具疏慇懃請予領畧謹命休林常祝壽結箇好因緣為報文殊莫放光不打遮鼓笛謹疏

請定公菴主出世疏

少林九年打坐祗得半提曹溪五派分開全沒一滴雖是將無作有也要弄假像真我定公菴主洞

下玄孫五臺嫡子解造無米粥能撫沒絃琴既已
灸地薰天須要掀天翻海正逢開花枉閑有力叢
林便好出頭莫戀無明鬼窟謹疏

大龍山永寧石壁禪寺請忘憂居士為功
德主代為之疏

唯明月清風取之無禁者况龍巖石壁命予為主
人煩我一心護持謝他兩手分付千岩好景半文
不費買山錢數帑間言一狀便充商稅契謹疏

代忘憂居士請琳公禪師住持壽寧禪師

疏

臨汝水之故邑有壽寧之巨藍歷代歸依百年煥
顯乞忘憂為功德主請琳公為粥飯人獨掌不浪
鳴單手豈成拍千年罕遇最難時節因緣一疏速
來便是衲僧巴鼻謹疏

為大覺開堂疏三道

竊以門裏安身已早荆棘漫地岩中宴坐更知過
犯彌天請來借座陞堂便好倩人問話引得轆轤
轉地問甚千遭萬遭快迭爐熬熟時盛搭一箇兩

箇

竊以雲門胡餅切忌咬嚼廬陵米價怎敢商量不
甘公案看訛正要作家批判伏惟粵公和尚佩聖
安之正印透韶陽之上関莫守命鬼窟中三彈不
動快橫身虎口裏一勘便招

竊以逢人不出、則便為人傍觀者哂逢人便出
出則不為人當局者迷直須一箭透重圍不得三
心或二意自甘入室渾如豹膽熊心不肯陞堂却
是虫頭鼠尾

司天判官張居中六壬祛惑鈴序

予故人張正之世掌羲和之職通經史百家之學
尤長于三式與予參商且二十年矣癸巳之春既
克汴梁渠入覲於朝形容變盡唯語音存耳乘閒
因出書一編曰六壬祛惑鈴予再四繹之引式明
例皆有所據或有隱與人所未通者釋以新說蓋
採諸經之所長無所矛盾者取其折衷為一家之
書近代未之有也求傳寫者既衆其同列請刊行
以廣其傳余忻然為引以題其端癸巳中秋日湛

然居士漆水移刺楚才晉卿序

苗彥實琴譜序

古唐棲岩老人苗公秀實其名彥實其字博通古今尤長於易應進士舉兩入御闈而不捷乃拂袖去之公善於琴事為當世第一嘗游於京師士大夫間皆服其高妙泰和中詔天下工於琴者侍郎喬君舉之於朝公待詔於秘書監予幼年刻意於琴初受指于待詔頭大用每得新譜必與巖棲商確妙意然後彈之朝廷王公大人邀請巖棲者無

虛日予不得與渠對指傳聲每以為恨壬辰之冬王師濟長河破潼關涉京索圍汴梁予奏之朝廷索棲巖于南京得之達范陽而棄世其子蘭挈遺譜而來凡四十餘曲予按之果為絕聲大率畧令衛宗儒之所傳也予令錄之以授後世有知音博雅君子必不以予為徒說云壬辰仲秋後二日湛然居士漆水移刺楚才晉卿序

答楊行省書

某再拜復書于行省閣下辱書諭及辭位事請聞

奏施行者惟聖代之深仁賞延于世偉閨門之內
助貴繫於夫故行省李公雖稽北覲之期頗著南
伐之績時不適願天弗假年伏惟閣下族出名家
世傳將種無兒女子之態有大丈夫所為吏民服
心朝廷注意遂授東臺之任冀舒南顧之憂今也
抑意陳書引年求退懼折鼎覆餗之患避牝雞司
晨之譏雖曰謙尊而光曷若隨時之義分茅列土
無忘北闕之恩秣馬厲兵可報西門之役今因人
回謹復書以聞山川遼濶書簡浮沉比獲瞻依更

希調護不宣

進西征庚午元曆表

臣楚才言堯分仲叔春秋謹候于四方舜在璣衡
旦暮肅齊於七政所以欽承天象敬授民時典謨
實六籍之大經首書其事堯舜為五帝之盛主先
務厥猷皎如日星紀之方冊由此言之有國家者
律曆之書莫不先也是以三代而下若昔大猷遵
而奉之星曆之官代有其人漢唐以來其書大備
經元創法無慮百家其氣候之早晏朔望之疾徐

二曜之盈衰五星之伏見踈密無定先後不同蓋
建都立國而各殊或涉歷歲年之寢遠不得不差
也既差則必當遷就使合天耳唐曆八從宋曆九更
者良以此夫金用大明百年總經一改此去中原
萬里不啻千程昔密今踈東微西著以地遙而歲
久故勢異而時殊庚辰聖駕西征駐蹕尋斯干城
是歲五月之望以大明大陰當虧二分食甚子正
時在宵中是夜候之未盡初更月已食矣而又二
月五月朔微月見於西南校之於曆悉為先天恭

惟皇帝陛下德符乾坤明並日月神武天錫聖智
夙資邁唐虞之至仁追羲軒之淳化冀咸神而底
義故奉天而謹時重勅行臺旁求儒者臣蟲魚細
物草芥微人粗習周孔之遺書竊慕羲和之陳迹
俎豆之事靡違諸已箕裘之業敢忘於心恨無命
世之大才誤忝聖朝之明詔欽承皇旨待罪清臺
五載有奇徒曠著龜之任萬分之一聊陳犬馬之
勞既校曆而覺差竊效顰而改作今演紀窮元得
積年二千二十七萬五千二百七十歲命庚辰臣

愚以為中元歲在庚午天啓宸衷決志南伐辛未之春天兵南渡不五年而天下畧定此天授也非人力所及也能故上元庚午歲天正十一月壬戌朔夜半冬至時加子正日月合璧五星聯珠同會虛宿五度以應我皇帝陛下命受之符也臣又損節氣之分減周天之杪去交終之率治月轉之餘課兩曜之後先調五行之出沒大明一失于是一新驗之於天若合符契又以西域中原地里殊遠創立里差以增損之雖東西數萬里不復差矣故

題其名曰西征庚午元曆以紀我聖朝受命之符及西域中原之異也所有曆書隨表上進以聞伏乞頒降玄臺以備行宮之用臣誠惶誠恐頓首頓首謹言

西游錄序

古君子南踰大嶺西出陽關壯夫志士不無銷黯予奉詔西行數萬里確乎不動心者無他術焉蓋汪洋法海涵養之效也故述辨邪論以斥糠粃少答佛恩戊子馳傳來京里人問異域事慮煩應對

遂著西游錄以見予志其間頗涉三聖人教正邪之辨有識予之好辨者予應之曰魯語有云必也正名乎又云思無邪是正邪之辨不可廢也夫楊朱墨翟田駢許行之術孔氏之邪也西域九十六種北方毘盧糠粃白經香會之徒釋氏之邪也全真大道混元太一三張左道之術老氏之邪也至於黃白金丹導引服餌之屬是皆方技之異端亦非伯陽之正道疇昔禁斷明著典常第以國家創業崇尚寬仁是致偽妄滋彰未及辨正耳古者羸

秦燔經坑儒唐之韓氏排斥釋老辨之邪也孟子闢楊墨予之黜糠粃立辨之正也予將刊行雖三聖人復生必不易此說矣己丑元日湛然居士漆水移刺楚才晉卿序

辨邪論序

夫聖人設教立化雖權貴不同會歸其極莫不得中凡流下士唯務求奇好異以眩耳目噫中庸之為德也民鮮久矣者良以此夫吾夫子云中人以下不可以語上也老氏亦謂下士聞道大笑之釋

典云無為小乘人而說大乘法三聖之說不謀而同者何哉蓋道者易知易行非掀天拆地翻海移山之詭誕也所以難信難行耳舉世好乎異罔執厥中舉世求乎難弗行厥易致使異端邪說亂雅奪朱而人莫能辯悲夫吾儒獨知揚墨為儒者患辨之不已而不知糠蟹為佛教之患甚矣不辨猶可而况從而和之或為碑以紀其事或為賦以護其惡噫天下之惡一也何為患於我而獨能辨之為患於彼而不辨反且羽翼之使得遂其姦惡豈

吾夫子忠恕之道哉黨惡佑姦壞風傷教千載之下罪有所歸彼數君子曾不捫心而靜思及此也耶予旅食西域且十年矣中原動靜寂然無聞邇有永安二三友以北京講王所著糠蟹教民十無益論見寄且囑予為序予再四繹之辨而不怒論而不縵皆以聖教為據善則善矣然予辭而不序焉予以謂昔訪萬松老師以問糠蟹邪正之道萬松以予酷好屬文因作糠蟹賦見示予請廣其傳萬松不可予強為序引以行之至今庸民俗士誇

歸于萬松予甚悔之今更為此序則又將貽謗于
講主者也謹以萬松講主之餘意借儒術以為比
述辨邪論以行世有謗者予自當之安可使流言
餘謗汙玷山林之士哉後世博雅君子有知我者
必不以予為囁嚅云乙酉日南至湛然居士漆水
移刺楚才晉卿序於西域瀚海軍之高昌城

寄趙元帥書

楚才頓首白君瑞元帥足下未審邇來起居何如
昔承京城士大夫教書發揚清德言足下有安天

下之志仍托僕為先容僕備員翰墨軍國之事非
所預議然行道澤民亦僕之素志也敢不鞭策駕
鈍以羽翼先生之萬一乎僕未達行在而足下東
從東旋僕甚快：夫端人取友必端矣京城楚卿
子進秀玉輩此數君子皆端人也推揚足下談不
容口故知足下亦端人也然此僕于足下少有疑
焉若夫吾夫子之道治天下老氏之道養性釋氏
之道脩心此古今之通議也舍此以往皆異端耳
君子尊儒重道僕尚未見於行事獨觀君所著頭

陀賦序知君輕釋教多矣夫糠蟹乃釋家之外道也此曹毀像謗法斥僧滅教棄布施之方杜懺悔之路不救疾苦敗壞孝風實傷教化之甚者也昔劉紙衣扇偽說以惑衆迄今百年未嘗聞奇人異士羽翼其說者夫君子之擇術也不可不慎今君首倡序引黨護左道使後世出陷邪歧墮惡趣皆君啓之也千古遺恥僕為君羞之糠蟹異端也輒與佛教為比萬松辨賦甘泉勸書反以孟浪巨蠹之言處之以此行已化人僕不知其可也僕謂足下

輕釋教者良以此也夫于所厚者薄無所不薄君既輕釋教則儒道斷可知矣君之于釋教重糠蟹于儒道則必歸楊墨矣行路之人皆云足下吝嗇故奉此曹圖其省費故也昔諸士大夫書來咸謂足下以濟生靈為心且吾夫子之道以博施濟衆為治道之急誠如路人所說則吾夫子之道亦不可行矣又将安濟生靈乎又君序頭陀賦云冀請宗師祈冥福以利斯民足下民之儀表也崇重糠蟹毀斥宗師将使一郡從風漸化斷知斯民罪惡

日增矣又將安以利斯民乎僕謹撰辨邪論以寄
幸披覽之更請涉獵藏教稽考儒書及復參求其
邪正之歧不足分矣僕素知君為邪教所惑亦未
敢勸諭君不以僕不才轉託諸士大夫萬里相結
為友故敢以區區忠告易曰方以類聚物以羣分
經云士有爭友故身不離於令名若知而不爭安
用友為若所尚不同安可為友或萬一容納鄙論
便請杜絕此輩毀頭陀賦板以雪前非如謂僕言
未當則請于茲絕交夏暑比平安好更宜以遠業

自重區區不宣

萬松老人評唱天童覺和尚頌古從容菴
錄序

昔予在京師時禪伯甚多唯聖安澄公和尚神氣
嚴明言辭磊落予獨重之故嘗訪以祖道屢以書
昔尊宿語錄中所得者叩之澄公間有許可者予
亦自以為為得及遭憂患以來功名之心束之高閣
求祖道愈亟遂再以前事訪諸聖安聖安翻案不
然所見予甚感焉聖安從容謂予曰昔公位居要

地又儒者多不諦信佛書惟搜摘語錄以資談柄
故予不敢苦加鉛鉅耳今揣君之心果為本分事
以問予：豈得猶襲前愆不為苦口乎予老矣素
不通儒不能教子有萬松老人者儒釋兼備宗說
精通辨才無礙君可見之予既謁萬松杜絕人迹
屏斥家務雖初寒大暑無日不叅焚膏繼晷廢寢
忘餐者幾三年誤被法恩謬膺子印以湛然居士
從源日之其叅學之際機鋒固測變化無窮巍
然若萬仞峯莫可攀仰滔：然若萬頃波莫能涯

際瞻之在前忽焉在後回視平昔所學皆硃礫耳
噫登東山而小魯登泰山而小天下者豈虛語哉
其未入閩域者聞是謂必謂予忘本好異也唯屏
山閑：其相照乎爾後奉命赴行在扈從西征與
師相隔不知其幾千里也師平昔法語偈頌皆法
隆公所收今不復得其藁吾宗有天童者頌古
百篇號為絕唱予堅請萬松評唱是頌開發後學
前後九書間閱七年方蒙見寄予西域伶仃數載
忽受是書如醉而醒如死而甦踴躍歡呼東望稽

頽再四披繹撫卷而歎曰萬松來西域矣其片言
隻字咸有指歸結款出眼高冠古今是為萬世之
模楷非師範人天權衡造化孰能與于此哉予與
行宮數友旦夕游泳于是書如登大寶山入華藏
海巨珍異物廣大悉備左逢而右遇目富而心飫
豈可以世間語言形容其萬一耶予不敢獨擅其
美思與天下共之京城唯法弟從祥者與僕為忘
年交謹致思書請刊行于世以貽來者廼序之曰佛
祖諸師埋根千丈機緣百則見世生苗天童不合

抽枝萬松那堪引蔓湛然向枝蔓上更添苾索穿
過尋香逐氣者鼻孔絆倒行玄體妙底脚根向去
若要脚根點地鼻孔撩天却須向這葛藤裏穿過
始得甲申中元日漆水移刺楚才晉卿序于西域
阿里馬城

評唱天童拈古請益後錄序

雪竇拈頌佛果評唱之擊節碧巖錄在焉佛果頌
古圓通善國師評唱之覺海軒錄在焉是臨濟雲
門牙相發揚矣獨洞下宗風未聞舉唱豈曲高和

寡耶抑亦待其人耶必有通方明眼判斷尚未晚也昔佛鑑拈八方珠玉集止及其半每至曹洞夾嶺石霜三宗機緣留付佛果今佛鑑佛果拈八方珠玉集其在愈可疑焉三大老後果有天童覺和尚拈頌洞下宗風為古今絕唱迄今百年尚無評唱者予忝承餘暇因請萬松老師評唱之欲成三宗鼎峙之勢忍拈覆餗貞吝之譏今評唱頌古從容菴錄已大播諸方評唱拈古請益後錄時老師年已六十有五矣循常首帶佛事人情罅隙之間

侍僧請益旋舉旋錄皆不思而對應筆成文凡二十七日百則詳備神鋒穎利於斯見矣若夫據令於臨濟棒喝以前發機于雲門三句之外豈更與佛果圓通殘餽爭長哉俊快衲子舉一明三瞥見全鼎則為仰法眼雙鉉亦宛然矣但恐信不及徒勞語歲寒也吁壬辰重陽日湛然居士漆水移刺楚才晉卿序于天山

燕京崇壽禪院故圓通大師朗公碑銘

師諱祖朗姓李氏薊州漁陽人九歲出家禮燕京

大聖安寺圓通國師為師大定十三年京西弘業寺受具至二十一年改弘業為大萬安禪寺有司承制師充知事厥後拂衣駐錫聖安復為舉充監寺崇壽禪院者實圓通國師退老之舊居也以師為宿舊之最承安間堅聽師為宗主任持一歷十稔又奉勅選香林禪寺開山提點凡三載勅賜總持大德答其勤也既而崇壽復請住持載閱五春貞祐間奉勅改賜今號度門徒凡十有一人咸有肖父之風焉師前後輔翼叢林不憚艱苦讓功責

已潛德密行不可槩舉師以壬午之仲冬十有四日示寂於崇壽僧臘五十三俗壽七十四師將順世預召其屬徒笑謂曰生緣我將盡矣屬徒退而相謂曰師神色自若：無他疾安得遽有是事耶後七日師命侍僧執筆代書頌云咄遮皮袋常無患害繼祖無能念佛有賴來亦無來去亦無礙四大各離一時敗壞且道還有不敗壞者麼良久云浮雲散盡月昇空極樂光中常自在語竟乃閉目跏趺而寂于是遐邇緇素弔祭如雲嘉聲遠震愈

光於生前矣其弟子輩瘞靈骨於師翁靈塔之左
去京城之南可三里許丁亥之冬予奉詔搜索經
籍馳傳來京有菴主志與者師之受戒弟子也晚
得法于聖安澄公圓照大禪師以僕素與朗師善
囑予求碑銘僕素愛師之純古洒落與之游者久
矣師嘗云予晚節愈堅于持誦日念彌陀聖號數
萬聲方止譬如抱河梁而浴又何害焉今聞師之
寂也七日預知時至雅符龍猛祖師之證無乃持
誦之驗與噫聖人豈欺我哉豈欺我哉萬松老人

為宗門之大匠四海之所式範素慎許可嘗贊師
之真曰德譽燭沉靈骨鏗金訥于言而敏于行璞
其貌而玉其心勅選授封于國寺天資飽練于禪
林子徒知寒蟬將蛻尚嫻餘吟吾以謂升圓通之
堂者稽古依然接武於方今云萬松見許如是人
可知已僕聞師侍從圓通國師最久而又臨終之
際超然自在疑必得法於國師或因緣未合或受
國師密訓不令出世亦石霜素侍者之儔侶與崇
壽禪院方丈法堂叢林制度一如聖安師久據而

不請禪伯住持者亦猶素侍者平欺老黃龍下視
堯率悅之意與予恐後世明眼人責備于賢者累
師之重德故雪之於此後之子孫當幹父之蠱毋
蹈前轍以玷師之高名焉湛然居士再拜而作銘
曰
偉哉朗公誕跡漁陽師侍圓通達與穿堂肅然宸
命屢投國寺退已讓人舉廢修墜兒孫衆多酷奉
彌陀心期極樂迹厭娑婆擺手便行預知時至臘
五十三壽七十四奔喪赴祭緇素駢闐嘉聲遐播

愈盛生前京南之原茶毘靈骨素答陵空朗師不
歿佯癡放憨素公同泰蔑視堯率平欺匾南不邀
宗匠冷閑方丈垂手無人老殘龍象予聞君子責
備乃賢母以微瑕累乎大全云子云孫幹父之蠱
載震師名永揚萬古
庚寅年六月望日

貧樂庵記

三休道人稅居於燕城之市榜其庵曰貧樂有湛
然居士訪而問之曰先生之樂可得聞與曰布衣
糲食任天之真或鼓琴以自娛或觀書以自適詠

聖人之道歸夫子之門於是息交絕游賓客萬慮
泯絕無毫髮點翳于胸中其得失之倚伏興亡之
反覆初不知也吾之樂良以此耳曰先生亦有憂
乎曰樂天知命吾復何憂居士進曰予聞之君子
之處貧賤富貴也憂樂相半未敢獨憂樂也夫君
子之學道也非為己也吾君堯舜之君吾民堯舜
之民此其志也使一夫一婦不被堯舜之澤者君
子恥諸是故君子之得志也位足以行道財足以
博施不亦樂乎持盈守謙慎終如始若朽索之馭

六馬不亦憂乎其貧賤也卷而懷之獨潔一己無
多財之禍絕高位之危此其樂也嗟流俗之未化
悲聖道之將頽舉世寥々無知我者此其憂也先
生之樂知所謂矣先生之憂不其然乎道人瞪目
而不答居士笑曰我知之矣夫子以謂處富貴也
當隱諸樂而形諸憂處貧賤也必隱于憂而形諸
樂何哉第恐不知我者以為洋々于富貴戚々于
貧賤也道人曰他人有心予忖度之吾子之謂矣
請以吾子之言以為記丙子日南至湛然居士漆

水移刺楚才晉卿題

自贊二首

別來十年五歲依舊一模一樣髭鬚垂到腰間眉
毛儼然眼上龜毛錐子畫虛空寫破湛然閑伎倆
有髮禪僧無名居士人道甚似我道便是塵、刹
刹露全身紙上毫端何處避

燕京大覺禪寺新建經藏疏

遼重熙清寧間築義井精舍于開陽門之郭傍有
古井清涼滑甘因以名焉今朝天德三年展築京

城仍開陽之名為其里大定中寺僧善祖有因緣
力道俗婦嚮者衆朝廷嘉之賜額大覺貞祐初天
兵南伐京城既降兵火之餘僧童絕迹官吏不為
之恤寺舍悉為居民有之戊子之春宣差劉公從
立與其僚佐高從遇輩疏請與公和尚為國焚脩
因革律為禪與公罄常住之所有贖換寮舍悉隸
本寺稍成叢席可容千指瑞像殿之前無垢淨光
佛舍利塔在焉殘缺幾仆提控李德者素黨于糠
蟹不信佛教至是改轍施財完葺其塔繼有提控

晉元者施蔬圃一區于寺之南以給衆用糊口粗
給庚寅之冬劉公以狀聞朝廷招提院所貯餘經
一藏乞遷於本寺安置許之于是與公轉化檀越
創建壁藏斗帳龍龕一週凡二十架飾之以金繪
之以彩窮工極巧煥然一新計所費之直白金百
笏能事告成累書請湛然居士為記予慨然曰昔
者聖人之藏書也貯之以金櫃寫之于琬琰重道
尊書以示於將來也浮屠氏之建寶藏者亦猶是
乎吾夫子刪詩定書明禮贊易六經之下流為諸

子春秋以降散為史書較其卷軸不為不多矣兵
革以來率散落于塵埃中吾儒得志於時者曾無
一人為之裒集置之淨室安之寶架豈止今日也
哉成平之世間有儒冠率集士民脩葺宣聖之廟
貌者曾未卒功已為有司糾劾矣且以擅興之罪
罪之噫吾道衰而不振者良以此夫昔雪岩示寂
於王山時萬松老人方應詔住持仰嶠訃問既至
不俟駕而行遇完顏子玉諸途子玉歎曰士人聞
受業之師物故也雖相去信宿之地未聞躬與其

祭者豈有千里奔喪者耶佛祖之教源遠流長者
有自來矣子玉屢以此事語及士大夫今與公禪
師非為子孫計無取功名心汲；皇；丐乞于道
路唯以佛宮秘藏為務可謂不忘本矣余已致書
於諸道士大夫之居官守者各使營葺宣父之故
宮亦有與公激之也云癸巳中秋日記

湛然居士文集卷第九

和張敏之詩七十韻三首

敏之學士遠寄新詩七十韻捧讀之餘
續貂以尾聊資一笑

壯年多轍軻晚節歎行藏故國顏綱穢新朝明德
香雄材能預筭大畧固難量迭出神兵速無敵我
武揚本圖服叛逆何止剪濤張西討窮于闐東征
過樂浪彗侵天壘壁光動太白鉉整車徒盛鱗
鱗旗鼓望天皇深責重賢帥廟謨滅江左將禽楚

河陽已滅商英雄皆入彀強禦敢跳梁採訪軒車
開司農官吏忙輕徭常力足薄賦不財傷勲業超
秦漢規模邁帝王流言無管蔡奇計有平良增葺
新文物耕耘古戰場蛟龍方奮迅鷓鴣得翱翔偶
遇風雲會爭依日月光永醅千古恥一怒四夷攘
虎帳十年夢龍庭幾度霜迎降初請命出郭遠相
將久敵直宜死寬恩何一作未敢當赦書民有幸歌
詠壽無疆扶杖聽黃詔稱觴進白狼散財竭庫藏
拔將作戎行殷絕仁猶在周傾道不亡來招燕郅

內入覲大食傍戎服貂裘紫星軺駸馬蒼中春辭
北望初夏過西涼瀚海凶而湧陰山徬且徨閑雲
迷去路疎雨潤行裝出處空興歎風光自斷腸典
刑陳故事利病上封章天下援深溺中州冀小康
風俗承喪亂籌策要優長痼疾如神附游魂笑鬼
張仁術能骨肉靈藥起膏肓避禍宜緘口當言肯
括囊遭譏心欲剖涉苦膽先嘗北漠絕窮域西隅
抵大洋詩書猶不廢忠信未能忘羶補連腮帳繩
穿朽脚牀郊行長野興人靜若禪房回鶻交游熟

崑崙事跡詳風煙多黯：雲水兩茫：災變垂乾
象妖氛翳太陽髯龍三島去玉葉一枝芳明主初
登極愚臣敢進狂九疇從帝錫五事合天常大樂
陳金石朝服具冕裳降升分上下進退有低昂拓
境時方急郊天且未遑應兵無血刃降虜自壺漿
安堵無更肆因敵不餽糧宸心尊德義聖政濟柔
剛恩澤涵諸夏威稜震八荒勢連西域重天助北
方強舉我陪三省求賢守四方錦衣捐毳褐肉食
棄糟糠隱逸求新任流亡集故鄉百官欣戴舜萬

國願歸唐耕釣咸生遂工商樂未央會將封泰岳
行看建明堂每歎才雕篆長慙學面墻君恩予久
負賢路我深妨覆餗恒憂懼持盈是恐惶故山松
徑碧舊隱菊花黃太守方遺馬初平政牧羊厚顏
居此位若已納于隍吟嘯須歸去香山老侍郎

再用張敏之韻

我愛張公子丁年密退藏施為宜法則議論自馨
香元氣却不死深陂豈可量兒時供府薦壯歲已
名揚汲：尊尼父堂：類子張遷居擇鄰里濯足

棟滄浪作傳編毛穎談玄說劍鏗奇才千古重令
聞萬民望氣壓四明客詞窮三耳臧典謨師我舜
雅頌起予商綿叢曾陳漢仁術屢說梁本非中酒
困長為和詩忙道長茹連拔時衰心獨傷篆文道
似李穎字楷如王青眼予能作白眉君最良萬言
陳國利一戰捷文場出海游龍舞騰空翥鳳翔十
全君子行一代士林光句法吾師範詩材我竊攘
忠心常向日直節欲凌霜文沒歲久云道亡天未
將在瀾時既倒木鐸予宜當德業能純粹學術靡

理疆衝天憎燕雀當路惡豺狼綺語吟千韻宸意
埽十行行藏闕治亂出處卜興亡郡隸清河上家
居杜曲傍登科年甫冠修史鬢初蒼仙觀嘗新欠
宮園醉晚涼朝天恭踖踏退食獨彷徨得暇多休
沐游山小治裝一卮持竹葉左手把無腸官酒澆
三斗宮詞唾百章阮聲師校尉琴訣受嵇康似玉
風神異如蘭氣味長坦懷無戚：明見笑張：草
檄堪醫疾鍼詩可治盲博聞敵武庫高價重珠囊
憂患經多故艱難已備嘗悲歌聲歷：雅調韻洋

洋造次必於是中心何日忘生涯
兩書篋香火一禪牀海上尋徐福
壺中覓長房流傳雖若此真偽
甚難詳水國波奔激仙鄉路渺茫
孤身朝北闕皓首嘆東陽
險韻嚼佳句殘英嗅冷芳
仁人今尚在箕子本佯狂
洪範明皇極彝倫叙有常
百王遺禮樂三代舊軒裳
會補南極缺能令北斗昂
無媒言嚅嗚失志思迴遑
秋老空悲扇天涼反賣漿
却來頻渭釣又絕在陳糧
志道衰猶夢依仁老更剛
故家三徑遠薄土一廛荒
混：常無捨乾：體自強

率躬能省已行道不踰方
寧恥身衣褐誰嗟日食糠
起歌明月夜舒嘯白雲鄉
綺夏終辭漢巢由回避唐
名極得三者柴立杙中央
榮遇傳金馬題名刻玉堂
未窺君所蘊徒見子之墻
遣欲絕形累無貪不行妨
一瓢渠樂逸陋巷我憂惶
犧易韋編暗麟經古卷黃
著述遵輔嗣去取笑公羊
再辨麟絕筆重箋城復隍
焦桐人不識獨有蔡中郎

讀唐史有感復繼張敏之韻
頗有脂粉氣息遷就聲韻故也呵：

唐室成平久遺賢不遁藏羅紈柔幄膩餅餌麥疇
香馮牧初蕃息民編莫校量邊臣閑虎畧衛士歛
鷹揚禁苑晨鐘動梨園錦障張披香風細：太液
水浪：河漢明方潤長庚淡不銜羽旄儀兩列冠
蓋道相望諫士陳休戚廷臣論否臧金石歌大雅
琴瑟奏清商青鳥迷鴛瓦烏衣遠畫梁供張官府
備殺饌大官忙共享清時樂殊無謗議傷含元朝
百辟花萼宴諸王主上貞觀聖官僚魏鄭良歲餘
開武講春首闢文場異寶浮淮水餘糧朽鳳翔諸

羗來入衛百濟請觀光關塞沉烽火鄉閭息寇攘
三春常若雨六月不飛霜聖德躋朝夕仁心本就
將俯知人意順仰視帝心當殲騎輕閑內精兵重
北疆朝廷潛巨蠹方鎮養貪狼粉面三千輩金釵
十二行持盈當忌滿居治不知亡相罷曲江去權
移林甫傍華清高岷：驪嶠碧蒼：金屋眠春曉
溫泉浴暮涼掖庭花慢慢閣道路彷徨宮監金犀
飾妖姬珠玉裝危弦驚醉耳哀調斷柔腸燈燭暉
鳩鵲絲篁沸建章奢淫幾桀紂純儉劣成康擊柝

宮城邃傳籌禁漏長謀懽長汲：沉醉若俵：未
悟薪及爇誰知病已盲人橫碧玉笛腰佩絳香囊
嶺表千山遠荔枝三日嘗仙衣吹渺：蓮舸泛洋
洋力士權誠重楊釗寵不忘承恩趨寶座奏事近
牙牀熒惑頻侵斗秋陽弗集房人心咸怨怒天象
不披詳易水聲嗚咽燕山水鬱茫盜賊充上郡輦
鼓起漁陽殺氣凌金闕繁霜殞玉芳環兒剛賜死
天子懼如狂戰士皆思變姦臣亦易常空閑塵羯
鼓誰舞舊霓裳忠義心徒順英雄志自昂翠華搖

曳：鸞馭去遑：禁鸞庖供豕邨民路進漿隘兵
蜀道險餽口益州糧靈武兵聲振汾陽意氣剛復
收京闕克重治寢園荒賊勢時深感官軍力益強
羽檄傳劍閣龍駕返南方御府仍無酒飢民尚噉
糠邛都求道士蓬島覓仙鄉符使將歸漢真妃猶
憶唐金釵分一敗鈿合擘中央揮涕春風殿傷心
秋月堂梧桐籠院砌桃李映宮墻佳夢真難得幽
懽頗有妨春宵成怨憶秋夜愈悲惶尚記脩眉綠
猶思半額黃強舒鸞被翠閑殺輦車羊陵谷俄驚

海滄浪已變隍臨風一色酒聊復酌三卮

次韻黃華和同年九日詩十首

黃華和同年九日詩以採菊東籬下悠然見南山為韻予愛而繼之前叙思歸之心後述泰玄之志所謂倒食甘蔗者也

秋香真可人不為無人改自慚寒昔盟東籬子空待我獨搖酒卮不得寒英採臨風望故園參商二十載

西風殘月秋有客嗟幽獨偶爾得香醪凄然憶霜菊世態屢遷變人生多逐復十年一夢中猶未黃梁熟

無花復無蝶不似今秋窮黃花歲：別九日年：同我居北海南子在西山東公子會何日一醉閑愁空

當年別吾山曾與黃華期富貴非予志卜築臨東籬今也違初心知我者其誰掛冠猶未遠寄此相思詩

浩然居士集卷九
無意戀三公有心辭駟馬洛陽失金谷閭山有別
野芳酒瀉盈尊秋香折盈把沉醉臥西風不讓梨
花下

汨沒紅塵中辜負黃華秋林泉與朝市試問孰為
優胡然久沉首令我心悠々酷思山水樂夢寐空
神游

歲月不我與彈指及衰年平生諳萬事抵死參重
玄因緣不可滯慎毋法自然兩邊都不立別有壺
中天

無知豈真知無見非真見遮照玄縱橫機關千萬
變虎口幾橫身臨敵經百戰三折為良醫一交學
一便

五流分洞下一派起湖南春水無心碧秋山着意
嵐林濟真顛漢曹山放酒酣許多閑伎倆子細好
生參

水外猶逢水山前更有山原知非內外更不在中
間測海總盈掬窺天見一斑樞機謾竭世一筆請
君刪

寄雲中東堂和尚

雲中種出火蓮花到底東堂是作家伏手骨樞腰
下劔笑人家具手中蛇三玄戈甲徒心亂五位君
臣莫眼花只遮須兒難理會草鞋包裹破袈裟

謝萬壽潤公和尚惠書

多謝堂頭遠賜書驚人才筆我難如承當禪髓心
無愧供養佛牙力有餘幼子可襲先父業游人却
到舊時居箇中消息誰能悉玉女乘風跨鐵驢

燕京大覺禪寺與公乞經藏記既成以詩

戲之

詞源老去苦無多強著閑文讚釋迦箇健兔毫生
月窟光明蠶紙出新羅金爐幾辦龍涎燼玉板十
分鳳墨磨此起科差真可笑湛然陪酒更陪歌新獲

紫玉板硯
于友人

寄龍溪老人乞西巖香

寄語龍溪老古錐西岩風韻我長思香錢緩發鳴
琴後瓦鼎濃薰入定時比擬梅魂祗獨步品量龍
腦可同馳湛然鼻孔遼天大穿過多時不自知

謝聖安澄公饋藥

一粒靈丹寄我嘗
湛然回簡謝西堂
救活一草真
難會藥病相治未易量
子細嚼時元不碍
淖淪吞下也無妨
聖安骨董知多少
賣弄千年舊藥方

和王正夫韻

壯年自笑鬢先霜
喜色眉間一點黃
退食紫宸居鳳閣
朝天丹闕列鴛行
功名必要光前古
富貴何須歸故鄉
濟世元知有仁政
活人不假返魂香

繼孟雲卿韻

歸與奚待鬢雙皤
無限間山聳岌嵯
萬壑松風思仰嶠
千岩煙雨憶平波
仰嶠平波皆燕然名利也
開基氣槩鯨吞海
遁世生涯鼠飲河
好買扁舟從此逝
醉眠江國一漁蓑

次雲卿見贈

濟、千官侍玉宸
尊賢容衆更親、
風雲際會千年少
天地恩施四海均
狩一蕪張掖亂南巡
重變大梁春車書
南北無多日萬里
河山一作會宇
同文軌宇宙新

和王正夫憶琴

道人塵世厭囂塵白雪陽春雅意深萬頃松風皆
有趣一溪流水本無心忘機觸處成佳譜信手拈
來攄妙音陶老無弦猶是剩何如居士更無琴

繼宋德懋韻三首

聖人開運億斯年睿智文明稟自天旁氏衣冠游
北海縱橫耕釣滿居延月氏入貢稱屬國日本觀
光列戶編威震西溟千萬里漢唐鴻業亦虛傳
笑我區區亦強為故園荒矣欲何之讀書測海持

螺測笑我窺天以管窺疲俗不禁新疾苦濫官難
撫舊瘡痍才微任重宜求退自有當途國手醫
廣平流落寓平城親老家貧強苟生炎漢蕭曹賢
政事李唐房杜美聲名進求高譽千金重退隱閑
身一葉輕應繼開元舊勳業華堂鐘鼓對長檠
和平陽張彥升見寄

天兵出雲中一戰平城破居庸守將亡京畿游騎
邏有客赴澶淵予嘗倅無人送臨賀姦臣與弒逆
時君遠遷播聖主得中原明詔求王佐胡然北海

游不得南陽臥寵遇命前席客星侵帝座萬里金山行三經玉門過于闐歲貢脩燉煌兵勢挫國維張禮義民生重食貨黜陟九等分幽明三載課小人絕覬覦賢才無輒軻功名本忌盈廟堂難久坐老矣盍歸來歸與可重和俯仰不必慙寬弘從面唾清濁自沙汰精麤任揚簸賦性嗜踈閑高眠樂慵惰蒼雞粗庖充黃犢足犁拖幼子事耕鋤老妻供碓磨隨分養餘齡雖飢而不餓

跋白樂天慵屏圖

三盃兀兀元如道一覺昏昏恰似真不識香山慵睡意知音自有箇中人

和請住東堂疏題

東堂不肯卧西堂珍御鮮食別樣裝枉費青帘三百尺雲中公子不來嘗

寄倪公首座

亨監逃海淹壘瓮隆老成龍過禹門獨有倪公尚癡坐幾時承繼萬松軒

寄呂飛卿

一試戎衣大定初達賢不得退閑居盟津既渡諸
侯喜親見王舟躍白魚

戲陳秀玉 并序

萬壽堂頭自汴梁來遠寄萬松老師偈
頌舊本有和節度陳公一絕云清谿居
士陳秀玉要結蓮宮香火緣賺得稍翁
搖舫棹却云到岸不須船嘻三十年前
已有此段公案湛然目清谿為昧心居
士者厥有旨哉僕未叅萬松時秀玉盛

稱老師之德業爾後少得受用皆清谿
導引之力也每欲報之秀玉竟不一染
指故作是詩以戲之

不見桃源路渺茫騎驢覓清谿招引到水鄉未當湛
然幸得餉飽吐也却須擘與些兒不肯嘗恰似真个

湛然居士文集卷第十

扈從冬狩

癸巳扈從冬狩獨予誦書於穹廬中因
自譏云

天皇冬狩如行兵白旄一麾長圍成長圍不知幾
千里蟄龍震慄山神驚長圍布置如圓陣方騎雲
屯貫魚進千羣野馬雜山羊赤熊白鹿奔青麋壯
士彎弓殞奇獸更驅虎豹逐貪狼御開有馴豹縱
之以搏野獸
獨有中書倦游客放下壇簾誦周易

用秀玉韻

甲午之秋秀玉殿學遠以新詩寄東坡
杖因用元韻謝之

七尺烏虬乳節堅清谿寄我：忻然敢輕黑鐵三
十兩遠勝黃金百萬錢好句君堪坡老敵清詩予
負定公先他年携此林泉去靜倚松軒誦大全

送西方子尚

西方子尚氣凌雲一見忘年各任真陰德傳家宜
有慶義方垂訓不違仁雄文固可魁天下確論曾

無詭聖人天產英才須有意好將吾道濟斯民

用樗軒散人韻謝秀玉先生見惠東坡杖

圓方頂足法高卑五九蒼：老節奇一日湛然獲
二寶東坡鐵杖寂通詩

和邦瑞韻送行

幸有和林酒一尊尚醞出于和林地爐煨火為君

溫昔年相見興三歎此日臨行贈一言士行莫忘

真報怨人情須信害生恩而今躍入驚人浪珍重

風濤過禹門

謝西方器之贈阮杖并序

了然居士素蓄東坡鐵杖洎地字號阮
真絕世之寶也天兵既克汴梁先生攜
二君來燕欲藏之恐不能終寶欲贈湛
然南北相去不知其幾千里慮中道浮
沉是以獻諸秀玉殿學田公奉御欲轉
致于予也甲午之秋陳田入覲果饋之
於我因亂道數語用酬厚意

睢陽三絕從來傳坡仙鐵杖為之先宋朝四美豈

易得地君神器稱乎賢了然居士隱洛渚讀書好
古有積年擒龍捉日獲二寶：之鑿棟屋壁穿龍
庭萬里壘山川欲來饋我嗟無緣將奪固與此理
玄慙慙携贈陳與田陳田今歲來朝天惠然出賜
穹廬前烏虬入手蒼壁懸恍然遺世如登仙長蛟
倚壁光娟：鱗介欲生如蜿蜒澄：秋月瑩朝鏡
須臾洗盡予腥羶足方法地頂法乾四十五節松
柏堅七尺烏金三十兩微篁瑟：鳴哀蟬雲頂織
織空腹圓十三玉柱鴻翩：耽：雲坐踞猛虎巖

巖山口雙：絃鐵君伴我游林泉足疾頓減衝雲
煙臨風三弄碎瓊玉清商秋水聲涓：安仁得此
如臨淵子聃求杖不惜錢湛然坐受匪勞力不勝
其服心胡然西方諷我求終焉故令二友相招延
抱桐扶杖閣山巔舉觴笑詠秋風邊了然居士作
鐵君傳云長
七尺重三十兩頂圓足方中有微篁凡四十五節
世傳嵇生造又云昔顯宗東宮時嘗讀東坡鐵杖
詩因召侍臣鄭子聃問杖之存亡子聃以在睢陽
為對因以數千緡購于張文定公之孫其孫藏之
於屋棟子聃竟不得一見云地字號阮亡宋之故
物天地玄黃此四阮為絕寶也秦和間秘于禁中
待詔安仁之姊以琴阮得入侍上以此阮錫之安
仁屢求之其姊以阮見寄舊制宮掖中侍人不許

與親戚通耗安仁冒法得之其
好事有如此者故予引用其語

繼希安古詩韻

垂盡絲綸不上鈎冥鴻高舉戈無由不圖垂譽流
千古安肯低眉謁五侯

和非熊韻

蠻觸功名未足誇掀髯一笑付南華他年擊破疑
團後始覺從來盡眼花

和非熊韻

藹：英聲鎮北州非熊人物本風流時逢佳客開

青眼久領元戎尚黑頭已發豐城神劍出休嗟暗
室夜光投驅兵經畧閔中了題遍長安舊酒樓

過深州慈氏院

今年扈從次饒溝暫解征鞍慈氏遊世變劫灰何
所有人隨兵火解能留堂：聖像孰曾識燁：真
詮詎可求醉墨淋漓灑塵壁使人知我過深州

用李君實韻

多病逢秋苦未宜天涯屈指故人稀塵飛滄海悲
人世夢斷黃糧笑錦衣靜樂浮榮難兩得宦情歸

興本相違高山流水無窮思撫弄絲桐為發揮

繼崔子文韻

崔子龍鍾亦可憐臨風相送我胡然君來玉塞三
千里予隱龍沙二十年美玉詎容藏韞櫝精金到
底入鈞甄他時定下搜賢詔先到河東汾水邊

繼武善夫韻

老子年來酷愛閑不堪白髮映蒼顏十年興廢悲
歡裏半世干戈寤寐間北闕欲辭新鳳閣東州元
有舊閭山熊經鳥引聊終老岩下踈松正好攀

鼓琴

宴息穹廬中飽食無用心讀書費目力苦思嫌哦
吟擣菹近博徒圍碁殺機深洞簫耗予氣纂筑惡
鄭音呼童炷梅魂索我春雷琴何止銷我憂還能
禁邪淫正席設棊几危坐獨整襟尋徽促玉軫調
絃思沉：清聲鳴鶴鸞古意鏘石金秋水洗塵耳
秋風振高林清興騰八表成連何必尋絃指忽而
忘世事如商參泥途視富貴晝夜等古今湛然有
幽居祗在閭山陰茅亭遶流泉松竹幽森：携琴

當老此歸去投吾簪

扈從羽獵

湛然扈從狼山東御閑天馬如游龍驚狐突出過
飛鳥霜蹄霹靂飛塵中馬上將軍弓挽月脩尾蒙
茸臥殘雪玉翎猶帶血糝糊駉駉嘶鳴汗微血長
圍四合匝數重東西馳射奔追風鳴鞘一震翠華
去滿川枕藉皆豺熊自笑中書老居士擁鼻微吟
弓矢廢向人忍恥乞其餘瘦兔瘠獐紫駝背吾儒
六藝聞吾書男兒可廢射御乎明年准備秋山底

試一如臯學射雉

狼山宥獵

扈從車駕出獵狼山園既合奉詔悉宥
之因作是詩

君不君武皇校獵長楊裏子雲作賦誇奢靡又不
見開元講武驪山傍廬陵脩史譏禽荒二君所為
不足法徒令千載人雌黃吾皇巡狩行周禮長圍
一合三千里白羽飛空金鏑鳴狡兔雄狐應絃死
翠華駐蹕傳絲綸四開湯網無掩羣天子恩波沐

禽獸狼山草木咸忻：

對雪鼓琴

君不見党侯賞雪斟羊羔蛾眉低唱白雲謠慷慨
尊前一絕倒高談濶論誇雄豪又不見陶穀開軒
收竹雪旋燒活火烹團月笑撚吟鬚吟雪詩冷淡
生活太清絕清歡濁樂爭相高至人視此輕鴻毛
嗜音酣酒元麓俗癖茶嚼白空劬勞龍庭飛雪風
淒冽天地糊糗同一色數卮美漣温如春三弄悲
風絃欲折酪奴歡伯持降旌詩聲歌韻不敢鳴党

武陶文都勘破真識此心無一箇

寄冰室散人

佳人元不是摩登幻術因循汚此生對雪解吟飛
絮句滅燈能審斷絃聲鳳樓瀟灑閑瓊管冰室深
沉冷玉笙好訪龍溪善知識傳燈何啻總持名三
尼長老道號
龍溪老人

寄平陽潤和尚

張彥升寄平陽潤和尚所著金盞兒十
首因作詩寄潤公

十首新詞寄我時淨名手段我獨知解將沒孔鐵
鎚子打就無聲金盞兒言外翻騰閑曲調劫前拈
弄古鈴鎚清河露布敝公案賺得衰翁一首詩

紅梅

以坡謂認桃無綠葉辨杏有青枝大麓
俗因潤飾其語成之

瘦損佳人冰雪姿天教粧抹入時宜小桃嫌鋪翠
雲葉踈杏驚看碧玉枝李白詩成怨妃子吳宮宴
罷醉西施而今辜負黃昏月只少西湖處士詩

天仙皎々素羅裳淡抹濃塗搥不妨酒暈半潮妃
子醉胭脂初試壽陽粧肯同桃杏迷蜂蝶本與松
筠傲雪霜顧影也應悲漢室臨風猶似怨三郎

吟醉軒

脩竹千竿五畝宮幽居活計興無窮清詞麗句梅
詩老白髮蒼顏歐醉翁洒墨疾書千首敏浮白痛
飲百尊空醉吟聞有香山老倒用顛拈意暗同

寄西菴上人用舊韻四首

別後無緣得再參新詩重寄代和南他年放我休

官去只向雲川結小菴

功名我已讓曹參又見曹參定五南布襪青鞋從
此始濟源聞有侍中菴

多幸松軒得罷參玉泉山水勝江南泉邊便作歸
休計何必香山覓舊庵

憶昔吾師萬松老也放晚參揚兵西北擊東南一聲霹

靂龍飛去尚有癡人宿草菴

和漁陽趙光祖二詩

巖廊深責忝疑丞位重材輕負寵榮猾虜七擒輸

葛亮奇謀六出愧陳平未行禮樂常如慙欲掛衣
冠似不情何日對君言我志夜闌秉燭笑談傾
生民垂欲陟春臺南斗妖氛絕點埃禮樂已隨前
代廢遺音猶怨後庭哀十年歎我垂垂老萬里憐
君得來此語縱無多忌諱緘題未可對人開

自贊

美髯中書白衣居士從他抹粉施朱一任安名立
字手中玉塵震雷音說盡人間無限事

再過太原題覃公秀野園

君實洛陽園花竹秀而野先生取此意開園臨古
社土階甃以石茅亭畧其瓦佳木碧雲搖清泉寒
玉瀉開軒叩琴筑撫景飛觴掌我來政秋晚殘英
折盈把粲然啓一笑琅然歌二雅將歸且裴回幽
尋未能捨呼酒盡餘興索筆為模寫緬懷溫國公
重名滿天下寥々二百年童卒傳司馬君侯築茲
圃如有所慕者晞顏々之徒子亦斯人也

和韓浩然韻

浩然以昇元寶器玉潤鳴泉二琴見贈

勉和來詩用酬厚意

標格雄：蘊藉深烏龍胸臆隱雷音一雙神器波
及我不負分全結義心浩然得四琴分二
一曲南風奏古宮坐神物愧無功千金厚意將
何報鶚表慙懃效孔融

張漢臣因入覲索詩

漢臣千里覲龍庭欲使天皇致太平十事便宜言
懇切三千貌虎令嚴明好籌廟筭如留相莫憶鱸
魚似季鷹一統要荒君勉力雲臺須占最高名

和謝昭先韻

失矣為劣得矣優遇流而行坎則留笑視紛：兒
女輩成是敗非徒相尤棄人所取：所棄獨識萬
松為出類本欲心空及第歸暮請晨叅唯一志浮
生迅速奔隙駒無窮塵劫元斯須叅透威音劫前
事花開枯木誰云枯河朔干戈猶未息西域十年
空旅食賢人退隱予未能鈞衡曠位虛名極真人
應運康世屯數頌寬詔垂絲綸沛然恩波淪骨髓
皇：四海咸蒙春漢唐疆守非為大戍守西臨玉

關界百濟稱藩過海門鄙語粗言其大槩天皇自
將辦多、天兵百萬涉長河京索為空汴梁下秦
皇漢武時能過凜、威聲震天宇不殺為功果神
武朔南一混車書同皇業魏、跨千古先生吾邦
之彥兮琴書而自怡悝挺松柏操磊落英雄姿明
正道無邪思一貫詩書繼先覺兩全才德真吾師
王謝來江左家學易道豈忘貽濟世須君展驥足
政要再鑿人耳目小子區、何所祝但願天衷俞
鶚奏

德恒將行以詩見贈因用元韻以見意云
國士朝黃屋無辭路八千徒嗟蘓子困誰識襮生
賢腰下無金印山中有翠烟英雄須有用勉力侍
中年

送文叔南行

李子敦純不入時而今失志又南歸縱無手內毛
生檄自有囊中菜子衣未得忠貞毗聖主且將甘
旨侍慈闈鷓雛不忘衝天志直待三年更一飛

和馮揚善九日韻

馮君今歲又離家攜手賡酬海一涯秦漢興亡真
夢寐蘓張軻莫吁嗟孔融座上尊盈酒靖節籬
邊菊有花何日公餘同此樂西風一醉泛流霞

示石州劉企賢

西州來索湛然詩笑點霜毫錄鄙辭底事行藏元
有數斯文否泰本由時碩材未信明君棄雅操何
慙暴吏欺此語頗涉人忌諱等閒勿使細民知

和劉子中韻

蓬山散人劉詡子中頗通儒幼依全真

出家今已還俗故有擇術不可不慎之
句

蓬山北海游珥筆陳良謀徒步而南來意氣凌馬
周貪吏亂法令如茨不可束子中有大志每甘跨
下辱他日得從龍其鋒誰敢觸今日君之來非為
五斗粟君子慎擇術痛恨陪全真調心正是妄堪
笑學鳥伸一日錯下脚萬劫含酸辛平生大夢中
不識菴中人一言贈吾子宗匠宜相親

李庭訓和予詩見寄復用元韻以謝之

忝位台司歲月深中書自笑不如岑
殷周禮樂真予事唐舜規模本素心
鄭五每慚難作相胥靡終欲強為霖
隴西妙語虛推獎舒卷寒窗盡日吟

和黃山張敏之擬黃庭詞韻

黃山無媒亦無梯蕭條白晝閑荆扉
凌晨端坐嗽玉池闌干首偕先生飢
惠然寄我黃庭詞湛然一笑幾脫頤
一鶴南翔一不飛十年一夢今覺非
故山舊隱蒼松歌而今老盡虬龍枝
曾學四老食紫芝從譏懷寶而邦迷
塵緣一掃無子遺隔穀觀月

猶依稀汪洋法海無邊涯螢光詎可窺
晨晞蓮花自是生污泥污泥不染清涼肌
彩雲易散碎琉璃人間四相天五襄
有為無為俱有為壽窮塵劫元非遲
湛然醉搖芭蕉色薔薇深蘸書淋漓
白眼一望須彌低黃山先生耽書癡
退藏不露龍麟姿對人不恥獎緼衣
自甘貧困元知微籬邊黃菊香離披
門前山色寒參差不以下體遺封菲
新寄遠寄詩盤龍螭胸中滿貯夷齊薇
忘機臨水狎鷗鷺燕居申不愆儀含光
隱秀如文犀乘閒綸釣垂清漪

躬耕禾黍方離、須信君子能自卑予知先生之
獨悲深憂海內生民疲生民擾攘如焚絲笑予素
餐徒位尸先生識鑑如元龜旁通發而為聲詩照
我穹廬生光輝窮通進退元有時至人終不貪危
機他時天子求墳麓欲行周禮脩周基先生好應
千年期沙堤行人羨輕肥鳳凰到底鳳池棲太平
釣石須君持蒼生未濟無言歸

寄嵩公堂頭同叅

嵩公聞道住南宮笑寫新詩託去鴻准備金桃三

百顆因風寄與老髯公

寄移刺子春

說與沙城劉子春湛然垂老酷思君同游青塚秋
將盡共飲天山酒半醺蠟紙題詩熟鍊字氈廬談
道細論文五年回首如真夢衰草寒煙正斷魂

寄妹夫人

三十年前旅永安鳳簫樓上倚闌干
先叔故居初
學書畫同游戲靜閱琴棋相對閑聚散悲歡燈影
裏興亡成敗夢魂間安書風送來天際望斷中州

一髮山

送姪九齡行

我欲歸休與願違而方知命正宜
歸閭山自有當年月一舸西風賦式微

送姪了真行

吾兄繼世祿齋封食東平幼子死王事
長女閨門英孀居二十年禮佛讀傳燈
一旦遇宗匠了真訓其名前歲陽翟
破道服潛偷生寧死不受辱託疾燕
山京湛然憐孤族贖汝為編氓死生
本如夢寵

辱真若驚莫忘離亂苦長思厭世情
三學有龍溪叩叅宜盡誠喝碎須彌山
打破乾闥城兩頭俱放下枯木一枝榮

和少林和尚英粹中山堂詩韻

我愛嵩山堂山堂秋寂：蒼煙自搖蕩
白雲風出入冷：溪水寒細：琴絲濕
離塵欲無事又有閑蹤迹

和武善夫韻

不得潛身似許由
鑿閭辜負萬山秋未竭犬馬雖

為慊忽憶猿鶴却自羞黃閣賴懸新篆印白雪元
有舊漁舟他時雪夜尋良久且學當年王子猷

和馮揚善韻

揚善從來慕晉卿滄浪濁處不濯纓閑東易學孰
能與冀北詩聲莫與京今日窮途雖蹇剝他時行
道自亨貞須知遯世元無悶莫怨龍鍾出帝城

和董彥才東坡鐵杖詩二十韻

女媧未補青天裂神液飛精散為鐵嵒生箕踞鍛
洪爐白汗翻漿滴清血黑虬彷彿欲飛躍鱗介蒼

蒼生乳節情知中散氣凌雲肯與凡工爭巧拙柳
君傳與東坡老神物終須歸俊傑坡仙為壽文定
公刪和新詩誇勝劣觀妙堂名龍尾硯睢陽并此
為三絕睢陽城破兵火炎神器不隨煙焰滅了然
居士出伊洛登山渡水相扶挈燕然分付我清谿
妙語雕鐫跨先哲遠來携贈白雪老天理似為予
所設湛然忝位本無功致主澤民媿臯契再游北
海復何恨與君同步龍沙雪大澤深山無所驚掃
除魑魅驅兇蠶輕篁歷々吐微語閑對幽人如鼓

舌有時拈起擊須彌。擊碎同丘垤。雲門遠遁德山
去。敢對髯翁開口說。一時驚倒野狐禪。奔走不來
予。闔他年神武掛冠去。誰知劫外乾坤別。橫擔
此杖入千峰。大方獨步無蹉跌。

湛然居士文集卷第十一

用張道亨韻

道亨予故人也間闕二十年今寓居平水以詩見寄因和其韻以謝之

大安之季君政垂屯爰用事符雲雷邊軍驕懦望
風潰燕南趙北飛兵埃民財已竭轉輸因元思
治如望梅太白經天守帝座長星勾已中台立
臺密表告天道災妖變異無不該姦臣構禍謀不
軌魚鱗首侵宸階蹠血京師萬人死君臣自此

相嫌猜居庸失守紫荊破天兵掣電騰八垓潛議
遷都避凶禍銜枚半夜宮門開河表偷生聊自固
京城留後除行臺力窮食盡計夜出元戎守節甘
自裁虬龍奮迅脫大難微波沉滯獨黃能王師神
武本不殺一發鹿臺能散材威聲遠震陝洛懼勢
同拉朽如枯摧髯公退縮養愚拙白麻一旦天邊
來萬里龍庭謁天子輶車軋：風塵埋言輕無用
緘嘿浮沉鴛鴦相趁陪布幕擅廬庇風雨日中
一食如持齋瀚海波聲寒湧金山峰勢高崔嵬

十年行役亦艱苦鹽車強駕同駑駘美漣如飴潤
喉吻仃伶獨撥寒爐灰故園夢斷幾千里燕然迴
首白雲堆彈鋏悲歌望明月山城明月空徘徊往
事如絲不敢憶令人感慨生餘哀聖人繼運踐九
五歡聲騰沸天之涯萬國梯航喜奔走幣帛交列
陳瓊瑰天子恩威溢中外遠邇翕然無不懷四民
樂業庶政舉宗臣戮力諸王諧行殿受朝設鐘鼓
明堂祭祀陳大壘卿雲輪困自紛郁妖星不復侵
天街否道已窮受諸秦人心已順天心迴制度一

新從簡畧禁網踈濶如天恢賢材尚隱若冥雁區
區弋人何慕哉自慙忝位司鈞軸可憐多士無梯
媒願學留侯引年去不與赤松游蓬萊閭陽舊隱
度殘朽扁舟蓑笠江湖涯

題龐居士陰德圖

易：難：各一機非難非易亦新奇若將三句分
優劣露桂燈籠暗皺眉

和馮揚善韻

天道不可窮此理自古然大暴壽盜跖至仁天顏
淵偉材鮮遭遇君臣難兩全庸愚厭梁肉廣文寒
無擅未逢知音人伯牙故絕絃我愛馮公子孔教
窮高堅憂道不憂貧一室如罄懸却笑庠序生供
薦徒備員詩書貯便腹一斗吟百篇遠蹈顏孟迹
近比蘓黃肩寧受跨下辱不為天下先昇平已有
期上道化日躔九州成一統刑賞歸朝權汴梁三
戰定樂浪一檄傳先生謁承明萬里來秦川徒步
沙磧中徃復幾一年揅著說易傳應詔命席前十
年符應兆十世盈十千男兒志在道何論胝與胼

一旦得榮遇閭巷車馬填窮通固由命何必興致
煎用之自可進舍之便可還自笑髯中書有過仍
不悛三代不同禮勉欲相襲沿賢人正退隱強起
居官聯冰炭豈共器安可渾愚賢可惜和氏妾庸
工浪雕鐫不能作大器取次成棄捐潛龍喻君子
或躍或在田未遂馬周志好墾楊雄墨伏臘粗酒
脯旦夕充羹饘窮途不足泣弔影無自憐人生一
瞬息日月如瓊旋學道如牧羊後者為之鞭離羣
謝富貴遁世安林泉勿學躁進人扼腕長呼天

和秀玉韻 并序

三學老人背佛說法教僧幽半藏謗之
清谿老人有頌因和之

清谿作竊語湛然大笑之僅能知大用尚未識大
機貪隨言語轉錯認二阿師箇中閑揆子卓然絕
百非三學未嘗坐何說非與是半藏未有言奚論
讚與毀解語非千古能知識非智為報清谿公無
事莫生事

示從智

知人者明自知者智仁人一言博哉其利

答聶庭玉

文章太守鎮榆關遠寄新詩與湛然卓爾功名君
勉力歸與活計我加鞭扶衰幸有東坡杖遣興猶
存玉澗泉布襪青鞋任真率東垣山水不拈錢

繼柏巖大禪師韻

行盡千程與萬程誰能退步見巖宸饒渠解釋庭
前雪笑彼難除室外塵翡翠簾前猶是汝琉璃殿
上更何人直須鶴出銀籠外受用壺天不夜春

和張善長韻

下馬如虹氣焰雄驚人詩筆有誰同銀鈎老字學
顏體玉振奇辭類國風今日白衣聊養素他年皇
屋好推忠經營江左須豪哲占取雲臺第一功

愛栖巖彈琴聲法二絕

須信希聲是大音猱多則亂吟多淫世人不識棲
巖意祗愛時宜熱鬧琴

多著吟猱熟客耳強生取與媚俗情純音簡易誰
能識却道棲巖無木聲

冬夜彈琴頗有所得亂道拙語三十韻以
遺猶子蘭 并序

予幼年刻意於琴初受指于弭大用其
閑雅平淡自成一家予愛棲巖如蜀聲
之峻急快人耳目每恨不得對指傳聲
間關二十年予奏之索于汴梁得馮中
道而卒其子蘭之琴事深得棲岩之遺
意甲午之冬予扈從羽獵以足疾得告
凡六十日對彈操弄五十餘曲棲巖妙

旨於是盡得之因作是詩以紀其事云
湛然有琴癖不好凡絲竹兒時已存心壯年學愈
篤倉忙兵火際遺譜不及錄回首二十秋絲桐高
閣束栖巖有後人萬里來相逐能繼箕裘業待予
為季叔今冬六十日對彈五十曲五句記新聲十
朝溫已熟高山壯意氣秋水清心目陽春撼瓊玖
白雪碎瑤玉洛浦太含悲楚妃歎如哭離騷泣鬼
神止息振林木秋思盡雅興三樂歌清福自餘不
暇數渴心今已沃昔吾師弭君平淡聲不促如奏

清廟樂威儀自穆：今觀栖岩意節奏變神速雖
繁而不亂欲斷還能續吟猗從簡易輕重分起伏
一聞棲岩聲不覺傾心服彼此成一家春蘭與秋
菊我今會為一滄海涵百谷稍疾意不急似遲聲
不竭弱二子終身學今日皆歸僕我本嗜踈懶富貴
如桎梏幸遇萬松師一悟消三毒早晚掛冠去閭
山結茅屋蔬笋粗克庖糲飯炊脫粟有我春雷子
豈憚食無肉旦夕飽純音便是平生足

夜坐彈離騷

一曲離騷一椀茶箇中真味更可加香銷燭燼穹
廬冷星斗闌干山月斜

彈秋宵步月秋夜步月二曲

碧玉聲中步月歌彈來彈去不嫌多從教人笑成
琴癖老子佯呆不管他

彈秋水

信意彈秋水清商促軫成只疑天上曲不似世間
聲海若誠無敵河神已清平三朝不彈此心竅覺
塵生

彈秋思用樂天韻二絕示景賢

秋思而今不入時平和節奏苦嫌遲香山舊譜重
拈出不問知音知不知
粼：斷似烏蛇蚺瑟：徽如古殿苔玉澗鳴泉獨
受用穹廬祗少景賢來

彈廣陵散終日而成因賦詩五十韻 并序

嵇叔夜能作廣陵散史氏謂叔夜宿華
陽亭夜中有鬼神授之韓臯以謂揚州
者廣陵故地魏氏之季毋丘儉輩皆都

督揚州為司馬懿父子所殺叔夜痛憤
之懷寫之於琴以名其曲言魏之忠臣
散殄於廣陵也蓋避當時之禍乃託于
鬼神耳叔夜自云斬固其曲不以傳袁
孝尼唐乾符間待詔王遨為季山甫鼓
之近代大定間汴梁留後完顏光祿者
命士人張研一彈之因請中議大夫張
崇為譜序崇脩序此事渠云驗于琴譜
有井里別姊辭御報義取韓相拔劍之

類皆刺客聶政為嚴仲子刺殺韓相俠
累之事特無與揚州事相近者意其叔
夜以廣陵名曲微見其意而終畏晉禍
其序其聲假聶之事為名耳韓臯徒知
託于鬼神以避難而不知其序其聲皆
有所託也崇之論似是而非予以為叔
夜作此曲也晉尚未受禪慢商與宮同
聲臣行君道指司馬懿父子權侂人主
以悟時君也又序聶政之事以譏權臣

之罪不啻俠累安得仗義之士以誅君
側之惡有所激也不然則遠引聶政之
事甚無謂也秦和間待詔張器之亦彈
此曲每至沉思峻迹二篇緩彈之節奏
支離未盡其善獨栖岩老人混而為一
士大夫服其精妙其子蘭亦得棲巖之
遺意焉

湛然數從軍十稔苦行役而今近衰老足疾困卑
濕歲暮懶出門不欲為無益穹廬何所有祗有琴

三尺時復一絃歌不猶賢博奕信能禁邪念閑愁
破堆積清旦炷幽香澄心彈止息薄暮已得意焚
膏達中夕古譜成巨軸無慮聲千百大意分五節
四十有四拍品絃欲終調六絃一時劃初訝似破
竹不止如裂帛忘身志慷慨別姊情慘戚衝冠氣
何壯投劍聲如擲呼幽達穹蒼長虹如玉立將彈
發怒篇寒風自習：瓊珠落玉蕊電墜漁人笠別
鶴唳蒼松哀猿啼怪柏數聲如怨訴寒泉古澗澁
幾折變軒昂奔流禹門急大絃忽一捻應絃如破

的雲溪速變滅風雷恣呼吸數作撥刺聲指邊轟
霹靂一鼓息萬物再弄鬼神泣叔夜志豪邁聲名
動蠻貊洪爐煨神劍自覺乾坤窄鍾會來相過箕
踞方袒裼一旦譖殺之始知襟度阮新聲東市絕
孝尼無所獲密傳迨王遨曾為山甫客近代有張
研妙指莫能及琴道震汴洛屢陪光祿席器之雖
有聲鍊此頭垂白中間另起意沉思至峻迹節奏
似支離美玉成破壁為山虧一簣未精誠可惜我
愛棲巖翁翻聲從舊格始終成一貫雅趣超今昔

三引入五序始作意如翁縱之果純如將終皦而
繹嵇生能作此史臣書簡策又謂神所授傳自華
陽驛韓臯破是說以為避晉隙張崇作譜序似是
未為得我今通此論是非自懸隔商與宮同聲斷
知臣道逆權臣佯人主不啻韓相賊安知聶政徒
元惡誅君側上欲悟天子下則有所激惜哉中散
意千古無人識

吾山吟

兒鑄學鼓琴未期月頗能成弄有古調

絃泛聲一篇鑄愛之請予為文因補以
木聲稍彙括之歸于羽音起于南宮終
于太簇亦相生之義也以文之首句有
吾山之語因命為吾山吟聊塞鑄之請
不敢示諸他人也湛然題

吾山吾山予將歸予將歸深溪蒼松圍茅亭扁柴
扉水邊林下琴書樂矣水邊林下琴書樂矣不許
市朝知猿鶴悲吾山胡不歸

從萬松老師乞玉博山

吾師珍惜玉山爐可歎雕文朴喪初無黨無偏三
足峙不緇不磷一心虛禮佛誦課須資汝示衆拈
香更起予對此好談三澗雪因風遠寄萬松書

寄萬壽潤公禪師用舊韻

懶答禪師一紙書禪師佳句古誰知不才歎我垂
垂老美裕憐君綽、餘斷臂志能如慧祖點胸終
不似雲居三閔叅到縱橫處識破黃龍却似驢

寄聖安澄公禪師

澄公屢有寄來書不著寒溫問訊予老栢依然籠

古殿庭中有怪旃檀無恙鎮精廬金鱗透網三乘
外大隱居鄜十載餘聖安居市中秬有些兒堪恨處向
人剛覓護身符

寄甘泉禪師謝惠書

萬松節外有孫枝德業文章冠一時不惜臨風寄
新句知音消得湛然詩

送房孫重奴行

汝亦東丹十世孫家亡國破一身存而今正好行
仁義勿學輕薄辱我門

從龍溪乞西巖香并方

予愛龍溪老人之西岩香屢乞之每恨
得少旋踵而盡因道鄙句乞香并方

我愛龍溪新樣香西巖風韻卒難忘深玄欲說舌
頭短妙觀先通鼻孔長秋水彈時宜受用碧巖讀
處更相當清香妙譜都拈出莫惜十年舊藥方

乙未元日

劫前別有一壺天萬古長空無後先建化門頭聊
爾耳也隨徒衆賀新年

付從究

曠劫茫茫困路塵回頭便是故園春而今既遇松
軒老究取元來不死人

旦日遺從祖

乙未旦日從祖索詩浪道數句以遺之
塵世春風歲又遷僚屬來賀古川前誰知萬松生
心上不覺雙毛落鬢邊人生能得幾緡屐文章不
直一文錢威音邨畔乾坤別且道而今是幾年

旦日示從同仍簡忘憂

乙未旦日從同索詩因道拙偈二十韻
仍簡忘憂

昔我馳星軺駐車歸化城汝方來摠衣從同訓其
名侍予垂十年百事無一成律曆且及半琴道猶
未精禪書置一隅尚未窮一經大道若滄海萬古
長澄清酌之而不竭注之而不盈偃鼠得滿腹亦
足飽鯤鯨又如大圓鏡歷劫長圓明中間無影像
應物而現形漢胡遞相照出沒能縱橫又如萬鈞
鐘寂然藏雄聲隨叩而即應圓音自鏘鏗小擊而

小響大撞而大鳴又如長明燭積歲長熒：分為
百千萬光明如日星惠之而不費是為無盡燈日
月照天下不可語瞽盲雷霆碎山嶽聾者未曾聽
枯木元無花却怨春不平作偈以勸汝可以為盤
銘

元日勸忘憂進道

乙未元日忘憂居士索詩勉道數語因
勸其進道云

劫外風光別人間日月遷南洲添一歲北海又三

年榮利蝸粘壁功名蟻慕壇萬緣都放下好叩祖
師禪

轉燈

乙未元日安慶以轉燈見贈忘憂居士
索詩走筆作偈以驚世云

安慶作戲燈惠然來贈我藏燈借微明細火薰其
座乘茲風火力盤旋如轉磨中有角牴人揮臂不
知禍團：十萬匝輪迴莫能躲此燈雖戲具無異
大因果三世塵沙佛皆如轉燈過三千大千界成

壞亦風火所以明眼人重道輕利貨生死比夢寐
榮華等涕唾長行此觀心人間多看破多少看燈
人知音無一箇

錄寄新詩呈冲霄

冲霄酷愛玉泉詩媿我年來無好辭錄寄新詩三
十首莫教俗子等間知

寄東林

屢承東林同叅賜書未遑書答亂道鄙
語以待手訥云

同叅萬里寄書來盟手緘封手自開
沒骨舌頭我難說無根樹子若能栽
金鵬手段平翻海任老釣竿不釣能
何日萬松軒側畔笑談抵掌一開懷

借琴

龍岡居士本知音叅透淵明得趣心
暫借桐君休怙惜玉泉習氣未忘琴

戲景賢

景賢愛彈雉朝飛作是詩戲之

收獮曾歎雉朝飛七十無妻是以悲
何事龍岡愛

彈此欲學白傳覓楊枝

再用前韻

景賢彈雉朝飛予作詩以戲之蒙寵和
有若有餘陰乞一枝之句予再用前韻
拒之

過住行雲不敢飛一聲還噎一聲悲
蠻兒深愜龍岡意唱得香山楊柳枝
妙舞盤中塵不飛採蓮一曲遶梁悲
慕素魯蠻獨當雨貫珠歌韻柳腰枝

寄景賢

因足疾在告彈琴逾時腕臂作痛自訟其癡作詩以寄景賢

湛然有過必人知笑寄龍岡自訟詩閻浮衆生苦為樂華嚴皇覺藥能醫十年擐甲足疾作三月彈琴臂力衰因病得閑：却病閑中雖病也便宜

再用知字韻戲景賢

薄德從來本畏知龍岡有又和來詩機閑不解活龍弄是語有癖疾還如死馬醫大舜再逢難永訣周

公不夢覺吾衰鳳池元是夔龍宅山鹿野麋終不
宜

復用前韻戲呈龍岡居士兼善長詩友

君有蠻兒我已知湛然援筆上新詩翠眉已惹禪心動玉頰休教懶隨醫舊有藥爐雖竭底新來鼎器却扶衰隆：玉準能青眼不解雲霓也自宜西人

多服
白衣

行雨行雲一夜飛襄王從此莫含悲蠻兒侍寢龍崗老恰似桑梯生柳枝

慕樂天

荆水渾如八節灘荆水出于玉泉玉泉佳趣類香山韋編

周易忘深意貝葉佛經送老閑爽我琴書池五畝

侑人詩酒竹千竿樂天活計都相似脂粉獨嫌素

與蠻

彈廣陵散

居士閒談止息時胸中鬱結了無遺樂天若得嵇

生意未肯獨吟秋思詩

戲劉潤之

從劉潤之借杜詩因豪奪之作是詩以

戲之

休嗔久假不云歸長笑還書是一痴居士親行萬

里地政須百註杜陵詩

用劉潤之韻

箇中消息本忘言一念從渠一萬年大地遍開皆

是水頑石不擊固無煙成佛莫落謝公後建業從

教祖氏先萬法悉從心地起元來禍福不由天

湛然居士文集卷第十二

琴道喻五十韻以勉忘憂進道 并序

余幼而喜佛蓋天性也壯而涉獵佛書
稍有所得頗自矜大又癖于琴因檢閱
舊譜自彈數十曲似是而非也後見琴
士弭大用悉棄舊學再變新意方悟佛
書之理未盡遂謁萬松老人旦夕不輟
叩叅者且三年始蒙見許是知聖諦第
一義諦不在言傳明矣邇因忘憂學鼓

琴未期月稍成節奏又知學道之方在
君子之自強耳故作琴道喻述得旨之
由勉子進道之漸云

昔我學鼓琴豪氣凌青天輕笑此小技何必師成
連寶架翻舊譜對譜尋冰絃自彈數十弄以謂無
差肩有客來勸予因舉莊生篇時君方誦書輪扁
居其前釋椎而入請何故讀殘編上古已久矣不
得見聖賢遺書糟粕餘與道雲泥懸臣年七十秋
雙鬢如垂綿斷輪固小巧性非方圓心手兩相

應不能語子焉是知聖人道安得形言詮至今千
載間此論不可遷琴書紙上語妙趣焉能傳不學
妄穿鑿是為誰之愆予方謁弭君服膺乃拳、相
對受指訣初請歌水仙吟猱不踰矩節奏能平、
起伏與神會態狀如雲烟朝夕游之游琴事得大
全小藝尚如此大道寧不然當年嗜佛書經論窮
疏箋公案助談柄賣弄猾頭禪一遇萬松師駕駘
蒙策鞭委身事洒掃樞衣且三年圓教攝萬法始
覺擔板偏回視平昔學尚未及埃涓漸能入堂奧

稍：窮高堅疑團一旦碎桶底七八穿洪爐片雪
飛石上栽白蓮佛祖立下風俯視威音先忘憂西
域時師我求真筌經今十五春進退猶遷延望涯
自退縮甘心嗟無緣將求無價寶未肯鬻一錢未
啓半簣土欲酌九仞泉美玉付良工良工得雕鏤
良金不受冶徒費爐鞴煥聞君近好琴停燭夜不
眠彈之未期月曲道能相聯君初未彈時曾不知
勾蠲學道亦如此惟患無精專誰無摩尼珠誰無
般若缸立志勿猶豫叩叅宜勉旃他時大徹悟沛

然如決川毛端吞巨海芥子含大千瞬息一世過
生死相縈纏此生不得學曠劫徒悲煎吾言真藥
石療子沉痾痊

彈琴逾時作解嘲以呈萬松老師

一曲悲風歷指寒昔年曾奉萬松軒木嫌浮脆刪
吟抑為愛軒昂變撞教高趣釀成真有味煩襟洗
盡了無痕禪人若道聲塵妄孤負觀音正法門

勉景賢

昨日景賢坐間屢稱東坡真人中之龍

也若慕其才而異其志採其華而棄其
實又何益於事哉因作偈以勉之云
既慕東坡才當如東坡志君才如東坡其志未相
似詩似東坡詩字如東坡字胡不學東坡且學長
不死

劉潤之館於忘憂門下作述懷詩有弟子
二三同會食誰曾開口開先生之句予感
而和之

從來重士還相重到底輕人却自輕醜廢翻然便

歸去至今高尚穆先生

劉潤之作詩有厭琴之句因和之

學士既歸夫子道吾儒宜識仲尼心當年刪出詩
三百時復絃歌不廢琴

懷古一百韻寄張敏之

興亡千古事勝負一枰碁感恨空興歎悲吟乃賦
詩三皇崇道德五帝重仁慈禮廢三王謝權興五
伯濤焚書嫌孔孟峻法用高斯政出人思亂身亡
國亦隨阿房脩象魏徐福覓靈芝偶語真虛禁長

城信謾為只知秦失鹿不覺楚亡驩約法三章日
恩垂四百基漢興學校啓文作典章施黷武疲中
夏窮兵攘四夷嗣君恩稍失劉氏德難衰新室雖
興難真人已御期魏吳將奮起靈獻自荒嬉賊子
權移漢姦臣鳩築郿三朝如峙鼎四海若焚絲終
奉山陽主已生司馬師仲謀服孟德葛亮倍曹丕
唯晉成獨統平吳混八維有初終鮮克居治亂誰
思蟬鬢克蘭掖羊車遶竹岐孫謀無遠慮神器委
癡兒國事歸椒室民飢詢肉糜為人昧菽麥聞螟

問官私衛瓘嘗幾諫何曾已預知五胡雲擾攘六
代電奔馳川谷流腥血郊原厭積屍天光分耀日
地里裂瓜時曆數當歸李驅除暫假隋西陸開却
善東鄙討高麗鸞駕如江國龍舟泛汴漪錦帆遮
水面粉浪汚河湄府藏金帛積生靈氣力疲盜賊
天下起章奏禁中欺海內空龍戰河東有鳳姿元
戎展鷹犬頡利助熊羆奉表遵朝命尊王建義旗
經營于盜手禪讓託君辭豪哲歸我噐要荒入吾
羈太宗真令主真觀有皇規正美開元治俄成天

寶悲曲江還故里林甫領台司裂土封三國纏頭
受八姨霓裳猶未罷鞀鼓恨來遲逆寇陵丹闕君
王捨翠眉西京賊黨滅方鎮重權移朱李元堪歎
石劉亦可唾九州重構亂五代薦荒飢遼宋分南
北翁孫講禮儀昔宋事遼為兄仍請隨代以序宣
昭穆至季年遼為翁宋為孫宣
和風侈靡教主德庸卑背約絕鄰好興師借寇資
懸知喪唇齒何事撤藩籬失地人皆怨蒙塵悔可
追遼家遵漢制孔教阻宣尼煥若文章備康哉政
事熙朝廷嚴衮冕郊廟奏堦簏校獵温馳射行營

習政奇南州走玉帛諸國畏鞭笞天祚嬌人上朝
鮮叛海涯未終三百祀不免一朝危鴨綠金朝起

鴨綠江武元
起義之地桑乾玉璽遺金兵逼京師天祚西狩
遺傳國璽于雲中之乾
桑河竟後遼興大石西域統龜茲萬里威聲振百

年名教垂大石林牙遼之宗臣挈衆而亡不滿二
十平克西域數十國幅員數萬里傳教
主凡百餘年頗尚文教西武元平宋地殷禮雜宗

域至今思之廟號德宗西姪金謂箕子之
商雜用周禮治國崇文事拔賢尚賦詞和昌君

浴汭劉豫立青淄大定民興詠明昌物適宜日中
須景晏月滿必光虧肘腋獨夫難立墟七廟隳北

朝天輔祐南國俗瘡痍天子潛巡狩宗臣嚴守陴
山西盡荆枳河朔半豺狸食盡謀安出兵羸力不
支長圍重數匝久困再周期太液生秋草姑蘓游
野糜忠臣全節死餘衆入降麾文獻生三子東丹
第八枝虛名如畫餅遺業學為箕自笑蓬垂鬢誰
憐雪滿髭撫膺長感慨搔首幾嗟咨車蓋知何處
衣冠問阿誰自天明下詔知我素通著發軔裝琴
劍登車執策綏穹廬或白黑駟騎半黃馵肥嚮白
如匏瓊漿甘似飴天山連北府天山之北唐北
庭都護府在焉

海過西伊

伊州之西北有瀚海
伊州又謂之西州

天馬窮渤海神兵

過月氏感恩承聖勅寄住到尋愚

尋愚度西域城
名西人云尋愚

肥也度城也
通謂之肥城也
園必成趣多
有方池園沼

春色多紅樹秋波摠綠陂

西域風俗
家必有園

栗園林足果梨春粳光璨玉煑飯滑流匙聖祖方

輕舉明君應樂推龍庭陳大禮原廟獻明棗萬國
朝金陸千官列玉墀求賢為輔弼舉我忝丞疑才
德真為慊顛危不解持願從麋鹿性豈戀鳳皇池
投老誰為伴黃山有敏之

示忘憂 并序

予作懷古詩百韻非徒作已使世之人
知成敗之可鑑出世之人識興廢之不
常也因作偈以見意云

歷代興亡數張紙十年勝負一盤碁因而識破人
間夢始信空門一著奇

和金城寶宮旭公禪師三絕

知公已得夜明符任運騰：無所拘見說金城多
長者有人青眼待君無

南北東西搃一家總生擬議便生瑕人：錯認髯
居士只有禪師不眼華
旭老今年雖也無糞堆却得舊明珠穹廬半夜無
燈燭讀書平安一紙書

再和世榮二十韻寄薛玄之

予嘗和李世榮詩二十韻薛玄之和元
韻見寄以求拙語因再和之

尚記承平日為學體自強經書興我志功業逼人
忙蟄窟長思震葵心本慕陽蛟龍初得雨日月近

依光事主心無隱遭時策建長引君當正道陳事
上封章亦既尊仁義胡為失毅剛歲規盡忠赤人
物敢雌黃斷似南山定言令北斗昂勸君師魏鄭
嫉惡法網張青眼蒙高顧白眉忝最良誰知天有
數不覺漢亡疆人笑段干木誰師田子方上蒼垂
天命天闕冊明王殷室君雖滅仁人道未亡南州
遠煙水北海幾星霜仁政時將治明君國寢昌卿
雲知有慶嘉穀又呈祥名遂宜思退機危乃自戕
歸與今好賦聞道故園荒

簡仲文寄詩二十六韵勉和以謝之

我愛仲文公敦純有古風科名擢乙選制策肯宸
衷作事能謀始為人克有終養如鄒軻去聲氣成自
仲尼溶致主忠誠懇容人便腹空一朝淹驥足百
里試鳩功牛刃聊施割囊錐已脫鋒屯方雷雨動
秦未地天通聚散悲歡裏興亡夢寐中勢傾秦失
鹿姦殞繇為熊不學東方朔誰徵皇甫嵩洛陽傳
白傳江夏譽黃童上國平諸域輿情達四聰百司
將布置多士想登庸未識荊州面徒思衛玠客中

原期混一天子訪英雄嘉運人皆幸亨時君又逢
汙俗風已變明主德方隆施雨皇恩布如流直諫
從凱元咸戮力稷契各言忠我愧凡庸士恩霑造
化工兵氛箕尾沒衄血斗牛衝西華將歸馬南陽
莫臥龍孝廉為選舉仁義作幘幪歷運千年合衣
冠萬國同草儀獨有子行待泰山封

又二首

文仲才華冠人間工部擅前第一班世上久無孔
北海雲中誰識謝東山忘懷詩酒醒還醉適意琴

書樂且閑野有遺賢猶未用中書寧得不胡顏
室中忝預萬松籌脫得中間與兩頭反覆人心厭
殷室咄嗟天下屬宗周直須勇退中書事未肯榮
貧留國侯收拾綸竿與蓑笠華亭却覓舊漁舟

用曹楨韻

楨金城人字幹臣始冠上詩於我文采
可觀因和元韻以勉後進云

征南都護將旋旆平北將軍已罷師寰海謳歌歸
大舜明堂鐘鼓奏咸池咸陽父老傾心日魯國書

得生志時收拾琴書我歸去朝廷人物有臯夔

怨浩然

韓浩然嘗以詩許昇元寶器玉澗鳴泉
二琴予已有謝書今得書以玉澗遺周
漢臣藏昇元而託以他辭因用浩然新
韻以怨之 漢臣小字六和予嘗戲呼
為六居士

先難後易真交契醉許醒違蓋世情玉澗白輪六
居士昇元烏有一先生昔蒙佳句誠懽怍今得芳

緘且歎驚一入侯門深似海驂人空夢帳中聲昇元寶器亦名帳中寶

從國才索閑：煎茶賦

聞國才近得閑：手書煎茶賦以詩索
之

聞君久得煎茶賦故我先吟投李詩為報君侯休
吝惜照人瓊玖筭多時

贈高善長一百韻

高善長本書生也屢入御園而不捷乃

翻然醫隱悉究難素之學後進咸師法
焉與龍岡居士善尤長於詩而酷愛予之
拙語蓋自厭家雞耳因漫成俚句一百
韻以贈之

君本遼陽人居華表傍隨任來燕來卜築金臺
坊幼蒙父兄訓讀書登上庠大義治三傳左氏為
紀綱詩書究微理易道宗京房史學亦精妙議論
亦馨香行道有餘力下筆能詩章典雅繼李杜浮
華寫陳梁當年闢科舉郡國求圭璋御園屢不捷

先生乃醫隱退身慕義是難素透玄旨鍼砭能起僵
在前饒粃糠可並華扁跡可聯和緩芳門生皆良

醫西海高名揚昔我知君名方且王事忙兵塵隔
東西忽成參與商君初涉洛溼我已達燉煌瀚海
浪奔激金山路彷徨西游幾萬里兩鬢今蒼：西
方好風土大率無蠶桑家：植木棉是為墮種羊
年：早作厖未識舞鷓鴣決水溉田圃無歲無豐
穰遠近無飢人田野棲餘糧是以農民家處：皆
池塘飛泉遶曲水亦可斟流觴早春而晚秋河中
類餘杭濯足或濯纓肥水如滄浪雜花間側柏園

林如綉粧爛醉蒲萄酒渴飲石榴漿隨分有絃管
巷陌雜優倡佳人多碧髯皎皎白衣裳市井安丘
墳畎畝連城隍錢貨無孔郭賣餘稱斤量甘瓜如
馬首大者狄可藏採杏兼食核西方杏仁皆生食
之甘香如芭攬
食瓜悉去瓤西瓜大如鼎半枝已滿筐芭攬賤如
棗可愛白沙糖人生為口腹何必思吾鄉一住十
餘年物我皆相忘神祖上仙去聖主登明堂馱騎
徵吾歸忝位居岩廊河表寒舊盟廊秦成戰場翠
華乃南渡鸞馭聲鏘六軍臨孟津偏師出太行

間路入斜谷南鄙侵壽唐犄角皆受敵應戰實未
遑一旦汴梁破何足依金湯下詔求明醫先生隱
藥囊馳軺來北闕失措空倉惶我於羣雞中忽見
孤鳳凰下馬執君手涕淚其如雩我歎白頭翁君
亦嗟髯即停燈話舊事談笑吐肺腸酬酢覓嘉句
沉思搜微茫湛然訪醫藥預備庸何妨高君畧啓
口確論聞未嘗醫術與治道二者元一方武事類
藥石文事如膏粱膏粱日日用藥石藏巾箱一朝
有急病藥石施鋒鏑病愈速藏藥膏粱復如常緩

急寇難作大劍須長槍寇止兵弗戢自焚必不長
發表勿攻裏治內無外傷朝廷有內亂安可搖邊
疆：場或警急中變決自戕陰病陽脉生陽證陰
脉亡暴法譬之陰仁政喻之陽太平雖日久恣暴
降百殃大亂遍天下行仁降百祥一君必二臣佐
使仍參詳不殊世間事烝民無二王國老似甘草
良將比大黃一緩輔一急一柔濟一剛病來不速
治安居養豺狼疾作倘無藥遇水乏舟航病固有
寒熱藥性分溫涼療熱用連藥理寒宜桂薑君子

與小人禮刑令相當虛者補其羸實者瀉其強扶
衰食枸杞破血服檳榔抑高舉其下天道猶弓張
損餘補不足貧富無低昂寒多成冷瘡熱盛為瘡
瘍政猛民傷殘政慢賊猖狂保生必求源胃府為
太倉四時胃為主端居正中央朝廷天下本：固
邦家昌寶：而虛：其謀元不減五行不偏勝所
以壽而康太宗平府兵是致威要荒未病宜預治
未亂宜預防賊臣弑君父禍難生蕭牆辨之由不
早即漸成堅霜心腹尚難治向復及膏肓湛然聞

此語不覺興胡林謝君贈誨言苦口如藥良問一
而得二和璧并夜光走筆書新詩一笑呈龍岡

再賡仲祥韻寄之

金城薛玄之用李世榮舊韻寄詩於予
索拙語已和寄忽思水巖再賡仲祥元
韻以寄之

能談仁義兵經傳宗素臣字畫類閑：句法如之
純澹然與世踈渭水獨垂綸蒿萊塞庭除塵土霑
衣紳歸我夫子門三月無違仁後生來從學善誘

能循：顏卷不改樂范甌長生塵仰不愧於天俯
不忤於人進德方乾：慎行而脩身旅食秦晉間
騎驢三十春珠玉炙人口麗藻嘉彬：今年又絕
糧生涯如在陳歌詠猶不輟真為葛天民雜詩過
子卿離騷齊靈均忘機天壤間舉措皆天真濯足
滄浪中鷗鷺來相親胸中萬卷書下筆端如神素
負經濟才人品伊臯倫桂林秭一枝亦何慙却詵
寄金城士大夫

遠聞金城學齋絕糧因奉粟十斛助齋

鹽之資故作小詩以礪本土學士大夫
金城人士本多奇何事庫宮久茂資周急無輕五
秉粟傷時因寄一篇詩

誠之索偈

誠之久侍萬松師何事十年下手遲劫火光中須
退步青春寧有再來時

遺姪淑卿香方偈

姪淑卿疾作索安息香於予欲辟邪也
將謂汝是箇中人猶有這箇在因作香

方偈以遺之

我有一香：秘之不敢說心生種：法生心滅種
種法滅退身一念未生前此是真香太奇絕邪神
惡鬼求沉蹤外道天魔皆腦裂

為子鑄作詩三十韻

乙未為子鑄壽作是詩以遺之鑄方年
十有五也

皇祖遼太祖奕世功德積彎弓三百鈞天威：萬
國一旦義旗舉中原如捲席東鄙收句麗西南窮

九譯古器獲軒鼎神寶得和璧南陬稱子孫皇業
幾三百赫：東丹王讓位如夷伯藏書萬卷堂丹
青成畫癖四世皆太師名德超今昔我祖建四節
功勳冠黃閣先考文獻公弱冠已卓立學業飽典
墳創作乙未曆入仕三十年廟堂為柱石重義而
踈財後世遺清白我受先人體兢：常業：十三
學詩書二十應制策禪理窮畢竟方年二十七萬
里渡流沙十霜泊西域自愧無才術忝位人臣極
未能扶顛危虛名徒伴食汝方志學年寸陰真可

惜汝：進仁義不可為無益經史宜勉旃慎毋耽
博奕深思識言行每戒迷聲色德業時乾：自強
當不息幼歲儲皇侍且作春宮客一旦衝青天翺
翔騰六翮儒術勿踈廢祖道宜薰炙汝父不足學
汝祖真宜式酌酒壽汝年五福自天錫

湛然居士文集卷第十三

楞嚴外解序

昔洪覺範有言天台智者禪師聞天竺有首楞嚴經旦暮西向拜祝願此經早來東土續佛慧命竟不得一見今板鬻遍天下有終身不聞其名者因起法輕信劣之歎若夫徵心辨見證悟窮魔明三界之根深七趣之本原始要終廣大悉備與禪理相為表裏雖具眼衲僧不可不熟繹之也予故人屏山居士牽引易論語孟子老氏莊列之書與此

經相合緝成一編謂之外解實漸誘吾儒不信佛
書者之餌也吾儒中喜佛乘者固亦多矣其全信
者鮮焉或信其理而棄其事者或信其理事而破
其因果者或信經論而誣其神通者或鄙其持經
或譏其建寺塵沙之世界以為迂濶之言成壞之
劫波反疑駕馭之說亦何異信吾夫子之仁義誣
其禮樂取吾夫子之政事舍其文學者耶或有攘
竊相佞之語以語皆出於吾書中何必讀經然後
為佛此輩尤可笑也且竊人之財猶為盜矧竊人

之道乎我屏山則不然深究其理不廢其事其于
因果也則舉作善降祥之文引羊祜鮑龍之事其
于塵界也則隘緇子之說婉禦寇之談其神通也
則云左慈術士耳變形于魏都皆同物也疑吾佛
不能變千百億化身乎其于劫波也則云郭璞日
者卜年於晋室若合符券疑吾佛不能記百萬之
多劫耶其於持經也則云佛日禪師因聞誦心經
咒言下大悟田夫俚婦持念諸課者詎可輕笑之
哉其于建寺也則云阿蘭若法當供養彼區區者

尚以土木之功為費何庸望之甚耶其評品三聖人理趣之淺深也初云稍尋舊學且窺道家之言又繙內典至其邃處吾中國之書似不及也晚節復云予以此求三聖人垂化之理而後知吾佛之所以為人天師無上大法王者非諸聖之所以能侔也學至於佛則無可學者乃知佛即聖人聖人非佛西方有中國書中國無西方書也或問屏山何好佛之深乎答云感恩之深則深報之屏山所謂心不負人者矣渠又云吾佛之所誨人者真實

如不誑不妄豈有毛髮許可疑者耶噫古昔以來篤信佛書之君子未有如我屏山之大全者也近代一人而已泰和中屏山作釋迦文佛贊不遠千里以序見託于萬松老師永長巨豪劉潤甫者笑謂老師曰屏山兒時聞佛以手加額既冠排佛今復贊佛吾師之序可慎與之庸詎知他日得不復似韓歐排佛乎老師曰不然今屏山信解入微如理而說豈直悔悟於前非亦將資信於來者且兒時喜佛者生知宿稟也既冠排佛者華報蠱惑

也退而贊佛者不遠而復也而今而後世尊所謂
吾保此木決定入海矣後果如吾師言予與屏山
通家相與爾汝曾不檢羈其子阿同輩待予以叔
禮天兵既克汴梁阿同挈遺稿來燕寓居萬松老
師之席老師助鋟木之資欲廣其傳阿同致書請
予為引予亦不讓援筆疾書以題其端不惟彰我
萬松老師之有知人之鑑抑亦紀我屏山居士克
終全信之心且為方來淺信竊道者之戒甲午清
明後五日湛然居士漆水移刺楚才晉卿序於和

林城

心經宗說後序

白華山主措折脚鎚熟沒米粥萬松野老用穿心
椀盛與無口人雖然指空語空爭奈依實具實嗟
見渾掄吞棗只管誦持故教混沌開眉妄生穿鑿
如明以字莫認經頭未解本文且看注脚湛然居
士漆水移刺楚才晉卿詳勘印行

糠蟹教民十無益論序

昔予友以此論見寄囑予求序以行世予恐謗歸

於講主者辭而不序遂採萬松老師賦意及講主
餘論述辨邪論之意以謂世人皆云釋子黨教護
宗由是飛謗流言得以藉口予本書生非釋非糠
從傍仗義辨而證之何為不可乎予又謂昔屏山
居士序輔教編有云儒者嘗為佛者害佛者未嘗
為儒者害誠哉是言也蓋儒者率掌銓衡故得高
下其手其山林之士不與物競加以力孤勢劣曷
能為哉予觀作頭陀賦數君子皆儒也予不辯則
成市虎矣不獨成市虎抑恐崔浩李德裕之徒一
唱一和撼搖佛教為患不淺故率引儒術比而論
之以勵吾儒為糠蟹所惑者論既述所謂予友者
復以書見示其大畧曰講主上人者以糠蟹叛教
頽風乃檢閱藏教尋繹儒經積有年矣窮諸佛之
深意達三乘之至真列十篇之目成一家之言語
辨而詞溫文野而理親聞之者是非莫逃誦之者
邪正斯分雷震獅吼邪推魔奔良謂偃德草之任
風釋凝氷之陽春噫或佛道之未喪也諒必由子
斯文乎是以信奉佛教者展轉錄傳不可勝紀京

城禪伯尊宿欲流之無窮不憚萬里徃復數書託
予為序今之士大夫才筆勝予者固亦多矣豈不
能序此一書乎以予素淘汰禪道涉獵佛書頗知
旨歸故也子何讓焉此老不避嫌疑自其謗讟而
為此書彼且不避子何代彼而避謗乎吾觀子所
著辨邪論止為儒者述儒之信糠者止二三子而
已矣市井工商之徒信糠者十居四五自非此書
彼曹何從而化之乎子所得者少所失者不為不
多矣書既至予不能答謹以書意序諸論首丙戌

重五日題於肅州善善城

釋氏新聞序

昔仰嶠叢林為燕然之最主事僧輩歷久不更執
權附勢動搖住持人秦和中本寺奏請萬松老人
住持上許之萬松忻然奉詔人或勸之曰師新出
世彼易師之年少彼不得施其欲必起風波無遺
後悔乎師笑而不答既住院師一遵舊法無所變
更惟拱默而已夏罷主事輩依例辭職師因其辭
也悉罷之師預于眾中詢訪耆德選為眾推仰者

數人至是咸代其職積歲顏風一朝頓革遠近翕然稱吾師素有將相之材矣邇後章廟秋獵于山主事輩白師曰故事車駕巡幸本寺必進珍玩不然則有師必有詰問師責之曰十方檀信布施為出家兒予與若不具正眼空食施物物理應償報汝不聞木耳之緣乎富有四海貴為一人豈需我曹之珍貨也哉且君子受人也以德豈可以此瑕類貽君主乎因手錄偈一章詣行宮進之大蒙稱賞有成湯狩野恢天網呂尚漁磯浸月鈎之句誠仁

人之言也翌日章廟入山行香屢垂顧問仍御書詩一章遺之師亦淡如也車駕還宮遣使賜錢二百萬使者傳勅命師跪聽師曰出家兒安有此例使者怒曰若然則予當迴車師曰傳旨則安敢不聽不傳則亦由使者意竟焚香立聽詔旨章廟知之責其使曰朕施財祈福耳安用野人閑禮耳上下悚然服吾師不屈王公之前矣此二事天下所共知者也其餘師之隱德默行未播于人間者可勝道哉師之切于扶聖教急于化人心也萬分之

一見之于此書乎師應物傳道之暇手不釋卷凡
三閱藏教無書不讀每有多聞能利害于佛乘閑
涉于教化者悉錄之目之曰釋氏新聞將使見書
而知歸聞言而嚮道真謂治邪之藥石濟迷之津
梁也豈小補哉石門洪覺範著林間錄辯而且文
間有偏黨之語後之成人之美者未嘗不歎息于
斯焉我萬松老師之意扶教利人也深是以推舉
他宗談不容口此與覺範之用心相去萬一者也
讀是書者當知是心矣於戲偉哉予請刊是書行

於世因為之序甲午上元後一日湛然居士移刺
楚才題

屏山居士金剛經別解序

佛法之西來也二千餘祀寶藏琅函幾盈萬軸可
謂廣大悉備矣獨金剛一經或明眼禪客若脫白
沙彌上至學士大夫下及野夫田婦里巷兒女子
曹無不誦者以頻見如閑姑置而不問者有之以
至理叵測望涯而退者有之噫信其小而不信其
大信其近而不信其遠信其所聞而不信其所未

聞信其所見而不信其所未見自是而非他執一而廢百者比；然又何訝焉偉哉屏山居士取儒道兩家之書會運裝二師之論牽引雜說錯綜諸經著為別解一編莫不融理事之門合性相之義折六如之生滅剖四相之鍵閔謂真空不空透無得之得序圓頓而有據說宗說之相須辨因緣自然喻以明珠倫諸衆生譬之圓鏡若出聖人之口冥契吾佛之心可謂天下之奇才矣噫此書之行于世也何止化書生之學佛者偏見衲僧無因外

道皆可發藥矣昔予與屏山同為省掾時同僚譏此書以為餌餒餒之具予尚未染指于佛書亦少惑焉今熟繹之自非精于三聖人之學者敢措一辭于此書乎吁小人之言誠可畏哉乙未元日湛然居士漆水移刺楚才晉卿序于大磧黃石山

書金剛經別解後

孔子有云吾十有五而志於學三十而立四十而不惑是知學道未至於純粹精微之域雖聖人亦有感焉昔樂天答制策稍涉佛教之譏中年鄙海

山而脩兜率垂老為讚佛發願文乃云起因張本其事見於本集子瞻上萬言頗稱釋氏之弊晚節專翰墨為佛事臨終作神咒浪出之偈且曰著力即差其事見于年譜退之屈論于大顛而稍信佛書韓文公別傳在焉永叔服膺于圓通而自稱居士歐陽公別傳在焉是知君子始惑而終悟初過而後悛又何害也屏山先生幼年作排佛說殆不忍聞未幾翻然而改火其書作二解以滌前非所為改過不吝者予于屏山居士有所取焉後之人

立志未定惑於初年者當以此數君子為法乙未清明日湛然居士題於別解之後

屏山居士鳴道集序

屏山居士年二十有九閱復性書知李習之亦二十有九叅藥山而退著書大發感歎日抵萬松老師深攻亟擊宿稟生知一聞千悟注首楞嚴金剛般若贊釋迦文達摩祖師夢語贅談翰墨佛事等數十萬言會三聖人理性之學要終指歸佛祖而已江左道學倡於伊川昆季和之者十有餘家涉

獵釋老膚淺一二著鳴道集食我園榘不見好音
誣謗聖人聾瞽學者噫憑虛氣任私情一讚一毀
獨去獨取其如天下後世何屏山哀矜著鳴道集
說廓萬世之見聞正天下之性命發揮孔聖幽隱
不揚之道將攀附游龍馭：乎吾佛所列五乘教
中人天乘之俗諦疆隅矣鳴道諸儒力排釋老拚
陷韓歐之隘黨孰如屏山尊孔聖與釋老鼎峙耳
諸方崇匠皆引屏山為入幕之賓鳴道諸儒鑽仰
藩垣莫窺戶牖輒肆浮議不亦僭乎予忝歷宗門

堂室之與懇為保證固非師心昧誠之黨如謂不
然報惟影響耳屏山臨終出此書付敬鼎臣曰此
吾末後把交之作也予其秘之當有賞音者鼎臣
聞予購屏山書甚切不遠三數百里徒步之燕獻
的稿于萬松老師轉致于予：覽而感泣者累日
昔予嘗見鳴道集甚不平之欲為書糾其蕪謬而
未暇豈意屏山先我著鞭遂為序引以鉞江左書
生膏肓之病焉中原學士大夫有斯疾者亦可發
藥矣甲午冬十有五日湛然居士漆水移刺楚才

晉卿序

賈非熊修夫子廟疏

天產宣尼降季周血食千祀德難鬲重新庠序獨
無力試向滄溟下釣鈞

孝義永安寺請予為功德主因作疏

塵緣不盡淹鳳池而有年習氣難忘慕禪林而未
暇適遇昭公老子請作永安主人乞聞一聲何須
再讓葛藤舊案宛如馬耳之風松菊新堂便是終
焉之計謹疏

請旭公禪師住應州寶宮寺疏

孫枝出自萬松中便好移來植寶宮覆陰人天正
今日不妨鼓動劫前風

請文公菴主住玉山開堂出世疏

兒大做翁當仁不讓便請承當何須再勘

請巖庵主住東堂出世疏

西堂棄東堂山東過山西禪師開狗口居士展驢
蹄

請希庵主住晉祠奉聖寺開堂疏

晉祠山水冠人間好請希公向此閑飯了蒙頭三
覺睡逢人休說趙州閑

請學庵主住翠微山寶林寺開堂出世疏
金城元有翠微山寶刹禪林積歲閑笑請學公來
領畧一甌遊戲白雲間

請石州海秀首座住文水壽永寺疏

聞道霖師退壽寧秀公難弟亦難兄新詩遠寄石
州去眨起眉毛便好行

霖公寔沾
秀法屬也

太原山開化寺灰燼之餘再新故宇請予

為功德主因作疏

竊以塵緣有數否則泰：則亨聖道無窮變則通
通則久惟開化之故刹實太原之名藍兵火以來
劫灰而已住持人固有定老功德主乃請湛然良
惻殷勤強為領畧禪心佛語誰知教外別傳梵刹
蓮宮更看無中唱出謹疏

重脩宣聖廟疏

精藍道觀已重新獨有庠宮尚坳垣試問中州士
君子誰人不出仲尼門

燕京大萬壽寺化水陸疏

竊以生死蒙恩便見法門不二怨親普濟始知檀
度無私仰惟佛陀興悲爰自阿難張本欲啓無遮
之大會必資有衆之良緣但肯同心便希垂手謹
疏

請與公禪師開堂疏五首

竊以深達大本何妨摘葉尋枝截斷衆流便是隨
波逐浪欲整雲門窠窟必求佛覺兒孫伏惟與公
和尚道合圓通法傳圓照逢人便出方為禪子家

風戀土難移未是衲僧氣息謹疏

竊以轉身就父從來禪子宗風借路還家好箇衲
僧消息伏惟與公和尚受戒崇壽得法聖安未闡
徽猷權棲大覺因席就請何須特地人情准帖奉
行拆合這翻公案謹疏

竊以釋迦憐迦葉富無物與人與公俏聖安憨慢
藏誨盜既收鋤斧子不藉破皮鞋須要粧龍似龍
何礙將錯就錯拖將十字街裏便好投衙推來百
尺竿頭更教進步謹疏

竊以法海彌深曹水五流分派化風猶扇雲門一
葉重華與公庵主透圓照之重闌提圓通之正令
善作降魔相能談文字禪開裏刺頭最好逢人便
出穩處下脚何礙遇緣即宗謹疏
竊以當年嚼飯喂嬰兒聖安左錯今日把棒喚狗
子居士風顛你打開漆桶徹底承當我擘破面皮
須要相見橫柳栗木獨行正令莫壓弱倚強與旗
檀佛共演梵音好換行奪寺謹疏

請湘公上人住持新院仍名興教寺者因

作疏

寶刹成空隨劫灰而已滅精廬如聖逐化日而重
新為國報恩何名興教赤軸黃卷且圖摘葉尋枝
寶藏琅函何礙尋行數墨謹疏

德興府岷峪雲岩寺請東林老人住持疏

昔日山中養聖胎峪中松檜手親栽院荒松老無
龍象便請東林更一來

公幼年嘗在此寺
有手植松在焉

請松巖儼公疏

良弼施宅創天寧却請天寧舊衲僧為報柏岩休

遜讓閑中續出祖師燈

初州重脩宣聖廟疏

宣尼萬世帝王師可歎荆榛汶古祠重整庠宮闡
文教顯觀日月再明時

安慶織萬佛疏

予自忝預政事以來懶為疏文恐物議
挾勢故也安慶者工巧妙天下自勸新
意織萬物佛為施嘉其意因破戒作此
疏云

十方三世萬如來不犯校頭寶座開單手元知不
成拍三臺須要大家催

請聰公和尚住山陰縣復宿山疏

世傳文殊顯化

再宿于此山故得名

昔日文殊曾復宿當年聰老可重來

公舊嘗住此山

便是真佛窟何必區區禮五臺

題萬壽寺碑陰

昔達磨西來禪宗大播門庭峻峭機變驟馳非世
智辯聰所能曉也其與奪之間固有賓主抑揚之

際不無權術其未具透關眼者豈免隨語生解之
病哉香山俊公和尚受法於大明渠為洞山之後
偏正五位失其本意亦行權之語與同叅榮公聞
之果吞鈎餌俊公門人輩從而勒諸石遠發後世
之一笑噫受師之道而反謗之是自謗也何止自
謗也曹山枝子青州諸師之道皆不足法矣顧香
山亦近世之豪邁者也忍為此事耶昔雲門拈世
尊初生因緣云我當時若見一棒打殺與狗子喫
瑯琊覺云雲門可謂將此身心奉塵刹是則名為

報佛恩臨濟臨終謂三聖云誰知吾正法眼藏向
這瞎驢邊滅却至今法道大行是知宗門之語一
擡一搯豈可以世間語言定其準的也哉若香山
果無毀大明意後之子孫宜改覆車之轍不然則
自有勝默老人之韻語予手書于故碑之陰以為
來者誡其詞曰
燕俊與朔榮齊足出大明俊趨住巨刹黨奮梟獍
惺探抱洞山足逆坊大明晴聞見弔澆季擗腕皆
含情榮甘溺壑篋掉尾求羶腥曲助碑其言欺賊

晚來誠我覽取諸譬：彼秦築城秦非不謀固無
德秦亦傾上德無可德下德方紀銘端然居上德
非碑道亦行况聖不自會古德云其足聖其肯自
人法聖人不會矜盈修母致子有反是而未矜日花只自見耳磬
約誰聽雖欲信天下未必同為聲不見三葉祖削
迹捨身名兒孫愈岳立史傳愈金鏗不見北宗下
功勳石上爭期昌竟何昌千古招論評俄柔慶基
敗大明老師嘗記曰彼有黨僭必不
得好嗣果敗于慶柔基三人也玷累斯文貞
贅然寘虛堂徒表黨宗明

和公大禪師塔記

師本平水人俗姓段氏幼習儒業甫冠應經義舉
因閱春秋左氏傳悟興衰之不常慨然投筆退居
山林年三十棄俗出家禮平陽大慈雲寺僧宗言
為師受戒披剃頗習經論後聞教外別傳之旨乃
傾心焉遍謁諸方因緣不契師知萬松老人之聲
價照映南北直抵燕然而見之居數載師資道契
始獲密許人頗知之丙戌夏六月故勸農使王公
為功德主作大齋又蒙行省相公泊以下僚佐專

使賈䟽勸請開堂出世因住持大萬壽禪寺師素
剛毅寡合未期退居漁陽之盤山報因寺建州元
帥葛公權府朱公彈壓樊公聞師之名飛䟽敦請
辭不獲已杖錫北行詣建州梨花道院以塞其命
未幾示微疾移居閭山之崇福寺養病一日忽召
門人普淨輩謂之曰生死去來猶空花水月何足
為訝遂淨髮更衣端坐而囑後事乃作頌曰臨行
一句當面不諱皓月清風不居正位頌畢右脇而
寂師將順世有本寺傳戒大師臨謂之曰善為道

路師笑而不答令衆且去勿誼衆皆出聞師咄一
聲衆驚視之師已寂矣三日神色不變茶毘之日
頗有祥異數州士民焚香拜禮者絡繹於路師俗
壽四十六僧臘一十六其徒迎其靈骨藏于萬壽
祖塋之側噫師之處萬壽也每聞誦經之聲形不
憚之色由是人皆譏之臨行之濟命其徒諷尊勝
咒者何哉殊不知大善知識臨機應物一抑一揚
一奪一縱若珠之走盤千變萬化詎可以一途而
測耶至於巨川海和尚平日亦行此令執相者諷

之而謂毀梵行掠虛者讚之而謂無礙禪皆失之
矣後之學者當以此為誠己丑之清明其徒囑予
為記遂以所聞之語信筆記之湛然居士云

萬壽寺創建厨室上梁文

萬壽寺創建厨室浪著上梁文六首幸
付工人輦歌之用光法席

拋梁東香積移來不犯功却笑維摩無手段但將
盂飯到塵中

拋梁南底箇因緣最好叅試問助緣多少衆前三

三與後三

拋梁西巧匠騎驢倒上梯四面無門何用鎖十方
沒壁不須泥

拋梁北柱石宛有擎天力欲摸此樣向諸方撤却
僧繇描不得

拋梁上手不傷材真大匠虛堂窮劫鎮叢林借與
兒孫為榜樣

拋梁下聊倩般輸成大厦朝香飯供諸佛承事
悉無空過者

茶榜

今辰齋退特為新堂頭與公長老設茶一中聊表
住持開堂陳謝之儀仍請知事大眾同垂光降者
竊以箇中滋味誰是知音向上封題罕逢藻鑑伏
惟新堂頭長老名超絕品價重諸方黃金碾畔析
微塵輸他三昧手碧玉甌中轟巨浪別是一家春
睡鬼潛奔便使至人無夢湯聲微發解教醉眼先
醒諗老三盃莫作道理會盧公七椀且是仁義中
雖然櫬桶新陳不得顛預甘苦便請大家下口且

圖一衆開懷幸甚

約善長和詩戰書

予奉善長詩百韻仍乞光和渠謙抑退
讓以降啓見戲予亦戲作戰書以督之
聊發一笑耳

維旃蒙協洽之歲三月甲午朔湛然謹致書于詩
將善長先生幕府愚聞李杜齊名已有登壇之序
元白並駕嘗興定霸之書在昔云然於今亦可既
久陳於師旅宜一決于雌雄無約而和者必謀有

備則所以亡患在德不在險雖粗聞於古語受降
如受敵則為戒于兵家伏惟善長先生冀北無雙
斗南第一能投壺而講禮善橫槊而賦詩詞鋒折
萬里之衝筆陣掃千人之敵將畧多々而益辨雄
材一々而難陳遇險韻而愈奇見大敵而倍勇君
倡之而來挑戰我和之以為應兵方及交綏輒陳
降啓前鋒少却尚未損于一毫勇氣未衰遂引退
于三舍張羸師以誘我遺厚利以餌予曠日持久
以老我師重幣甘言以驕我志深藏九地必發九
天故示之以不能將攻我之所短儻弗遵于術勝
亦非功苟不推於至誠盟之何益此奚疑耳理亦
灼然兵不戰而屈人可為上策心未服而納款豈
無詐謀若非先見之明徒貽後悔之謂是以載嚴
文壁爰整詩兵比爾于立爾矛一乃心齊乃立文
章燦爛依稀整々之旗聲律精嚴彷彿堂々之陣
乃一鼓而成列決再戰而立功顧天下之英雄唯
使君與操歎文章之微婉非夫子而誰竚待兵塵
願聞金諾謹奉戰書以聞指不多及

寄萬松老人書

嗣法弟子從源頓首再拜師父丈室承手教諭及弟子有以儒治國以佛治心之語近乎破二作三屈佛道以徇儒情者此亦弟子之行權也教不云乎無為小乘人而說大乘法弟子亦謂舉世皆黃能任公之餌不足投也故以是語餌束教之庸儒為信道之漸焉雖然非屈佛道也是道不足以治心僅能治天下則因為道之餘滓矣戴經云欲治其國先正其心未有心正而天下不治者也是知

治天下之道為治心之兼所耳普門示現三十二應法華治世資生皆順正法豈非佛事門中不捨一法者歟孔子稱夷齊之賢求仁而得仁死而不怨後世行者難之又安知視生死如逆旅坐脫立亡乃衲僧之餘事耳且五善十戒人天之淺教父益慈子益孝不殺之仁不妄之信不化自行於八荒之外豈止有恥且格哉是知五常之道已為佛教之淺者兼而有之弟子且讓之以儒治國以佛治心庸儒已切齒謂弟子叛道忘本矣又安足以

語大道哉又知稚川子尚以叅禪卜之立見其効
師嘗有頌試本分鉗鎚一下便知真假正謂此耳
呵：春深萬冀為道珍重區：不便

萬松老人萬壽語錄序

予忝侍萬松老師謬承子印因遍閱諸派宗旨各
有所長利出害隨法當爾耳雲門之宗悟者得之
于緊俏迷者失之于識情臨濟之宗明者得之于
峻拔迷者失之於莽鹵曹洞之宗智者得之于綿
密愚者失之于廉纖獨萬松老人得大自在三昧

决澤玄微全曹洞之血派判斷語錄具雲門之善
巧拈提公案備臨濟之機鋒為仰法眼之爐熾兼
而有之使學人不墮于識情莽鹵廉纖之病真間
世之宗師也畧舉中秋日為建州和長老圓寂上
堂云有人問既是建州遷化為甚萬壽設齋師云
此夜一輪滿清光何處無又問不是盡七百日又
非周年大祥闔勘今日設齋師云月色四時好人
心此夜偏眾中道長老座上誦中秋月詩佛法安
在師云萬里此時同皎潔一年今夜最分明將此

勝因用嚴和公覺靈中秋玩月徹曉登樓直饒上
生堯率西往淨方未必有燕京蒸梨榴棗爆栗燒
桃衆中道長老只解說食不見有纖毫佛法師云
謝子證明即且致為甚中秋閉目坐却道月無光
有餘勝利迴向諸家檀信然軟蒸豆角新煮雞頭
葡萄駐顏西瓜止渴無邊功德難盡讚揚假饒今
夜天陰暗裏一般滋味忽若天晴月朗管定不索
點燈老師語錄似此之類尤多不可徧舉且道五
派中是那一宗門風具眼者試辨看噫千載之下

自有知音乙未夏四月湛然居士漆水移刺楚才
晉卿序於和林城

祭侄女淑卿文

維乙未之春三月二十六日叔湛然居士謹以蔬
食清茗致祭於猶子舜婉淑卿之靈維靈胄出遼
室支分太宗我考賢王夙植於令德吾兄按察載
振于清風汝幼奉母訓長知父從禪理頗究儒學
悉通稟鄭娘之標格有靈昭之心胸不食葷於筭
年欲為尼於高嵩德播人口名達帝聰遣使求於

故鄉有詔入於深宮守志持節慎心飭躬垂及知
命尚為嬰童古所未有來者孰同章奏久掌名位
日隆上謂之女學士人呼之官相公屢有諫諍多
所彌縫德殊辭輦之班功勝當熊之馮忽家亡之
國破歎勢盡而途窮果全身而不辱示微疾而善
終正悟之名得之於空老徒悟之號乞之于髯翁
信幻有之非有知真空之不空來兮無跡去兮無
踪來無跡兮出燕山之白雲去無蹤兮聳和林之
青松明日灰飛煙滅後天涯無處不相逢嗚呼哀

伏惟尚饗哉

和林城建行宮上梁文

拋梁東萬里山川一望中靈沼靈臺未為比宸宮
不日已成功

拋梁南一帶南山楫翠嵐創築和林建宮室節侯
功業冠曹參

拋梁西碧海寒濤雪拍堤臣庶稱觴來上壽嵩呼
拜舞一聲齊

拋梁北聖主守成能潤色明堂壯麗鎮龍沙萬世

魏、威萬國

拋梁上棟宇施功遵大壯鳴鞘聲散翠華來五雲
深處瞻天仗

拋梁下柱石相資成大厦君臣鐘鼓樂清時喜見
山陽歸戰馬

為武川摩訶院創建佛牙塔疏

佛日增輝國政和靈牙有詔賜摩訶因風吹火何
勞力垂手同脩宰堵波

湛然居士文集卷第十四

法語示猶子淑卿

汝自謂幼年嘗禮空禪師求名因書頌云父母未
生前凝然一相圓釋迦猶不會迦葉豈能傳此語
極妙且道汝作麼生會古昔以來有志師僧辭親
出家尋師訪道千辛萬苦三二十年祇為此一段
空劫以前大事尚有未透脫者汝幼居閨閣久在
掖庭未嘗用功叩叅大善知識但博尋宗師語錄
徒增狂慧深背真道賣弄滑頭於道何益所以古

人道參須實參悟須實悟又云滿肚學來無用處
閻王不要葛藤看真良言也只如空老所書頌亦
論父母未生前面目又道釋迦猶不會迦葉豈能
傳此是何意趣若云釋迦不會能仁四十九年橫
說豎說貝藏琅函遍滿人間末後拈花以傳教外
之旨且道此法從何而得若云迦葉無傳西天二
十八祖東土歷代諸師相傳之道自何而來若謂
釋迦不會迦葉無傳這空禪師亦是佛祖兒孫寫
此頌圖箇甚麼箇中閑揆盡在此兩句不可不細

參詳予今謂汝透漏些子消息父母未生前老夫
云水泄不通凝然一相圓老夫云針劄不入釋迦
猶不會老夫云非思量處迦葉豈能傳老夫云識
情難測父母未生前老夫云三更神世界凝然一
相圓老夫云半夜鬼乾坤釋迦猶不會老夫云只
許老胡知迦葉豈能傳老夫云直饒將來他亦不
要父母未生前老夫云頭圓象天凝然一相圓老
夫云足方象地釋迦猶不會老夫云寒山撫掌迦
葉豈能傳老夫云拾得呵：老夫為汝橫批豎判

正用顛拈十字打開兩手分付了也一句子薦得
可與佛祖為師一句子薦得可與人天為師一句
子薦得自救不了閑中試定省看其或未明若到
燕然問取萬松老子

和潤之韻

潤之館於忘憂門下生徒乘駟渠徒步
抵和林城有詩云破帽麻鞋布腿襦強
扶衰病且徒行區々不道圖他甚一夜
山妻罵到明予憐而和之

踈筍籬邊正脫襦故山青處便宜行鏡湖他日應
屬我好向湖邊訪四明

贈景賢

茶隣藥物成邪氣琴伴蕭聲變鄭音可惜龍岡老
居士却將邪教污真心

寄東林

東林已秀三兩枝覆蔭人天在此時貪向龍宮翻
貝葉惱人不寄玉泉詩

以來書云見閱
藏經故有是語

寄萬壽潤公禪師

林泉人笑鳳皇枝我慕林泉歎後時
消息太平和尚又無詩

寄甘泉慧公和尚

東林枝勝桂林枝不惜甘泉濟
早時鐵額網頭含笑面可人
能字更能詩

遺龍岡鹿尾二絕 并序

去歲秋獮予謁龍岡因彈秋水龍岡出
山羊一雙為贈渠笑曰已過價矣予愛
客多設鹿尾漿今年上獵于秋山龍岡

託以鹿尾可入藥得數十枚悉以遺予
因錄近和人詩數篇以報仍作詩二絕
為引聊發一笑耳

秋水清聲忽變商龍岡曾遺二山羊今年祇奉詩
三首為報先生鹿尾漿

去歲山羊酬過價今年鹿尾不值錢龍岡藥物都
竭底只得髯翁詩數篇

和景賢贈鹿尾二絕

日暮長揚獵騎歸西風弓硬馬初肥
今年臘尾休

嫌少且喜君王不合圍
禁鬻酷思濃鹿汁香蔬久厭小兒拳龍岡採得斑
龍尾一串穿來寄玉泉

中秋召景賢飲

中秋北海景淒淒，好拚今宵醉似泥快請龍岡疾
過我與君同泛玉東西

請定公住大覺疏

龍龕寶藏照人寒與老功成住聖安却請定公來
領畧收拾香火禮旃檀

補大藏經板疏

十年天下滿兵埃可惜金文半劫灰欲析微塵出
經卷隨緣須動世間財

武川摩訶院勅建瑞像殿疏

邦人創刻旃檀像寺象新脩窣堵波兩段因緣非
細事成功須仗大檀那

請與公住崇壽院

泥湫昔日隱蟄龍一震重新大覺宮却請收雲歸
舊壑晨昏香火禮師翁

泥湫院圓通禪師真空在焉

寄聖安澄老乞藥

登高回首望燕山試道新詩怨聖安
賺得護身符子去二年不寄大還丹

信之和予鼎賈非熊三字韻見寄因再賡
元韻以復之

鸚鵡徒羨大鵬南駕馬終須後
夏駭至理猶州萬婦一庸儒剛說二生三
透閑活眼嫌金屑戀土瘞人宿草菴寄與
雲川賢太守洗心滌慮請君叅
惱人捷徑起終南虛忝沙堤相國驂
幻術莫驚殷

七：真筌誰後三：家隣荆水也
玉泉宜栽竹綠在香山好結菴
斫斷葛藤窠已後閑家破具不須
叅

鴻雁翩：自北南歸與何日駕歸驂
潛龍在下宜初九即鹿無虞戒六三
浴下好游白傳寺濟源重覓侍中菴
衰翁自揣何多幸昨夢齋中得罷叅
萬松老人住持大覺寺榜其齋曰昨夢

雲漢遠寄新詩四十韻因和而謝之

兌爻符太一天相忝文昌泛海難
追蠹封留欲學

良穢形伴珠玉朽木廁松樟直節心雖赤衰年鬢
已蒼伴食居相府無德報君王草甲濡春雨葵心
傾太陽大權歸禁闕成算出巖廊自北王師發平
南上策長皇朝將革命亡國自頽綱漢水偏師渡
長河一葦航股肱無敢惰元首載歌康號令傳諸
域英雄守四方大勲雖已集遺命未嘗忘萬國來
馳幣諸侯敬奉璋兆民涵舜德百辟仰天光大有
威如吉重乾體自強碩賢起編戶良將出我行太
廟陳籩豆明堂服冕裳宋朝微寢滅皇嫡久成戕

政亂人思變君愚自底亡右師潛入劍元子直臨
喪殺氣侵南斗長庚壯玉堂

幽州之分

弓猶藏寶玉劍

未識干將皇業超千古天威聳八荒元戎施虎畧
勇士展鷹揚武繼元封跡文聯貞觀芳宮庭敢諫
鼓帷幄上書囊佇待卿雲見行觀丹鳳翔武文能
迭用威德是相當多士思登用遺賢肯退藏詩書
搜鳥篆功業柳龍驤國用恒無闕民財苦不傷八
音歌雅頌百戲屏優倡聖澤傳朝露明刑肅暮霜
永垂塵劫祚一混九州疆重任司鈞石微材匪棟

梁思歸心似醉感媿淚如滂嚴子終辭漢黃公合
隱商窮通真有數憂樂實難量雖受千鍾祿何如
歸故鄉 乙未閏月上旬日玉泉書

德新先生惠然見寄佳製二十韻和而謝
之

當年職都水曾不入其門德重文章傑年高道義
尊雖聞傳國士恨不識皇_王孫韻語如蘓武離騷類
屈原煙霞供好句江海入雄吞意氣輕三傑才名
冠八元著述歸至順議論探深源藉：名雖重區

區席不溫家貧謁魯肅國難避王敦北鄙來雲內
西邊近吐蕃勉將嚴韻繼不得細論文遠害雖君
智全身亦聖恩大才宜應詔豪氣傲司閤學識光
先哲風流遺後昆莫尋三島客好謁萬松軒六度
真光發三毒妄影奔素絲妄染習古鏡去塵昏爐
上飛寒雪胸中洗熱煩到家渾不識得象回忘言
心月孤圓處澄：泯六根 乙未閏月上休日玉
泉書

子鑄生朝潤之以詩為壽予因繼其韻以

遺之

巖松傲歲寒枝幹騰千尺男兒若稽古功名垂竹
帛我祖東丹王施仁能善積我考文獻公清白遺
四壁盛名流萬世馨香光赫々予生歎不辰西域
十年客貧困志不渝未肯忘平昔々日出燕然辰
當攝提格鶉尾得鳳毛續後予無責汝知學不學
何啻雲泥隔為山虜一簣龍門空點額遠襲周孔
風迹追顏孟跡優游禮樂方造次仁義宅繼夜誦
詩書廢時毋博奕勤惰分龍猪三十成骨骼致之

寢食廢安可忘朝夕行身謹而信於禮順而據祥
麟具五蹄溟鵬全六翮為人備五常奚憂仕與謫
成功不自滿始知謙受益慎毋忘此詩吾言真藥
石 甲午重午前三日湛然居士書

扈從旋師道過東勝秦師席上繼杜受之
韻

去國十年久還鄉西鬢皤三川猶梗澁百越政干
戈東勝城無恙西征事若何凭高吟望久尊酒酌
長河

用梁斗南韻

丁年學道、難成却道中原浪播名否德自慙調
鼎鼐微材不可典璣衡誰知東海潛姜望好向南
陽起孔明收拾琴書作歸計玉泉佳處老餘生

贈姪正卿

遼室東丹九葉芳曾陪劍珮侍明昌學書寫盡千
林葉習射能穿百步楊興廢人間戰白蟻榮枯枕
上夢黃梁故山咫尺宜歸去莫使因循三徑荒

寄張鳴道

張君宗派自留侯壯歲成名入士流一代詩聲如
玉振千鈞筆力挽銀鈎平山邂逅初青眼汴水伶
仃已白頭遙想荷花好時節故人吟倚仲宣樓

送省掾郭仲仁行

蘭省而今已預名還鄉衣錦也為榮遼陽幹事須
詳悉速駕星輶上玉京

送燕京高慶民行

國用繁多我政憂上章清選倅徵收好陪劉晏勤
王事早使錢如地上流

和趙庭玉子贇韻

萬里龍庭白草秋時、歸夢舊漁舟酌殘白酒難
成醉老盡黃華無限愁久識人心多厭政喜逢天
下已歸劉而今子入中州去莫惜寒梅寄隴頭

贈東平主事王玉

聖主方思治邊臣未奉行憑君達此意無得負蒼
生

周敬之脩夫子廟

天皇有意用吾儒四海欽風盡讀書可惜風流賢

太守天山朔起仲尼居

寄萬壽堂頭乞湖山

削玉剡瓊出自然依稀巖竇吐雲烟禪師手段掀
山嶽便好移來向玉泉

寄東林同叅

東林屢有寄來詩忙裏何嘗報一詞豈是玉泉生
吝惜言無滋味不宜時

寄簡堂頭

巨川生下此村牛千百頭中愁一頭鼻孔撩天無

主伴不風流處也風流

寄孔雀便面奉萬松老師

風流彩扇出西州寄與白蓮老社頭遮日招風都
不礙休從侍者索犀牛

答倪公故人

玉泉回報故人書問子參玄着意無且趁萬松鑪
鍛熟疾忙索取護身符

一作夜明符

送王璘行

天涯九日出龍沙冬後冬前却到家餽運功成須

報我好游天漢上槎浮

繼介丘穆景華韻

北海慵傾北海尊予懷為向景華伸奇才管葛堪
為匹何事虞唐不得臣行道欲期丹鳳出忘機且
與白鷗親龍庭萬里休辭遠六出奇書正賴陳

繼平陶張才美韻

才美風流自一時因風來寄湛然詩新朝制度知
將近晚節功名未是遲識子因為天下士微君孰
撫我民瘼援毫欲繼清新句笑我却無黃絹辭

德柔嘗許柞鞍玉轡且數年矣作詩以督
之

異物當時許晉卿幾年思渴動詩情龍庭風細沙
堤軟玉轡雕鞍政好行

卜鄰一絕寄鄭景賢

龍沙幽隱子真家自撥寒泉出淺沙我願卜鄰穹
帳側旋分清酌煮新茶

寄岳君索玉博山

玉鑪精巧若裁盼寄與髯翁也不妨古廟多年無

氣息直消一炷返魂香

雲中重脩宣聖廟疏

槐宮悉混玉石焚廟貌依然唯古雲須仗吾儕更
脩葺休教盛世喪斯文

寄光祖

漁陽光祖冠當時筆法詞源我獨知君有家雞君
自厭為何偏愛玉泉詩

送德潤南行

燕然民庶久瘡痍摩撫瘡痍政此時暴吏猾胥詭

君日開緘三復味予詩

再和萬壽潤禪師書字韻五首

夏道

不肯參禪不讀書徒喧口鼓說真如未能即色明
真色只道無餘已有餘法眼凋殘浮海去瀉山寂
寞少人居一從三聖承當後季世寥々無瞎驢

述懷

寶藏翻窮貝葉書方知真理本如々一心不動無
生滅萬古長空豈欠餘妙藥更靈雖忘口長安雖

貴不堪居毛吞大海渾閑事誰訝歌中出白驢

警世

看盡人間萬卷書较量佛法總難如本無妄疾剛
尋藥幸有回波好乞餘方丈名山真碧海含元古
殿是皇居行人半老家何在終日騎驢却覓驢

傷時

金馬門前數上書子虛新賦笑相如萬言警策才
無敵六國縱橫智有餘千里兵車討姦宄五更朝
馬候興居功名賺得頭如雪不悞團々如磨驢

投老

囊裏瑤琴架上書箇中真味更何如伴閑美竹千
竿許養老田園二頃餘睡起焚香誦圓覺興來緩
軫品幽居宮音有北曲夕陽半下山偏好吟入煙霞穩
跨驢

贈景賢玉澗鳴泉琴

玉泉珍惜玉泉琴不遇高人不許心素軫四三排
碧玉明徽六七架黃金臨風好奏朝飛曲對月宜
彈清夜吟渠能彈雅朝飛清夜吟贈與龍岡老居士須教下

指便知音

丙申元日為景賢壽

龍沙一住二十年獨識龍崗鄭景賢詩筆饒君甘
在後琴棋笑我強爭先冷官何啻廣文樂歸計猶
存谷口田劫外壺天壽無量請公勤叩祖師禪

景賢作詩頗有思歸意因和元韻以勉之

我訪龍岡老珠璣咳唾間酒熟香馥琴滑水潺
潺王吉河中栽菊和林也有山但能心放下何處
不安閑

景賢召予飲以事不果翌日予訪景賢值
出予開尊盡醉而歸留詩戲之

昨朝命我初無興今日尋君不在家不問主人都
飲盡醉吟倒載黑羶車

和景賢召飲韻

書滿穹廬酒滿尊龍岡召我謝殷勤琴中別有無
絃曲醉裏開懷舉似君

丙申上元夜夢中偶得

超佛越祖透真空也與瀉山說夢同面貌眼睛鼻

孔裏大千沙界一漚中

送門人劉德真征蜀

門弟遼陽劉德真剛直木訥近乎仁憐君粗有才
學術師我精通天地人今日從軍征兩劔他時擁
旆入三秦三辰測驗須吾子創作天朝寶曆新

送門人劉復亨征蜀

誠之識吾二十年不讀經書不學禪誤爾儒冠好
投筆逼人勲業可加鞭浣花溪畔春如畫濯錦江
邊酒似川壯歲從軍真樂事節侯遺躅勉爭先

趙州柏樹頌

古佛猶存舊道場
庭前依舊柏蒼蒼
莫謗諸州無此語
禪林奔走錯商量

黃龍三闋頌

我手何似佛手

稱頭斤兩須端的
短少毫釐不可欺
函闋辨認合同券
未肯輕放過伊

我脚何似驢脚

行令如同車脚圓
你三文後我三錢
直饒道底分

明是也是當年鸚鵡洲

如何是上座生緣

只打野盤無寺宿
不供餽口趁村齋
上戶莫椿虛物力
僧司無得錯推排

和太原元文舉韻

魏帝兒孫氣似龍
而今飄泊困塵中
君游泉石初無悶
我秉鈞衡未有功
元氏從來多慨慷
并門自古出英雄
李唐名相沙堤在
好與微之繼舊風

喜和林新居落成

登車憑軾我怡顏
飽看和林一帶山
新構幽齋堪
偃息不閑：處得閑：

題新居壁

舊隱西山五畝宮
和林新院典刑同
此齋喚省當年夢
白晝誰知是夢中

太原修夫子廟疏

并門連歲不年豐
證父攘羊禮義空
既倒在瀾扶
不起直須急手建庠宮

和林建佛寺疏

龍沙玄教未全行
故築精藍近帝城
須仗檀那垂
手力一輪佛日

湛然居士文集終